

DI'IDZA' LA'IYA BZU SAN MATEO LË'Ë GUICHI

Ni rnën quie xuzixta'o Jesucristo
(Lc. 3.23-38)

1 Ni rguixogue'n quie ja xuzixta'o Jesucristo. Naca Abraham len rey David xuzixta'o Jesucristo. ²Abraham guquë' xuzi Isaac, na' Isaac guquë' xuzi Jacob, na' Jacob guquë' xuzi Judá len ja bichinë!. ³Na' Judá guquë' xuzi Fares len Zara, na' lao žna'jë' Tamar. Na' Fares guquë' xuzi Esrom, na' Esrom guquë' xuzi Aram. ⁴Na' Aram guquë' xuzi Aminadab, na' Aminadab guquë' xuzi Naasón, na' Naasón guquë' xuzi Salmón. ⁵Na' Salmón guquë' xuzi Booz, na' lao žna'në' Rahab. Na' Booz guquë' xuzi Obed, na' lao žna'në' Rut. Na' Obed guquë' xuzi Isaí. ⁶Na' Isaí guquë' xuzi rey David, na' rey David lénë' žgula Urías gucajë' xuzi žna' Salomón.

⁷Na' Salomón guquë' xuzi Roboam, na' Roboam guquë' xuzi Abías, na' Abías guquë' xuzi Asa. ⁸Na' Asa guquë' xuzi Josafat, na' Josafat guquë' xuzi Joram, na' Joram guquë' xuzi Uzías. ⁹Na' Uzías guquë' xuzi Jotam, na' Jotam guquë' xuzi Acaz, na' Acaz guquë'

xuzi Ezequías. ¹⁰Na' Ezequías guquë' xuzi Manasés, na' Manasés guquë' xuzi Amón, na' Amón guquë' xuzi Josías. ¹¹Na' Josías guquë' xuzi Jeconías len ja bichinë' tiempo cati unita' ben' Babilonia cati yahua'ajé' preso ben' Israel lao yedyi quiejë'.

¹²Te beyudyi na', Jeconías guquë' xuzi Salatiel, na' Salatiel guquë' xuzi Zorobabel. ¹³Na' Zorobabel guquë' xuzi Abiud, na' Abiud guquë' xuzi Eliaquim, na' Eliaquim guquë' xuzi Azor. ¹⁴Na' Azor guquë' xuzi Sadoc, na' Sadoc guquë' xuzi Aquim, na' Aquim guquë' xuzi Eliud. ¹⁵Na' Eliud guquë' xuzi Eleazar, na' Eleazar guquë' xuzi Matán, na' Matán guquë' xuzi Jacob. ¹⁶Na' Jacob guquë' xuzi José, ben' quie María, na' María guquë' žna' Jesús, ben' naca Cristo.

¹⁷Lao tiempo uzu Abraham hasta bdyinnan tiempo uzu rey David, udaohue chida' tiempo unita'jë'. Lëscan' lao tiempo uzu rey David hasta bdyinnan tiempo yehua'a ben' Babilonia ben' Israel preso yedyi quiejë', udaohue itu chida' tiempo unita'jë'. Lëscan' lao tiempo yehua'a ben' Babilonia ben' Israel preso yedyi quiejë' hasta bdyinnan

tiempo golo Cristo, udaohue itu cue'
chida' tiempo unita'jë!

Ni rnën cati golo Jesucristo
(Lc. 2.1-7)

18 Caora cati golo Jesucristo
guca caniga: Žna'në! María napë'
compromiso utzagana'lénë! José.
Pero antes binesi' laguediyjé! sujé!
tuže, caora na' gucabé! José banu'a
María xcuidi!. Pero por nun quie
Bichi Be quie Diuzi nu'anë! xcuidi!.
19 José naquë! ben' huen bire'ennë'
gaohuë! María xquia lao yedyi.
Re'ennë! usannë! lenë! sin que inezi
ja bené!. **20** Tu racanë! pensari bi
huenë!, cati ptilalao tu ángel quie
Diuzi lenë! lao bichi gala quië!.
Na'ra una ángel rëbinë! lëbë!:—

—José, ži'lí suba David luë!,
bidzebo' siu' María gacanë! žgulo',
porque nun quie Bichi Be quie
Diuzi banu'anë! xcuidi!. **21** Lëbë! su
tu ži'inë!, na' huelo' laobi! JESÚS.
Cana' huelo' laobi' porque ži'inë'
ute uselabi' dula' xquia quie ben'
yedyi quiebi!.

22 Yugulu cabë! guca na', bzunan
di'idza' quie Diuzi cabë! una
Diuzi lao na'a tu ben' udixogue'
xti'idza'në! tiempote. Cani unë! dza
na!:

23 Huazu tu nigula cuidi!, ben'
binesulë be'mbyu, hua'anë! tu
ži'inë!.

Na' si' laobi' Emanuel.

Ta inaro xti'idza'ro: Zélë Diuzi ra'o.

24 Cati udèlebë José lao bichi gala
quienë!, bënë! cabë! gudyi ángel
quie Diuzi lëbë!. Aoži'në! María
para žgulanë!. **25** Pero biuzulënë!
lëbë! cabë! rzulë ja benë! žgulajé!

hasta que golo ži'inë! néro. Na'
bë'në! lao ži'inë! JESÚS.

**Uyo ben' psëdi quie
bélo yena'jë! Jesús**

2 Cati golo Jesús lao yedyi Belén
ga nebabá Judea, caora na'
uzu tu ben' lao Herodes naquë! rey.
Na'ra bdyin ja ben' za' zaca' ga rlë
obidza, bdyinjé! ciudad Jerusalén.
Nacajé! ben' psëdi quie bélo. **2** Na'ra
unabajë!:

—¿Gaži zu rey quie ben' Israel,
ben' zagolo? Nita'ndo' zaca' ga
rlë obidza blë'ëndo' bélo ta naca
seña golobi!. Quie lena' za'ndo' ta
gapala'nndo'bi!.

3 Cati unezi rey Herodes cabë'
unayaquë!, lega ptëbi pensari
quienë! lëbë!. Lëscan' yugulu ja
ben' ciudad Jerusalén, lega ptëbi
pensari quiejé! lëjé!. **4** Na'ra guži rey
Herodes yugulu ja xan' pxuzi len ja
ben' rusëdi ja ley rnao ben' Israel.
Na' unabanë! rëbinë! lëjé!:

—¿Gan' galó ben' naca Cristo?
5 Na' ra unajé! rëbijé! lëbë!:—

—Galoguë! yedyi Belén ga nebabá
Judea, porque cani rnën lë'ë guichi
bë profeta dza na'te:

6 Le'e ben' yedyi Belén quie yu
nebabá Judá, ba'ala'cazi naca
yedyi quiele yedyi dao', hualo
ladole tu ben' inabë'ra, ben'
inabë! ben' Israel, ben' quie
Diuzi.

Cana' rnën lë'ë guichi.

7 Na'ra balarazi guži rey Herodes
yaca ben' psëdi quie bélo. Unabanë!
lëjé! dyë'lëdi bi tiempo golo bélo.

8 Na' use'ela'në! lëjé! Belén rëbinë!
lëjé!:

—Uletzio Belén inabale dyé'ëdi bi raca quie xcuidi!. Cati babedzelelebi nadetixogue'le në'ëdi' tacuenda guidaria' gapala'na'bi!. —Cana' unanë' rëbinë' lëjë!.

⁹ Te beyudyi una rey Herodes gudyijë' lëjë' cana', na'ra zio ben' psëdi quie bélo. Na'ra lëbéló blé'ëjë' caora nita'jë' zaca' ga rlë obidza, udyialaona laojë' hasta que bdyinnan laohue ga zu xcuidi!. ¹⁰ Cati blé'ëjë' ga bdyin bélo, lega bedaohuetzeguejé!.

¹¹ Caora uyu'ujé' lu'u yu'u, blé'ëjë' xcuidi' lëbi' žna'bi' María. Na'ra uditzužibijé' udapala'një' bdao' na'. Na'ra laosalotejé' caja quiejë' nu'ajé', bë'jë'bi' regalo ta nu'ajé', bë'jë'bi' oro len yalo len ja aceite zio. ¹² Beyudyi na', guca tu chopa dza nita'jë' na' cati uxusajé' de que bireya'ala' yejojé' gan' uza'jë', gan' re' rey Herodes. Quie lena' uži'jë' neza tula zeyojé' yedyi quiejë'!

Bžuno José lënë' familia quiénë' yedyi tula

¹³ Ude beyudyi beza' ja ben' psëdi quie bélo yena'jë' xcuidi', na'ra uxusa José blé'ënë' tu ángel quie Diuzi rëbinë' lëbë'!

—Uyasabachi' udé'ëla' bdao' na' len žna'bi!. Užunolélo'bi' tziola'obi' yu nebaba Egipto. Na' yega'nla'obi' hasta que inia' luë' gala tzio', porque rey Herodes hueguiloguë'bi' ta gutié'bi'.

¹⁴ Na'ra udélebë José, uyasanë', uži'në' xcuidi' len žna'bi' lao rëla ziojé' yu nebaba Egipto. ¹⁵ Na'zi bega'një' ulezajé' uzujé' hasta que bdyin hora guti rey Herodes. Cana' guca tacuenda bzu di'idza' quie

Diuzi cabë' gudyinë' profeta rëbinë' lëbë' cani: "Yu nebaba Egipto babeyëža' žil'ina' yerobi!"

Na'ra bë rey Herodes mandado gati ja xcuidi'

¹⁶ Cati gucabë' rey Herodes uži' ja yë' ben' psëdi quie bélo, na'ra bdza'në', bënë' mandado gati ja xcuidi' de chopa iza huio para žanle, bi' necua' Belén len ja bi' necua' yedyi rega'n ga'ala!. Cana' bënë' mandado segün cabë' tiempo una ja ben' psëdi quie bélo gudyijë' lënë'!

¹⁷ Cana' bzu di'idza' quie profeta Jeremías caora unë':

¹⁸ Yero tu rchi' ja ben' yedyi Ramá, rbediyijë' rnaya'jë'.

Na' rbedyi ja nigula quie ja ben' Israel por nun quie žil'ijé'.

Bireyudyicazi cuediyijë' ta yezujé' gusto dan' aguti žil'ijé'.

¹⁹ Pero bë' beyudyi guti rey Herodes, caora na' ptilalao tu ángel quie Diuzi lao bichi gala quie José ga zunë' yedyi nebaba Egipto. Na'ra gudyinë' lëbë'!

²⁰ —Uyasa, uži'lë xcuidi' len žna'bi!. Uleyozi lao yedyi nebaba Israel, porque aguti yaca ben' re'en guti xcuidi'.

²¹ Na'ra uyasa José uži'në' xcuidi' len žna'bi', ziolénë' lëbi' lao yedyi ga nebaba Israel. ²² Pero cati unezi José rnabë' Arquelao lao laza xuzinë' Herodes, na'ra bdzebinë' yeyonë' na!. Bdzebinë' como dan' aoxusanë' ta bitzionë' estado Judea. Quie lena' zionë' estado Galilea. ²³ Caora bdyinnë' na', na'ra zionë' tzesunë' yedyi Nazaret. Cana'ra bzu di'idza' quie ja profeta ca unajé' de quie ina ja benë' naca Jesús ben' yedyi Nazaret.

Udixogue' Juan bautista xti'idza'
Diuzi lao lato dachi ga bidyia yu'u
 (Mr. 1.1-8; Lc. 3.1-9, 15-17; Jn. 1.19-28)

3 Na'ra uyo Juan bautista yu nebabá Judea ga naca lato dachi. Uyonë' yetixogue'në' ja benë' xti'idza' Diuzi. **2** Na'ra në' rëbinë' lejë':

—Reya'ala' utza'le pensari quiele usanle ca tamala ruele, porque baruen bago dza inabë' Diuzi lao yedyi layu.

3 Quie Juan unë profeta Isaías caora unë:

Huazu ben' na' lao lato dachi ga bidyia yu'u.

Huanë' zidzo rëbinë' laguedyinë' caniga:

“Huele hueluba neza quiele cuenda huida ben' naca xa'nro, usalole tu neza li.”

4 Guco Juan la'ari' de guitza' quie zhaba camello. Na' tu cincho guidi bdze'në' lë'ënë'. Udaonë' bëchí'zu, hue'enë' bdyin'dao' quie bezu cera ta rdzela guixi' dao!. **5** Na' rio ja ben' Jerusalén renaljë' ruzenagajë' quiénë'. Lëzi rio ja ben' yedyi nebabá Judea len ja ben' nita' ga'ala' ga de yao Jordán. **6** Caora na' cati uxubalépijke' dula' xquia quiejë', na'ra bë' Juan laojë' lu'u yao Jordán.

7 Cati blë'ë Juan bdyin ja ben' partido fariseo len ja ben' partido saduceo za'jë' gan' ru'e Juan lao ja benë', na'ra në' rëbinë' lejë':

—¡Ca bëla rgui'idy! benë' nacale! ¿Nuži udixogue' le'e ta te ilale cabë' castigo quie Diuzi baza' ga'ala'zi? **8** Ulehue dya'a ta ulu'en nacan li aotza' pensari quiele, aruele quie

Diuzi. **9** Bihuele pensari bihue Diuzi le'e castigo por nun quie nacale ži'i suba Abraham. Porque rnia' le'e hasta yo huaca hue Diuzi ben' gaca ži'i Abraham. **10** Ca quie yebandyo baden listo para ichugon yaga ta birbia tažixi ta tzeina, cana' nacarëن quiele. Chi bihue quiele xti'idza' Diuzi ca rnëñë', huata' castigo quiele tziole lao gui' gabila. **11** Në'ëdi' tali ru'a lao benë' conlë nisa yela' gacajë' seña de que aotza' pensari quiejë' aruejë' quie Diuzi. Pero baza' tu ben' zaza'ra zenaö në'ëdi'. Lëbë' udze'në' Bichi Be quie Diuzi lu'u guicho laxta'o ja ben' rale quiénë'. Lëzi huenë' mandado tzei yaca ben' birale quiénë' lao gui' gabila. Nacarë' ben' že ca në'ëdi'. Tanto nacarë' ben' že ca nël'ëdi', ni siquiera biyeyazoga' cuioga' guidi yu'u ni'anë'. **12** Bazëñë' becue' ta ucha'anë' trigo len bëbi quién. Na'ra yezi'chi'në' trigo lu'u lidyin. Yeyudyin na' uezinë' bëbi quién lao gui' ta biyeyulacazi.

Bë' Juan lao Jesús

(Mr. 1.9-11; Lc. 3.21-22)

13 Na'ra uza' Jesús yu nebabá Galilea bdyinnë' ga de yao Jordán ga zu Juan cuenda hue' Juan laonë' lëbë'. **14** Na' bigu'un Juan hue'në' lao Jesús. Lena' unë' gudyinë' Jesús:

—Luë'la reya'ala' hue'lo' laohua!. ¿Na' como bazao' niga ta hua' laolo'?

15 Na'ra una Jesús rëbë' Juan:

—Reya'ala'cazi hue'lo' laohua', porque cana' re'ennan huero ta uzuro duže cabë' una Diuzi.

Na'ra guca Juan de acuerdo, bë'në' lao Jesús. **16** Na'ra beyudyi

bë' Juan lao Jesús, bero Jesús lu'u nisa. Caora na' laoyalote guibá blë'ë Jesús uyëzi Bichi Be quie Diuzi ca quie ga rézi paloma. Bdyinnë' ga zë Jesús. ¹⁷Na'ra unë Diuzi ga zuë' guibá unë':

—Lézi'lina' ni, nediyë'ëda'bí'.

Redaohueda' zua' gusto conlë lëbi'.

**Gu'un xan' taxi'ibi' iquixi Jesús
huenë' tamala**

(Mr. 1.12-13; Lc. 4.1-13)

4 Na'ra guca dza uquïë' Bichi
Be quie Diuzi Jesús lao lato
dachi ga bidyia yu'u. Na' lao lato na'
bdyinrë xan' taxi'ibi' gu'unna iquixi
Jesús huenë' tamala.

2 Légan' na' bega'n Jesús chopá
galo dza len chopá galo yela,
biudaohuë'. Bë' guca lao chopá galo
dza, na' uduenë'. ³Na'ra ubiga' xan'
taxi'ibi' gan' zë Jesús rëbina lënë':

—Chi naco' zil'i Diuzi, bë mandado
iyaca yo nigá yëta xtila.

4 Na'ra una Jesús rëbinë' taxi'ibi':
—Lé'ë guichi la'iya quie Diuzi
nan ca nigá: "Quele tuzi yela' huao
gaoro yezi'ro fuerza, den' lëscan'
ruen dyiabë' hue quiero ca na Diuzi
ta yezi'ro fuerza."

5 Na'ra uquïë' taxi'ibi' Jesús lao
yedyi la'iya Jerusalén. Na'ra pcuëna
lënë' guicho idao' rnabë'ra. ⁶Na'
rëbinan lënë':

—Chi tali naco' zil'i Diuzi, uquino
cuinlo' guicho idao!. Bibi zil'
gaquelo', como dan' na guichi la'iya
que Diuzi ca nigá:

Ise'ela' Diuzi yaca ángel quiene'
ta gapajë' luë'.

Huidajë' idehuia ina'jë' luë'
cuenda ni lë'ëti' bigaco' zil'
chan' na' ga re' yo.

7 Na'ra una Jesús gudyinë' xan'
taxi'ibi':

—Lézi narë lë'ë guichi la'iya quie
Diuzi: "Bihuenële Diuzi bizinaquezi
chi uzunë' di'idza' cabë' unë', chi
biuzunë' di'idza' cabë' unë'."

8 Tatula uquïë'cazi taxi'ibi' lënë'
lao ya'a sibi gula. Blu'enan lënë'
duzete yedyi de lao yedyi layu.
Blu'enan lënë' cabë' naca yela' že
quien. ⁹Na'ra una xan' taxi'ibi'
rëbin lënë':

—Dužeten guna' quio' chi quitzo'
zibö' tzionla'adyo' nël'ëdi'.

10 Cana'ra una Jesús rëbinë' lënán:
—Beyo, Satanás, porque lë'ë
guichi la'iya quie Diuzi nan caniga:
"Tzionla'adyi'ro tuzi Diuzi quiero.
Tuzi lëbë' huero ca mandado ruenë'
quiero."

11 Na'ra zeyo taxi'ibi' gan' zë Jesús.
Na' laza'te ja ángel, gucalëjë' lëbë'
ta yezi'në' fuerza.

**Uzulao Jesús ruenë' dyin quie Diuzi
estado Galilea**

(Mr. 1.14-15; Lc. 4.14-15)

12 Cati unezi Jesús de Juan lu'u
dyiguiba, bebi'në' zeyoguë' yu
nebabá Galilea. ¹³Pero bibega'nnë'
yedyi Nazaret, uyoguë' yesunë'
yedyi lao Capernaum ga re' ru'a
lagun ga naca beza' quie yu nebabá
Zabulón len yu nebabá Neftalí.

14 Cana' guca ta bzu di'idza' quie
Diuzi bzu profeta Isaías lë'ë guichi
tiempote. Cani rnëñ:

15 Lao yu nebabá Zabulón len yu
nebabá Neftalí, ga de neza
zion ru'a lagun itzala' yao
Jordán, ga re' yu nebabá
Galilea, lao yu na' nita' ben'
binaca ben' Israel.

- 16** Lëja ben' na' rdajë' lao lato lao chula, pero aose'ela' Diuzi ben' gacalë lëjë' cabë' racalë xni' gui' lëjë' ta ilë'ëjë' ga naca chula.
 Lëja ben' na' rdajë' lao lato lao chula, pero use'ela' Diuzi ben' gacalë lëjë' cabë' racalë xni' gui' lëjë' ta ilë'ëjë' ga naca chula.
- 17** Caora na' uzulao Jesús udixogue'në' benë' xti'idza' Diuzi unë':
 —Reya'ala' utza'le pensari quiele, porque baruen bago dza inabë' Diuzi lao yedyi layu.

Blidza Jesús tapa ben' rze bela
(Mr. 1.16-20; Lc. 5.1-11)

- 18** Zio Jesús yu'unë' neza zaca' ru'a lagun Galilea. Na' blë'enë' chopá ben' rze bela. Tunë' laonë' Simón, ben' laorë Pedro. Na' itunë' laonë' Andrés. Naca Andrés bichi Simón. Na' yu'ujë' rulëtojë' yëxo lu'u nisa.
19 Na'ra una Jesús gudyinë' leyaquë':
 —Ulenao në'ëdi'. Cabë' ruele cuiole bela yu'u lu'u nisa, cana' ulu'ena' le'e cuiole ben' nao xneza Diuzi.

20 Laohue na'tezi lapsantejë' yëxo quiejë' ziolëjë' Jesús.

21 Lë'ëti'zi ude Jesús zioguë' mazara cati blë'enë' ichopa ja benë' naca bichë'. Tunë' laonë' Santiago, itunë' laonë' Juan. Nacayaquél' ū'i Zebedeo. Yu'ujë' lao barco len xuzijë' ruda'jë' yëxo quiejë'. Na'ra blidza Jesús lëjë' ta unaojë' lëbë'. **22** Na'ra lapsanrëtejë' barco len xuzijë' ziolëjë' Jesús.

Bzioñe'e Jesús ben' zë
(Lc. 6.17-19)

23 Zio Jesús Yugulu yedyi nebaba Galilea. Ruzioñe'enë' benë' lu'u

idao' quiejë' laonan sinagoga tu tu yedyi ga rdenë'. Udxogue' Jesús ca naca tahuen quie xti'idza' Diuzi baruen bagozi dza inabë' Diuzi yedyi layu. Lëscan' beyue Jesús yugulu cue' yela' hue' yu'u ja benë'. **24** Nezijë' quie Jesús yugulu ben' nita' yedyi nebaba Siria. Na' uquië'jë' yaca ben' redzagalaoja bitezi yela' hue', len ben' yu'u ja taxi'ibi', len ben' raca žuguti, len ben' naži. Na'ra beyue Jesús lëjë'. **25** Zë ja ben' unao Jesús. Unao ben' yedyi nebaba Galilea, len ben' yedyi nebaba Decápolis, len ben' ciudad Jerusalén, len ben' yedyi nebaba Judea, len ben' nita' yedyi re' itzala' yao Jordán. Tu cana' ja yedyi udaojë' lënë'.

Zu Jesús tu lao ya'a ruzioñe'enë' benë'

5 Cati blë'ë Jesús babegu'udi' ben' zë, na'ra urënë' tu lao ya'a ure'në'. Na'ra beyécho ja ben' quiénë' lënë'. **2** Cana' uzulao Jesús ruzioñe'enë' lëjë'.

**Ni rnëñ quie nu ja ben' huaca huen
 quie lao Diuzi**
(Lc. 6.20-23)

Na' una Jesús:

3 —Yedaohue nu yaca ben' raca yéchi' ca naca dula' xquia quie, dan' naque quiejë' ga rnabë' Diuzi.

4 Yedaohue nu yaca ben' raque bayéchi' quie dula' xquia ta raca lao yedyi layu, dan' yeuyézela'adyi' Diuzi lëjë'.

5 Yedaohue nu yaca ben' gaxo, dan' gaque quieyáquë' layu gan' una Diuzi hue'në' lëjë'.

6 Yedaohue nu yaca ben' re'en inao xneza Diuzi cabë' re'en

gao yo'o nu ben' rdue rbili, dan'
Diuzicazi gacalënë' lëjë' ta
inaoyaquë' xnezë'.

⁷'Yedaohue nu yaca ben'
reyëchi'l'a'adyi' ben' tula, dan'
yeyëchi'l'a'adyi' Diuzi lëjë'.

⁸'Yedaohue nu yaca ben' anaca
yëri laxta'ohue, dan' hualë'ëyaquë'
Diuzi.

⁹'Yedaohue nu yaca ben' rue
dyiabë' cue' chizi laxta'o benë', dan'
huëbi Diuzi leyaquë': "Žil'ina' le'e."

¹⁰'Yedaohue nu yaca ben'
racatzegue tamala quie por nun
quie ruejë' ca re'en Diuzi, dan'
naque quiejë' ga rnabë' Diuzi.

¹¹'Yedaohuele le'e cati inaya' benë'
le'e huenëjë' le'e bizinaquezi, si'jë'
le'e yël, inëjë' quie por nun quie
naole xneza'. ¹²Yedaohuele sole
gusto como dan' huata' tu tahuén
gula quie gun Diuzi le'e guibá.
Yaca ben' profeta, ben' use'ela'Diuzi,
bizinaquezi psaca'rë ja benë' lëjë'
dza tiempote tu binenita'le.

Ca quie zedi', ca quie gui', naca ben' nao xneza Jesús

(Mr. 9.50; Lc. 14.34-35)

Na' una Jesús:

¹³—Ca quie nu zedi' naca quie. Pero chan' na' abeyula zedi', ñbiži
huero ta huen dyin tatula? Bira
gue'ennan huenan dyin. Anakan zi
ta chu'unron ta utzutzu ulio benë'
len.

¹⁴'Ca quie nu gui' ta ilë'ë benë' ga
naca chula, cana' naca quie. Tu
yedyi re' lao ya'a, bigaca igüi'onan
ta biilë'eron. ¹⁵Nunu rusë gui'
candil uzulen ta iseni'na lu'u cajón.
Reya'ala' uzëron tu lu'u yu'u ga
naca sibi cuenda ilë'ë ja yugulu

ben' yu'u lu'u yu'u. ¹⁶Cana' naca
quiele, reya'ala' tale dyë'ëdi lao ja
benë' tacuenda ilë'ëjë' ruele tadya'a
ca re'en Diuzi huele. Cana' hue ja
benë', huejë' ben' že Xuziro Diuzi,
ben' zu guibá.

Udixogue' Jesús cabë' naca lao ley
Na' una Jesús:

¹⁷—Bigaquele chi za'a chul'una'
ley quie Diuzi ta bë'në' Moisés.
Quele za'a chul'una' cabë' ta una
ja profeta, dechan' za'a ta uzua'
di'idza' cabë' bzujë' lë'ë guichi
la'iya quie Diuzi. ¹⁸Tali ca rnia'
le'e, tu lala nede guibá len yedyi
layu, ni lë'ëti' ta rna lao ley biten
cana'zi. Uzu di'idza' quien yugulute
ca rnan. ¹⁹Quie lena' nu ben' birue
bala ruzu di'idza' ca mandado rue
lë'ë guichi la'iya quie Diuzi, lëscan'
rusëdijë' ben' tula ta bihuejë' bala
ca mandado ruen, nacajë' ben'
latoquiëzi ga rnabë' Diuzi guibá.
Pero nu ben' rue bala ruzu di'idza'
ca mandado rue lë'ë guichi la'iya
quie Diuzi, lëscan' rusëdijë' ben'
tula ta huejë' bala ca mandado ruen,
nacajë' ben' bala'ana ga rnabë'
Diuzi guibá. ²⁰Porque rnia' le'e, chi
bihue quie quie Diuzi dya'ara,
quele cabë' rue ja ben' rusëdi ley
quie Moisés len ja ben' partido
fariseo, bisaque' yebole ga rnabë'
Diuzi guibá.

Una Jesús quie yela' rdza' (Lc. 12.57-59)

Na' una Jesús:

²¹—Banezile ca gudyi Moisés
xuzixta'oro: "Bireya'ala' gutile
benë'. Nutezi ben' ruti benë',
reya'ala' ichugobë'le quië'." ²²Pero

në'ëdi' rnia' le'e, nutezi ben' idza' bichi laguedyi, huachugobë' Diuzi quië! Lëscan' nutezi ben' inaya' bichi laguedyi, huarugobë' quië' ga reyudyi yela' rnabë!. Lëscan' nutezi ben' idza' bichi laguedyi yëbinë' lëjë!: "Ben' raca loco luë!" žudyizi ruen quienë! tzionë! lao gui' gabilia.

23'Chi zio' nu'aloi' gun quio' ru'aba lu'u idao', na' yeza'la'adyo' de ta de quie bichi laguedyo' conlë luë!, **24**na'ra pca'n gun quio' lao ru'aba na'zi, zatziolo' tzeguë'žela'adyo' bichi laguedyo!. Na'tera yebi'lo' hue'lo' gun quio' lao ru'aba.

25'Chi nu ben' rao xquia le'e, iquië'jë! le'e lao juzgado, tu neziole tu neza, bë'lë di'idza' bichi laguedyile, a ver nacala yega'nle yela' bitziole lao juez. Porque si no, hue juez mandado policía quië!, udze'jë! le'e lu'u dyiguiba. **26**Di'idza' li rnia' le'e, biyerole lu'u dyiguiba hasta que udyiale dumi ca ta inaba juez le'e.

Una Jesús quie ben' rdalë nigula tula, ben' binaca žgule

Na' una Jesús:

27—Banezile cabë' una xuzixta'oro Moisés cana'te: "Bireya'ala' taléle nigula tula." **28**Pero në'ëdi' rnia' le'e, nutezi ben' rebane ja nigula re'ennë' bi huenë! lënë! nigula, na' lu'u guicho laxta'ohuë' nacan ca quie bagusilëcazinë! lënë!.

29'Pues ugunro chi tu laolo' yebë ruhua'n luë! dula' xquia, reya'ala' cuiolo'n chu'unlo'n zitù', como dan' dya'alan' initi tu laolo', quele ca ta tzio' dužetio' lao gui' gabilia. **30**Lëzi ugunro chi na'alo' yebë ruhua'n

luë! dula' xquia, reya'ala' ichugo'n uru'unnan, como dan' dya'alan' initi tu na'alo' quele ca ta tzio dužetio' lao gui' gabilia.

Una Jesús quie ben' rusan ja nigula quie

(Mt. 19.9; Mr. 10.11-12; Lc. 16.18)

Na' una Jesús:

31—Lëscan' una xuzixta'oro Moisés dza na'te: "Nutezi ben' re'en usan nigula quie, reya'ala' ichisanë' guichi ga ru'en di'idza' bira re'ennë' sulënë! nigula. Reya'ala' hue'në! n nigula quienë!, na'tera huazaquë! usannë! nigula quienë!." **32**Pero në'ëdi' rnia' le'e, chi nu ben' rsan žgulë, na' bezi' žgulë! be'mbyu tula, nacan xquia quie nigula na' lao Diuzi. Solamente chan' udalë žgulë! be'mbyu tula, cana'ra huazaque' usan be'mbyu na' žgulë!. Lëscan' nutezi ben' bezi' nigula psan xquiuhue, nacan xquia quienë! lao Diuzi.

Bireya'ala' ugunro Diuzi ca cuendazi

Na' una Jesús:

33—Lëscan' banezile ca una xuzixta'oro: "Reya'ala' uzulo' di'idza' cabë' uno! huelo' bguntio' Diuzi." **34**Pero në'ëdi' rnia' le'e, bireya'ala' ugunle Diuzi ca cuendazi. Biugunle nu guibá, porque dan' ga re' Diuzi rnabë'në!. **35**Cana'rë biugunrèle nu yedyi layu, porque dan' ga ruzu ni'a Diuzi. Biugunrèle ciudad Jerusalén, porque dan' ciudad quie Diuzi.

36Lëzi biugunrèle guichole, porque quele huacale utza'le gacan bezéri gaso ni tu guitzá' guichole. **37**Tuzi iquébile inale tali. Chi inéro ugunro

Diuzi ca cuendazi, quie taxi'ibi' za'n dan' rnëro cana'!

**Una Jesús quie ben' yeyue laohue
quie laguedyijë'**

(Lc. 6.29-30)

Na' una Jesús:

³⁸—Lëscan' banezile cabë' una xuzixta'oro Moisés dza na'te: "Chi nu ben' bdyiagui'në' tu laolo', o tu leilo', o bi ta de quio', napo' derecho udyiagui'lo' tu laohuë', o tu leiyë', o bi ta de quië' tacuenda iyaca laohue quië'." ³⁹Pero në'ëdi' rnia' le'e: Biyeyuele laohue quie ja ben' rue mala quiele. Chi nu ben' aodapa xago', bë'le lato capë' itzala' xago'. ⁴⁰Chi nu ben' hueja cuenda luë' lao ja ben' rnabë' ta si'në' camisa quio', bë'rënë' len chamarra quio'. ⁴¹Chi nu ben' ruegadyi luë' hua'alo' yua' quiénë' tu legua, bi'alan chopá legua. ⁴²Chi nu ben' rnabayëchi' luë' bi cosa, bë'në'n. Chi nu ben' rnaba presta bi ta de quio', bihuelo' zidi, bë'në'n ta rnabë'.

Una Jesús quie yaca ben' rudie ra'o

(Lc. 6.27-28, 32-36)

Na' una Jesús:

⁴³—Lëscan' banezile ca una xuzixta'oro dza na'te: "Edyë'ële amigo quiele, udiele ben' rudie le'e." ⁴⁴Pero në'ëdi' rnia' le'e: Edyë'ëlale ben' rudieja le'e. Inabale tahuen lao Diuzi quie ja ben' rudze'de' le'e. Huele dya'a quie ja ben' rudie le'e. Ulehue'lë Diuzi di'idza' inabale tahuen quie ja ben' rnaya' dilalë le'e. ⁴⁵Cana' gacale dugalo ū'i Xuziro Diuzi zu guibá. Cana' rue Diuzi lénë' obidza quië!. Useni'nan

dužete yedyi layu ga nita' ja ben' mala len ja ben' huen. Na' rse'ela'rë' nisa yo quië' lao ja benë', la'acazi ben' rue tadya'a, la'acazi ben' rue tamala. ⁴⁶Chi rapachi'le tuzi ben' rapachi' le'e, biugunle rlë'ë Diuzi le'e ben' laxta'o yëri por nun quie ruele cana!. Porque cana' ruerë hasta ben' malaja, ben' binao xneza Diuzi. ⁴⁷Chi rda rnélèle tuzi ja ben' nubë'zile, biugunle tadya'a gula ruele. Porque hasta ben' binuebë' Diuzi ruerëjë' cana!. ⁴⁸Reya'ala' gacale ben' laxta'o yëri cabë' naca Xuziro Diuzi zu guibá ben' laxta'o yëri.

**Bzioñe'e Jesús ra'o cabë'
re'ennë' huero**

6 Na' una Jesús:

—Reya'ala' huele cabë' re'en Diuzi huele du guicho du la'adyi'le, pero bihuelen tacuendazi ta ilë'ë benë' le'e nacale ben' huen. Chi huelsen tacuendazi ta ilë'ë benë' le'e nacale ben' huen, bigata' quiele ta gun Xuziro Diuzi le'e ga rnabë' guibá. ²Lena' cati gacaléle ben' rdziogue bi cosa, biulu'etele ladza inale cani bia' cabë' rue ja ben' rionla'adyi' Diuzi de ladzazi caora riojë' lu'u idao', caora rdajë' tu neza. Cana' ruejë' tacuenda inë benë' quiejë' dya'a. Pero tali ca rnia', tana'zi de babëjë' gan, bibira de hue' Diuzi lëjë' ga rnabë' guibá. ³Pero le'e cati gacaléle ben' rdziogue bi cosa, biulu'etele ladza yela' binezi ja benë' chi bi ruele, ba'ala'cazi ben' naca bichile. ⁴Dya'alan' gacaléle benë' balarazi. Na' Xuziro Diuzi rlë'ënë' cabë' tadya'a ruele balarazi, lénë' gunnë' quiele ga rnabë' guibá.

Bzioñe'e Jesús ra'o cabë' reya'ala' huero hue'léro Diuzi di'idza'
(Lc. 11.2-4)

Na' una Jesús:

5—Cati hue'lélé Diuzi di'idza', bihuele ca rue ja ben' rionla'adyi' Diuzi de ladzazi. Lega raxejë' hue'léjë' Diuzi di'idza' zétela lu'u idao!. Cana' ruejë' con ga ziojë' zaca'lao ja benë!. Pero tali ca rnia', tana'zi de babëjë' gan!. Bibira de hue' Diuzi lëjë' ga rnabë' guibá.
6 Pero cati hue'lélé Diuzi di'idza', reya'ala' ucui'ole tu tule tu ga negachi!. Tuzile conlë Xuziro Diuzi hue'lélenë' di'idza!. Na' Xuziro Diuzi rlë'enë' cabë' tadya'a ruele balarazi, lénë' gunnë' quiele ga rnabë' guibá.

7 Cati hue'lélé Diuzi di'idza', biinale di'idza' ladzazi, bihuele zétela di'idza' cabë' rue ben' binuebë' Diuzi. Ruejë' pensari chi uzënaga Diuzi quiejë' nun quie dan' ru'eléjë' Diuzi di'idza' zétela.
8 Bihuele cabë' rue lëjë', porque dan' Xuziro Diuzi banezinë' bidan' rdzioguele cati zainabale laohüe!.
9 Lena' reya'ala' hue'lélé Diuzi di'idza' cani:

Xuzindo' Diuzi zulo' guibá, naca la'iya laolo'.

10 Rbezando' guida dza inabë'lo' lao yedyi layu cabë' rnabë'lo' guibá ga zulo!.

11 Guno' ta gaondo' quie na'adza cabë' ta rdzioguento!.

12 Bezi'ze quiendo' cabë' tamala babëndo' cabë' rezi'zendo' tamala bë ja benë' len nëto!.

13 Gacalao' nëto' ta biiguinondo' lao tamala, ucuasa ucui'olo' tamala za' gaca quiendo!.

Porque tuzo' luë' naco' ga zelaozi yela' rnabë' quio', ga zelaozi yela' huaca quio', ga zelaozi yela' ūe quio' tuzioli. Amén.

14'Cana' rnina' le'e porque chi le'e rzi'zele quie ja ben' rueja tamala quiele, lëscana' huazi'zerë Xuziro Diuzi zu guibá quiele. **15** Pero chi bisi'zele quie laguedyile, bisi'zerë Xuziro Diuzi dula' xquia quiele.

Bzioñe'e Jesús ra'o cabë' reya'ala' huero ubasi

Na' una Jesús:

16—Cati huele ubasi, bihuenëlaole bayëchi' cabë' rue ben' rionla'adyi' Diuzi de ladzazi. Lëjë' ruzutelaojë' bayëchi' tacuenda ilë'ë ja benë' ruejë' ubasi. Pero tali ca rnia', tana'zi de babëjë' gan, bibira hue' Diuzi lëjë!. **17** Pero le'e cati huele ubasi, ulequibi laole, ulequin guichole dya'a. **18** Cana' huele tacuenda bigacobë' ja benë' de que ruele ubasi. Tuzi Xuziro Diuzi zulënë' le'e, gunnë' tadya'a gula quiele guibá ga rnabë'në!.

Udixogue' Jesús quie lao yela' uña'a

(Lc. 12.33-34)

Na' una Jesús:

19—Bireya'ala' uzule guichole huele cuinle ben' uña'a lao yedyi layu ga reyulazin, ga rbiagui'zin, ga rban benë' len. **20** Reya'ala' uzule guichole huele quie Diuzi tacuenda utupale yela' uña'a quiele guibá ga bireyulazin, ga birbiagui'zin, ga bisaque' cuan benë' len. Chi huelo cana', nacale ca quie yela' uña'a lao Diuzi. **21** Pues ga rutupa ja benë' yela' uña'a quiejë!, chi lao yedyi

layu, chi guibá, lena' ulu'en ca bi pensari raquejë!, chi quie cuinzijë!, chi quie Diuzi.

Una Jesús queie pensari yani' quiero

(Lc. 11.34-36)

Na' una Jesús:

22—Chi ru'ele lato raca guicho laxta'ole pensari dya'a, cana' sí, ruele tadya'a, neyani' pensari quiele rlë'ële racalële benë!. **23**Pero chi ru'ele lato zu guicho laxta'ole yela' žë!, cana' sí, huele tamala, nechula pensari quiele, birlë'ële gacalële benë!. Chi lao laza yu'ule pensari dya'a, na' ru'ele lato su guicho laxta'ole yela' žë!, lena' naca mala gula quiele, nechulatzegue pensari quiele.

Ni rnën cabë' naca queie Diuzi len dumí

(Lc. 16.13)

Na' una Jesús:

24—Nitu nunu saque' uzu chopaxa'ne, porque dan' udienë! tunë!, na' itunë! idyé'ënë!, uzunë! di'idza' quie tunë!, na' quie itunë! biuzunë! di'idza!. Cana' naca quiero len Diuzi. Chi nuzu guichoro rza'la'adyi'ro dumí, bisaque' uzuro guichoro Diuzi.

Diuzi gunnë! yugulute ta rdzioguero

(Lc. 12.22-31)

Na' una Jesús:

25—Rnia' le'e, bidëbile quie ta yo'ole, quie ta gaole, quie ta tebanle, ni quie žaba quiele ta gacole. ¿Quele zaca'ra yela' neban quiero quele ca ta gaoro? ¿Quele zaca'ra cuinro quele ca žaba quiero? **26**Ulena'cara cabë' rue ja

bguini rdajaba' ladza. Birazajaba', birezi'jaba' usecho udze'tza'ojaba' gaojaba', nechan' Xuziro Diuzi zu guibá rugaonë'jaba!. ¿Binezile zaca'ra le'e quele ca léjaba'?

27¿Nuži ca le'e huaca huezu huele cuinle igatzo metro yela' huego' nun quie rdébile quie ta rdzioguele?

28¿Bixquien' rdébile nacala gaca idzela žaba quiele? Ulena'cara cabë' re'eni ja yo guixi!. Biruejan dyin, biruejan la'ari' ta gaca žabajan. **29**Nechan' rnia' le'e, ni rey Salomón, ba'ala'cazi guquë! ben' uña'a gula, bibdyinnë! sutza'ohuë! cabë! zutza'o ja yo guixi! badan gula. **30**Ulena' cabë' rugaco Diuzi žaba guixi! badanzi ta de na'adza, ba'ala'cazi du uxezi uzei benë! len, ¿biži binezile ruetera Diuzi tadya'a quiele quele ca nu ja yo guixi'? Le'e rdzioguele sudyi'iléle Diuzi dyë'ëdi. **31**Lena' bireya'ala' idëbile inale: “¿Ga za' ta gao ta yo'oro? ¿Ga za' žaba quiero?” **32**Le'e bireya'ala' huele cana', porque dan' can' rue ja ben' binuebë! Diuzi. Rdëbijë! rdajë! quilojë! ga idzelejë! ta gaojë! len ta yo'ojë!. Pero cabë! le'e, zu Xuzile ben' zu guibá, nezinë! yugulute bidan' rdzioguele.

33Huele lato inabë! Diuzi le'e, huele ta yu'u ni'a xnezi quie Diuzi ca raxenë!. Na'tera gunnë! yugulute ta rdzioguele.

34Bidëbile chi bi tazëdi za' quiele du uxe du huidzo, porque durpende chan' du uxezi za're cuëchilile gacan reglo. Tu dza tu dza rdébile quien, huele pensari bi gaca ta cue'lina.

Bireya'ala' inëro queie laguedyiro

(Lc. 6.37-38, 41-42)

7 Na' una Jesús:

—Bireya'ala' inële quie laguedyile, yela' biinë Diuzi

quiele ca ruele. ²Con cabë' rlë'ële laguedyile, chi ben' huen, chi ben' mala, cana'rë ilë'ë Diuzi le'e. Con cabë' inële quie laguedyile, cana'rë inë Diuzi quiele ca ruele. ³¿Cómo nezile yegunni'ale bigazi tadao' mala rue benë', na' binezile yegunni'ale ca tamala gulatera ruele cuinle? ⁴¿Cómo yëbile laguedyile: "Bencara lato cuioga' bëbi dao' yu'u laolo!", na' birnao' cuinlo' bichu yaga yu'u laolo'? ⁵Le'e ben' rnë di'idza' ladzazi, zaolio bichu yaga yu'u laolo', na'tera ilë'ëlo' yebiolo' bëbi dao' yu'u lao laguedyile.

⁶Bireya'ala' hue'le ja beco' ta naca la'iya quie Diuzi, porque biži chan' lalëziba' yegui'imba' le'e. Lëscan' bireya'ala' chu'unle ta naca tatzao' quie Diuzi lao ja cuchi, porque bizi chan' utzutzu ulioba'n.

Ni nan cabë' reya'ala' huelero Diuzi

(Lc. 11.9-13; 6.31)

Na' una Jesús:

⁷—Chi inabaro Diuzi bi cosa, gunnë'n. Chi rguiloro ta naca tali quie Diuzi, huadzeleron. Chi ulidzaronë', huequëbinë' quiero. ⁸Cana' rnia' le'e, porque nu ben' rnaba lao Diuzi bi cosa, hue'në'n lënë'. Lëscan' nu ben' rguilo ta naca tali quie Diuzi, huadzelenë'n. Nu ben' rulidza Diuzi, huequëbinë' quiénë!. ⁹¿Nuži le'e rna'le hue'le yola ū'ilie lao laza ta rnababi' pan? ¹⁰¿Nuži le'e rna'le hue'le bëlala ū'ilie lao laza ta rnababi' bela? ¹¹Chi le'e nacale ben' ū'ë, pero nezile hue'le tahuen ū'ilie, ibižira Xuziro Diuzi zu guibá neziterë' hue'në' tahuen ben' rnaba len laohuë'!

¹²'Cabë' re'enle huelële laguedyile le'e, cana' reya'ala' huerële len laguedyile. Cana' ruen mandado quiele huele lë'ë guichi ley pca'n Diuzi lao na'a Moisés len guichi bë ja ben' udixogue' xti'ídza' Diuzi tiempote.

Quie lao chopá neza udixogue' Jesús

(Lc. 13.24)

Na' una Jesús:

¹³—Taguizi naca ru'a yu'u quie guibá. Léru'a yu'u na' reya'ala' tzu'ule. Tažera naca ru'a yu'u quie gabilia. Lëscan' tala'aga'ra nacarë neza quién. Ben' zë gulara reyu'ujë' ru'a yu'u na', reziljë' neza na'la.

¹⁴Pero taguizi naca ru'a yu'u quie guibá. Lëscan' taguizi nacarë neza quién. Lë'ëti'lzija naca ja ben' ruzuja di'idza' quia' cabë' rnia!. Lëzijë' redzelejë' neza zeyo guibá.

Cabë' rue benë', cana' yezaquero ca nacayaquë'

(Lc. 6.43-44)

Na' una Jesús:

¹⁵—Gapale cuidado quie ja ben' huizi' yë', ben' rnaja quie Diuzi rnëjë'. Nacajë' ben' za'zija ruejë' gaxo gula cabë' rue beco' ū'ilä!. Pero bë' ruezijë', dechan' lu'u laxta'olajë' yu'u yela' snia quiejë', ruejë' ca rue coyote.

¹⁶Huezuyaquele cabë' ruejë' chi balejë' nacajë' ben' quie Diuzi. Bicuia bedzuli' lao luba yëchi!. Lëscan' bicuia higo lao yaga yëchi!. Lécana' rue ja ben' binaca ja ben' quie Diuzi. Birlë'ëro huejë' tadya'a cabë' rue Diuzi. ¹⁷Yugulu yaga huen rbian tažixi naca dya'a, pero nu yaga median, birbian tadya'a. ¹⁸Tu

yaga huen bisaque' cuian tažixi binaca dya'a. Lëzi tu yaga median bisaque' cuian tažixi naca dya'a.
19 Yugulu yaga birbia ta gaoro ichuguron ibidyin uzeiron. **20** Na'rana' le'e, según cabë' ruejë', cana' yezaquele cabë' nacajë', chi nacajë' cabë' quie tu yaga huen, o chi nacajë' cabë' quie tu yaga median.

Quele yugo ja benë' yeyojë' guibá

(Lc. 13.25-27)

Na' una Jesús:

21—Quele yugu ja ben' na në'ëdi': “Señor, Señor”, yeyojë' guibá ga rnabë' Diuzi, dechan' yaca ben' ruzu di'idza' quie Xuza', ben' zu guibá, lëzijë' yeyojë' guibá. **22** Cati idyin dza hue Diuzi juicio, cana' ina ben' zë në'ëdi': “Señor, Señor, laolo' bzötundo' udixogue'ndo' benë' xti'lidzo!. Lëscana' bzötundo' laolo' uliondo' taxi'ibi' yu'u ja benë!. Lëscan' bzötundo' laolo' bëndo' tazë yela' huaca quio!.” **23** Pero cana'ra yëpa'jë!: “Binubë'cazida' le'e. Ulebiga' tzala'la, le'e ben' bë ja tamala.”

Pxi'idze' Jesús quie chopa ben' bë yu'u

(Lc. 6.47-49; Mr. 1.22)

Na' una Jesús:

24—Cani nacan quie yaca ben' ruzénaga ruzu di'idza' quia!. Naca quienë' ca quie tu ben' rioñe'e, ben' bë yu'u quie tu lao lachi' ga re'rara yu. **25** Na'rana ben nisa yosiu', uyala yao, ben be bedun', pero bibyalan, porque re'n tu lao lachi' ga naca yu huala. **26** Pero ben' ruzénaga, na' birue quienë' ca rnia', naca quienë' ca quie tu ben' tondo, ben' bë yu'u

quie tu lao yu yolo, yu bire'ra. **27** Bë' ben nisa yosiu', bë' uyala yao, bë' ben be bedun', na'ra byala yu'u. Tu casion že gula guca quië'.

28 Cati beyudyi unë Jesús, rebane ja ben' zë nita'ja na' cabë' ruë' rusëdië!. **29** Porque rusëdinë' lëjë' ca quie ben' de yela' rnabë' quie, quele cabë' rusëdi ja ben' rusëdi ley pca'n Diuzi lao na'a Moisés dza na'te.

Beyue Jesús tu ben' raca yela' hue' ca pindo

(Mr. 1.40-45; Lc. 5.12-16)

8 Cati beyëzi Jesús lao ya'a, ben' zë beyao lënë!. **2** Caora na' laobiga'te ga'ala' tu ben' raca yela' hue' ta ruzudzo' cuerpo quienë!. Laoditzute žibë' lao Jesús rëbinë' lënë':

—Señor, chi gue'enlo', huu' cule yeyuelo' yela' hue' raca!.

3 Na'rana udan Jesús na'anë' lënë' rëbinë' lënë':

—Hue'enda' iyaco' yëri.

Cana'zi ta una Jesús, labeyacate yela' hue' racanë!. **4** Na'rana una Jesús rëbinë' lënë':

—Ni tu ganu quixogue'lo' bi guca beyaco!. Tu uyotezi cuinzo' lao pxuzi. Na' hue'lo' gun quie Diuzi cabë' mandado bë Moisés yela' inezi ja benë' abeyaco' yela' hue' raco'.

Beyue Jesús tu mozo quie tu capitán ben' romano

(Lc. 7.1-10)

5 Na'rana zio Jesús ciudad Capernaum. Lëzi laoyote tu ben' naca capitán quie ja soldado quie ciudad Roma ga zë Jesús. Caora na' unabayëchi'në! **6** rëbinë' Jesús:

—Señor, de tu mozo quia' raca žhue'bíl' žan yu'u. Nescobi', redzagalaolébi'n, rlatzeguen.

⁷ Na'ra rëbi Jesús lënë!:

—Uletza'! yeyu'abi!.

⁸ Na'ra rëbi capitán lënë!:

—Señor, binaca' zi ta huelo'në! že guidatiu' žan yu'u quia!. Tu bë'zi di'idza', bë mandado yeyaca mozo quia!. Nezda' huazaque' huelo' tu mandadozi inao!, ⁹ porque lëzi cana' naca quia!. Zu xa'na', ben' belao rnabë'në! në'ëdi!. Lëscana' naparia' soldado ben' rnabi'a. Cati rëpa' tujë!: "Tzio' niga", huayonë!. Cati rëpa' itunë!: "Uda", huidë!. Cati rëpa' mozo quia' bi ta huebi', ruebi'n. Cana' nacarë quio!.

¹⁰ Cati be Jesús cabë! una capitán rëbinë! lënë!, tu rebanezinë! rëbinë! ja ben' zenaoya lënë!:

—Tali rnia' le'e, lao yugu ja ben' Israel, binedila' ni tujë! ben' rioñe'e cabë! rioñe'e ben' niga. ¹¹ Rnia' le'e, ben' zë, ben' binaca ben' Israel, yedyinjë! gatezi parte yedyi layu cue'lëjë! tuže len xuzixta'oro Abraham, len xuzixta'oro Isaac, len xuzixta'oro Jacob ta gaolëjë! lëjë! guibá ga rnabë! Diuzi. ¹² Pero zë ben' Israel, ben' reya'ala' yejoja guibá ga zu Diuzi, naca quiejë! tzegu'unjë! lao lato lao chula ga cuedyijë! zi'laza gula, ga gaojë! leijë!.

¹³ Na'ra rëbi Jesús capitán na!:

—Beyo žan yu'u quio!. Huacacazi cabë! ažela'adyo!.

Caora na'tezi labeyacate mozo quië!.

Beyue Jesús ben' gula quie Pedro

(Mr. 1.29-31; Lc. 4.38-39)

¹⁴ Na'ra uyo Jesús žan yu'u quie Pedro. Na' blë'énë! žna' nigula

quie Pedro denë! žla, raca žhue'në!.

¹⁵ Na'ra caora uže Jesús në'ë!, labedubaten. Na'ra labeyasatë' uzulaohuë! ru'enë! laze ta gaojë!.

Beyue Jesús ben' zë, ben' raca žhue'

(Mr. 1.32-34; Lc. 4.40-41)

¹⁶ Cati aochula, uquië'jë! lao Jesús ben' zëja raca žhue!, ben' yu'uja bichi be quie taxi'ibi!. Con tu la'anazi di'idza' rebioguë! tzala'la taxi'ibi' yu'ujë!. Cana' beyuerënë! yuguja ben' raca žhue!. ¹⁷ Cana' bzun di'idza' cabë! una profeta Isaías caora unë! cani: "Lëbë! begubë! yela' tzen quiero, beyuenë! yela' hue' quiero."

Ni rnan quie ja ben' nao Jesús

(Lc. 9.57-62)

¹⁸ Cati blë'ë Jesús ben' zë baneyécholënë!, bënë! mandado udelënë! ja ben' quiénë! itzala'la lagun. ¹⁹ Na'ra bdyin tu maestro, ben' rusëdi ley quie Moisés. Na'ra gudyinë! Jesús:

—Maestro, re'enda' inaohua' luë! con gatezi zio!.

²⁰ Na'ra bequëbi Jesús quiénë!:

—Yaca be'eza', zu beló quiejaba!. Lëscan' ja bguini, dyia lidyijaba!. Pero në'ëdi' naca' bichi yugulu benë!, bizu lidya' ga idyina' sua!.

²¹ Itu ben' nacarëcazi ben' quiénë! unë! rëbinë! Jesús:

—Señor, ben lato tzetapa' xuza', porque bagatinë!. Na'tera yeguida' inaohua' luë!.

²² Na'ra bequëbi Jesús gudyinë! lënë!:

—Unaозi në'ëdi!. Bë lato ucachi! yaca ben' birue quie xti'idza' Diuzi xuzo!.

Ulëchi Jesús chizi be bedun' len nisa

(Mr. 4.35-41; Lc. 8.22-25)

23 Na'ra uyu'u Jesús lu'u barco len ja ben' quién! **24** Caora na' bénan tu be bedun' huala gula, rudyigaten nisa rudzon lu'u barco. Pero rasila Jesús cati ruen cana! **25** Na'ra uyo yaca ben' quién! yesebjé! léné!, rëbijé! léné!: —iSeñor, psela néto! iAre'en yéto barco lu'u nisa!

26 Na'ra uné Jesús rëbiné! lëjé!: —¿Bixquién! lega rdzebile? iBiralele ucuasa ucui'o Diuzi ra'o!

Na'ra uyasané!, udilaléné! be bedun' len nisa. Caora na' bguenan ure'n chizi. **27** Na'ra rebane ja ben' quién! najé!: —¿Ca nuži naca ben' niga? Lente be bedun', lente nisa ralen quién!.

Bebio Jesús taxi'ibi' yu'u chopá ben' Gadara

(Mr. 5.1-20; Lc. 8.26-39)

28 Cati bdyin Jesús itzala' lagun ga lao yu nebaba Gadara, caora na' labdyinte chopá ben' bro lu'u yerobá dyia na!. Rupatejé! yu'ujé! taxi'ibi!. Na' bdyinjé! lao Jesús. Tantozi nacajé! ben' snia gula, ni tu ganu rerugue te tu neza zaca' ga yu'ujé!. **29** Na'ra uzulaojan rbediyiya'zijan najan rëbijan Jesús: —¿Bi de quio' conlë néto' zao' niga, Jesús žili Diuzi? ¿Quele baodyialaolalo' bla'lo' huelo' néto' castigo, na' binedyin hora?

30 Ga'ala'zi ga zé Jesús yu'u ja cuchi zé. Légan' na' la'adyi'jaba' rguilojaba' ta raojaba!. **31** Na'ra bë ja taxi'ibi' zédi rëbijan Jesús: —Chi yebiolo' néto' tzala'la, ben lato tzu'undo' lu'u cuchila.

32 Na'ra rëbi Jesús lëjan:

—Uletzu'ujaba'.

Na'ra bero ja taxi'ibi' yu'u ja bené! yetzu'ujan lu'u cuchila. Tu chi'zi raca cana', yequinojaba' cuinjaba' tu ru'a ya'a ga naca stébi. Laga lu'u lagun yetzu'ujaba' uyépijaba' gutijaba'.

33 Quie lena' yaca ben' rapa lëjaba' bežunojé! dan! bdzebijé! bedyinjé! yedyi quiejé!. Na'ra uzulaojé! ru'ejé! di'idza' cabë! guca quie ja ben' bero ja taxi'ibi!. **34** Na'ra bro ja ben' zé yedyi na', ziojé! gan' zé Jesús. Laonabayéch'i'tejé! rëbijé! léné!: —Yerolo' yejo' lao yu quiendo!.

Beyue Jesús tu ben' ži

(Mr. 2.1-12; Lc. 5.17-26)

9 Beyu'u Jesús tatula lu'u barco. Bela'gué! itzala' lagun, bedyinné! lao yedyi quié!. **2** Na' bi'ajé! tu bené! ži, ben' žuba lao belaga nu'a ja bené! léné!. Caora blë'ë Jesús cabë! žela'adyi'yaqué! yeyuené! léné!, na'ra uné! rëbë! ben' raca žhue!:

—Bidzebo', bicha!. Cabë! quie ja dula' xquia quio!, aoži'žia'n.

3 Na'ra bala ja maestro, ben' rusédiya ley quie Moisés, bëjé! pensari lu'u guicho laxta'oje! cani: "Huadza' Diuzi ben' niga cabë! di'idza' uné!." **4** Pero como dan' anezi Jesús cabë! pensari racajé!, na'ra uné! rëbë! lëjé!:

—¿Bixquién! racale pensari cana?'

5 ¿Ca nurlan nacaran yalo hua' quie ben' ži niga? ¿Nacaran yalo chi yépa'né!: "Aoži'žia' xquia quio?", o chi nacaran yalo yépa'né!: "Uyasa, bezi' belaga quio', beyo"? **6** Pero como naca' bichi yugulu bené!, lena'

re'enda' inezile de yela' rnabë' quia'
ta si'zia' dula' xquia quie ja ben'
nita' lao yedyi layu.

Na'ra unë' rëbinë' ben' ū:
—Beyasa, beyu'a belaga quio!.

Beyo žan yu'u.

⁷ Na'ra beyasë' zeyoguë' žan yu'u
quië!. ⁸ Caora blë'ë ja benë' cabë' bë
Jesús, tu bebanezijë!. Na'ra uzulaojë'
rapala'një' Diuzi por nun quie dan'
babë'në' yela' huaca quienë' Jesús.

Guži Jesús Mateo

(Mr. 2.13-17; Lc. 5.27-32)

⁹ Na'ra beza' Jesús ga beyuenë'
ben' ū, caora na' blë'enë' tu ben'
lao Mateo, re'në' tu ga ruquižunë'
quie impuesto. Na'ra unë' rëbë'
lëbë':

—Uda, unao në'ëdi!.

Na'ra uyasa Mateo bëlënë' lënë'
tuže.

¹⁰ Biži guca na' tu re'në' raohuë'
žan yu'u, cati bdyin ja ben' zë, ben'
huequižu, lenrë ja ben' cacuendazi.
Udaoljë' Jesús tuže len ja ben'
quienë!. ¹¹ Pero bë' blë'ë yaca ben'
partido fariseo tužezi udaolë Jesús
len lëjë!, na'ra unabajë' ben' quie
Jesús rëbijë' lëjë!:

—¿Bixquier' raolë maestro quiele
tužezi len ja ben' huequižu len ja
ben' cacuendazi?

¹² Bë' be Jesús cana', na'ra unë'
rëbinë' lëjë!:

—Ca quie ben' zu dya'a, birnaban
ben' yeyue lënë!. Pero ben' raca
žhue', rnaban ben' yeyue lënë!.

¹³ Uletzio huele pensari yela'
tzioñe'ele bi nan lë'ë guichi la'iya
quie Diuzi ga rnan caniga: "Raxera
Diuzi yeyëchi'l'a'adyi'ro benë!, quele
ca ta hue'ro Diuzi gun." Quele za'

rëža' ben' na "bibi xquia naca quia!",
sino que za' rëža' ben' nezi de
dula' xquia quie tacuenda yetza'jë'
pensari quiejë' inaojë' xneza Diuzi.

Unabajë' Jesús quie ubasi

(Mr. 2.18-22; Lc. 5.33-39)

¹⁴ Bdyin ja ben' quie Juan bautista
lao Jesús rnabajë' lënë':

—¿Bixquier' nëto' len ja ben'
partido fariseo ruetzegundo' ubasi,
na' ja ben' quio' biruejë' ubasi?

¹⁵ Na'ra bequëbi Jesús rëbinë' lëjë!:

—Yaca ben' zioja ga raca lani
quie huetzagana', bireya'ala' sujë'
bayëchi' tu nezu ben' rutzagana' len
lëjë!. Pero cati idyin dza birazulë
ben' rutzagana' len lëjë!, caora na'
sí, huazujë' bayëchi' huejë' ubasi.

¹⁶ Bisaque' yeda'ro la'ari' cubi
binetzéri lë'ë la'ari' gula, porque
huetzere'nan igan ru'a la'ari' gula,
ichezan len mazara. ¹⁷ Lëscan'
bisaque' ca'ro nupi žixi lu'u bolsa
guidi gula, porque bë' sulao ilëbin,
huedza'n ichezan len. Lao rupatelan
cuiagui!. Lena' reya'ala' ca'ron tu
lu'u guidi cubi. Cana' sí, bibi gaca
quie lao rupaten.

Beyue Jesús tu nigula raca žhue', besebanrënë' itu nigula baguti

(Mr. 5.21-43; Lc. 8.40-56)

¹⁸ Tu raca nerue' Jesús di'idza' len
ja benë!, cati bdyin tu ben' rnabë'
quie ja ben' Israel gan' zë Jesús. Na'
gutanë' uzuru'ala lao Jesús rëbinë'
lënë!:

—Zabeyudyi guti tu ži'ina' nigula.
Pero chan' na' luë' guido' ixubalo'
nao' lëbi', huebambii' tatula.

¹⁹ Na'ra uži'në' ziolënë' ja ben'
quienë!. ²⁰ Na'ra tu neziojë' tu neza,

cati ubiga' tu nigula raca žhue'
xcu'udzula Jesúś, uženë' diba zu
ni'a žabë!. Aziote lao chipchopa iza
ruzun lénë' uba'a. ²¹Cana! bënë'
porque guquenë' chi tu guxuzë'
žaba Jesúś, yeyaqué!. ²²Cati
beyécho Jesúś rnë'ë ga zë nigula,
rëbinë' lénë':

—Bidzebo', zana!. Como dan'
rzudyi'ilélo' në'ëdi', abeyaco!.

Caora na'tezi labeyacatë!.

²³Na'ra užil'në! zioguë' bdyinnë'
žan yu'u quie ben' rnabë', ben'
nequië' lénë!. Na' blë'ënë' bala
yu'ute ja músico listo ta tzecachi'jë'
lëbi!. Lëzi cana' blë'érénë' ru'be
gula bayu'uja benë!. ²⁴Na'ra unë'
rëbinë' lëjë!:

—Ulero ga yu'ule niga. Para në'ëdi'
quele natibi!, dechan' tu rasizibi!.

Na'ra bžidijë! Jesúś cabë' unë!.

²⁵Cati beyudyi betzatzanë' lëjë!,
na'ra uyu'unë' ga de nigula baguti,
uženë' na'abi' besebannë'bi!. Caora
na' beyasabi!. ²⁶Na' tzadi unezi ja
ben' quie ja yedyi na' cabë' bë Jesúś
besebannë' nigula dao' de baguti.

Beyue Jesúś lao chopá ben' laochula

²⁷Lazune Jesúś yeza'në! gan' na'
cati unao chopá ben' laochula lénë!.
Rbediya'l'zijë' rëbijë! Jesúś:
—iBeyéchi'la'adyi' nëto', luë' ū'i
rey David!

²⁸Cati uyu'u Jesúś lu'u yu'u, na'ra
ubiga'ja ben' laochula laohuë!, na'ra
unabë' lëjë!:

—¿Rzudyi'ilélo në'ëdi' huaca'
veyua' le'e na'?

Na'ra najë!:

—Rzudyi'iléndo' luë', Señor.

²⁹Na'ra udëbi Jesúś laojë' rëbinë'
lëjë!:

—Yeyacale con cabë' rzudyi'iléle
në'ëdi!.

³⁰Na'ra labeyacate laojë' dyë'ëdi.
Na'ra bë Jesúś mandado gudyinë'
lëjë!:

—Nitu nitu biquixogue'le cabë' bia'
quiele.

³¹Pero lapencara brojë! cati
uzulajë' rguixogue'jë' tu tu yedyi
cabë' bë Jesúś quiejë!.

Beyue Jesúś tu ben' birnë

³²Na'ra zeza'jë' zeyojë' cati za'
bala ja ben' nequië' tu ben' birnë
lao Jesúś, ben' yu'u taxi'ibi!. ³³Na'ra
bebío Jesúś tzala'la taxi'ibi' yu'unë'.
Caora na' beyacanë' benëtenë!.
Na'ra rebane ja benë' rnajë!:

—Binelë'écaziro gaca lao ja yedyi
quie ben' Israel cabë' raca niga na'a.

³⁴Na'ra na ja ben' partido fariseo:

—Ben' niga rebioguë' taxi'ibi' yu'u
ja benë' lao na'a xan' taxi'ibi'.

Guque Jesúś bayéchi' cabë' rue ja benë'

³⁵Na'ra rda Jesúś yugulu yedyi
yela len ja yedyi dao', ruxi'dze'në'
lëjë' lu'u idao' sinagoga quiejë!.
Rguixogue'në' lëjë' xti'idza! Diuzi,
ben' rnabë' lao yedyi layu. Na'ra
beyuenë' bitezi yela' hue' yu'u ja
benë!. ³⁶Bë' rlë'ë Jesúś ja benë!,
guquenë' bayéchi' quiejë!, dan'
redzagalaojë' rëpi reyézijë' ca quie
ja beco' ū'i'la' bizu ben' rapa ja
lëba!. ³⁷Na'ra unë' rëbinë' ja ben'
quienë!:

—Tali rnia!, lega de dyin quiero
gacaléro usëdiro ja benë' cabë'
re'en Diuzi huejë!, pero biyu'ute
ja ben' ū'i, ben' gacalë usëdi lëjë!.

³⁸Quie lena' na', reya'ala' inabale

lao Diuzi ta ise'elë' ja ben' gacalë
ra'o usëdi lëjë'.

**Betupa Jesús lao chipchopa ben'
quienë'**

(*Mr. 3.13-19; Lc. 6.12-16*)

10 Na'ra betupa Jesús lao
chipchopa ben' quienë'.
Bë'në' lëjë' yela' huaca quienë' ta
cuiojë' tzala'lla taxi'ibi' yu'u ja benë',
lëscan' ta yeuyerëjë' bitezi yela' hue'
yu'u ja benë'.

²Cani lao ja chipchopa ben' quie
Jesús: tunë' laonë' Simón, ben'
laorë Pedro, len bichinë' Andrés,
len Santiago, len bichinë' Juan ž'i i
Zebideo, ³len Felipe, len Bartolomé,
len Tomás, len Mateo, ben'
huequižu, len Santiago, ž'i i Alfeo,
len Tadeo, ⁴len Simón, ben' partido
cananista, len Judas Iscariote, ben'
psedyin Jesús lao na'a ben' rnabë',
ben' bëti lënë'.

**Use'ela' Jesús ben' quienë' ta
tzetixogue'jë' benë' xti'idza' Diuzi**

(*Mr. 6.7-13; Lc. 9.1-6*)

⁵Na'ra use'ela' Jesús lao
chipchopa ben' quienë' ta
tzetixogue'jë' benë' xti'idza' Diuzi.
Na'ra zagudyinë' lëjë' cabë' huejë',
unë' rëbinë' lëjë' caniga:

—Tziole puro yedyi quie ja ben'
Israel. Bitziole yedyi quie ja ben'
tula. Bitziorële ja yedyi quie ja ben'
Samaria. ⁶Uletziotezi yedyi quie ja
ben' Israel. Ben' na' naca quiejë' ca
quie beco' ži'ilä' neniti xa'ne. Cana'
naca quiejë' lao Diuzi. ⁷Uletzio
tzetixogue'lejë' baruen bagozi dza
guida ben' ise'ela' Diuzi ta inabë'në'
lao yedyi layu. ⁸Uleyue yaca ben'
raca yela' hue' ta rutao cuinjë' len

ja ben' raca žhue!. Uleseban ben'
bagutija. Ulebio tzala'la taxi'ibi'
yu'u ja benë'. Runa' le'e yela' huaca
quia' ta yeuyele ja benë', pero
bihuelenan de lažo.

⁹'Bihua'ale dumi, ni oro, ni
plata, ni cobre. ¹⁰Ni tu bihua'ale
ga udze'le dumi. Tuzi cue' žabale
nacole. Tuzi huaracho nuliole tziole.
Ni xaga bisèle. Nu ben' racalële,
lëben' na' naca cuenda quiejë' gunjë'
ta rdzioguele.

¹¹'Cati idyinle tu yedyi že o chi
tu yedyi dao', quilole ga zu tu ben'
dya'a. Na' yega'nle hasta que idyin
hora yeza'le. ¹²Bë' tzu'ule žan yu'u
quienë', gapala'nlejë' yëbilejë':
“Huela'iya Diuzi le'e ta sule chizi.”

¹³Chi ben' naca xa'n yu'u ruenë'
zi žela'adyi', inabarale lao Diuzi
sunë' chizi. Pero chi binaquë' zi
ben' rue žela'adyi', bira inabale lao
Diuzi ta sunë' chizi. ¹⁴Chi nu ja ben'
bisi'jë' le'e dyë'ëdi, na' chi bire'enjë'
uzenagarëjë' quiele, yerozile žan
yu'u o chi yedyi ga bire'enjë' le'e.
Usisile bëxte dyia ni'ale cati yerole
ta nacan seña binacan dula' quiele
chi baodyiagui'jë' hue Diuzi lëjë'
castigo. ¹⁵Tali cabë' rnia' le'e, cati
idyin dza gaca juicio, huera Diuzi
castigo fuertera quie ja yedyi ga
bibejë' le'e bala, quele cabë' bë
Diuzi quie ciudad Sodoma len
ciudad Gomorra. Bzei Diuzi lao
rupate yedyi na' besulatë'n.

**Unë Jesús cabë' huenë yaca
benë' yaca ben' quië'**

¹⁶Na' una Jesús:
—Ulena'cara ca nia' le'e. Rse'ela'
le'e ca quie beco' ži'ilä' lado ja lobo.
Lena' rnaban huele listo ca quie

nu bëla. Rnabarën huele žela'adyi' gaxo ca paloma. ¹⁷Gapale cuidado, porque huetzehua'aréjë! le'e lao na'a ja ben' rnabë!. Gunrëjë! le'e zì! ga regu'udi'jë! lu'u idao' sinagoga.

¹⁸Hasta huetzehua'ajë! le'e lao ja ben' gobierno, len lao ja rey, len lao ja ben' rnabë'tera, porque dan' biraxejë! nacale ben' quia!. Cana' sí, huacale inële quia! lao ja ben' Israel len lao ja ben' binaca ben' Israel.

¹⁹Cati tzehua'ajë! le'e lao na'a ja ben' rnabë!, bidëbile quie bižidan' yébilejë!, bidëbile bi huele yébilejë!. Porque cati babdyin hora saca'le cana', Diuzcazi gunnë! ta inale.

²⁰Porque quele le'ecazi cuinle inële, Bichi Be quie Diuzila, inëcacinë! le'e.

²¹'Cani hue yaca benë!, usedyinjë! benë! bi' bichinë! lao na'a ja ben' rnabë! ta gutijë'bi!. Léziré ja be'mbyu usedyinrëjë! ži'ijë! lao na'a ja ben' rnabë! ta gutirëjë'bi!. Na' lažil'izi ja benë! yeýechojabí! tilajabi' xuzijabi', quilojabí! bihuojabi' ta gutiyacabi' lëjë!. ²²Ben' zë tzu'uja udie le'e nun quie dan' baralele quia!. Nu ben' sue inao në'ëdi' la'acazi bitezi raca quienë!, ben' na' sí, huade ilanë! gaqué! ben' quia!.

²³Cati baruenë ja benë! quie tu yedyi le'e bizinaquezi, layežunotele yebole yedyi tula. Tali ca rnia!, bicala nedu lao yedyi quie ja ben' Israel tzetale tzetixogue'lejë! xti'idza! cati yeguida' në'ëdi!, bichi yugulu bene'.

²⁴'Ca ruenë ja benë! tu maestro, cana' huenérëjë! yaca ben' rusëdinë!. Lëscan! ca ruenëjë! tu ben' napa mozo, cana' huenérëjë! mozo quienë!. ²⁵Nu ben' rsëdi, reya'ala'

sunë! dispuesto usaca yaca benë! lëbë! con cabë! rsacajë! maestro quiénë!. Lëscan! nu ben' naca mozo, reya'ala' sunë! dispuesto usaca ja benë! lëbë! cabë! rusacajë! xa'nnë!. Chi ina yaca benë! yëbijë! tu ben' necua' familia: "Naco' xan' taxi'ibi", lëscan! yëbijë! ži'inë!: "Naco' ži'i xan' taxi'ibi!"

Bireya'ala' idzebiro bi ruenë ja benë! ra'o

(Lc. 12.2-7)

²⁶Na' una Jesús:

—Quie lena' bireya'ala' idzebile bi ruenë ja benë! le'e. Rnia' le'e ni tu ta rue yaca benë! balarazi yega'nnan cana'zi biyezaca'laona, decazi de huanezan. Lëzi ni tu ta nezi yaca benë! de negachi! yega'nnan cana'zi biyezaca'laona, decazide huanezan.

²⁷Cabë! di'idza! ru'elias! le'e bë! baochula, lëdi'idza! na' yébile ja benë! bë! baoyani!. Lëzi cabë! di'idza! ru'elias! le'e xcu'udzu yu'u, lëdi'idza! na' yébile ja benë! zaca'laojë!. ²⁸Bidzebile bi hue ja benë!, porque dan' ba'ala'cazi gacajë! gutijë! le'e, bigacajë! gutijë! bichi be quiele. Reya'ala' idzebile Diuzi, ben' gaca udyiagui! le'e len bichi be quiele ise'elë! le'e len bichi be quiele lao gui' gabila.

²⁹'Na' ledao'zi zaca' chopá bguini dao' ga ruti'jë'ba!, pero ni tu bguini dao' bižu biiguinuba! sino que binezi Xuziro Diuzi biguca bguinuba' layu. ³⁰Hasta len guitzá! guichoro nezi Diuzi balan naca.

³¹Lena' bireya'ala' idzebile, porque zaca'ra le'e quele ca ja bguini dao'!

Ni nan quie ben' rnëja cule
Jesucristo lao ja benë!

(Lc. 12.8-9)

³²Na' una Jesús:

—Nutezi ben' rnë cule në'ëdi' lao ja benë', cana'rë inia' cule lëjë' lao Xuza' Diuzi zu guibá. ³³Pero nu ben' rnë condre në'ëdi' lao ja benë', cana'rë inia' condre lëjë' lao Xuza' Diuzi zu guibá.

**Guta' tazëdi quie ben' nao xneza
Jesús**

(Lc. 12.51-53; 14.26-27)

34Na' una Jesús:

—Biinale bigalo dila quie ja benë' tanun quie dan' bida' lao yedyi layu, sino que hualo dila. ³⁵Por nun quie dan' chi gale nu benë' quia', huazu ū'iijé' condre xuzijé', huazu ū'iijé' nigula condre ūnaljé', huazu ū'zalidijé' condre ben' gula quiejé'. ³⁶Cana' tzu'ujié' hasta quie udiejé' familiazi quiejé'.

³⁷'Nu ben' nediyé'éra nu xuzi ūnë'ë quele cabë' në'ëdi', binaquë' zi gacanë' ben' quia!. Lëzi nu ben' nediyé'éra ū'iline, quele cabë' në'ëdi', binacarë' zi gacanë' ben' quia!. ³⁸Nu ben' bire'en usacayudyi cuinnë' inaonë' në'ëdi', binaquë' zi gaquë' ben' quia!. ³⁹Nu ben' bire'en izane cuine gatinë' por nun quia' në'ëdi', lëben' na' initilanë' yela' neban ta hue' Diuzi lënë' guibá. Pero ben' rzane cuine, ben' zu puesto gati por nun quia' në'ëdi', hue'la Diuzi yela' neban quiénë' guibá.

**Unë Jesús cabë' di'idza' ūela'adyi'
ru'e Diuzi benë'**

(Mr. 9.41)

40Na' una Jesús:

—Chi nu ben' rezila'adyi' le'e, lëscan' në'ëdi'cazirë rezila'adyi' rëjé'. Chi nu ben' rezila'adyi' në'ëdi', lëscan' rezila'adyi'rëjé' Diuzi,

ben' use'ela' në'ëdi!. ⁴¹Nu ben' rezila'adyi'rë ca una yaca profeta, porque dan' nacayaquë' ben' za'lao Diuzi, na'ra con cabë' hue Diuzi ben' profeta ben' ūe, cana' huerë Diuzi lëbë' ben' ūe. Nu ben' rezila'adyi'rë ca una tu ben' quie Diuzi, porque dan' naquë' ben' quie Diuzi, na'tera con cabë' hue Diuzi ben' quiénë' ben' ūe, cana' huerë Diuzi lëbë' ben' ūe. ⁴²Nu ben' hue' chan' tu vasozi nisa zaga ben' quia', porque dan' naquë' ben' quia', decazide hue Diuzi lëbë' ben' ūe. —Cana' una Jesús gudyinë' leyaquë'.

**Use'ela' Juan bautista ben' quiénë'
yena'jé' Jesús**

(Lc. 7.18-35)

11 Cati beyudyi pxi'lidze' Jesús lao chipchopa ben' quië', caora na' zeyoguë' tzetixogue'në' ja benë' yu'uja yedyi rega'n ga'ala' gan' rdë'!

²Na' dyiguiba yu'u Juan na' cati unezinë' cabë' barue Cristo. Na'ra use'ela'në' bala ben' quiénë' ta tzena'jé' Jesús. ³Na'ra unajé' rëbijé' lënë':

—¿Naco' ben' na Diuzi ise'ela'në' o chi ben' tula reya'ala' cuezando?

⁴Na'ra bequëbi Jesús rëbinë' lëjé!:

—Uletzio uletzeguëdyi Juan cabë' rlë'ele rele. ⁵Ulehuel' lënë' di'idza' yëbilënë' cabë' babeyaca ja ben' laochula, barelë'ëjé!. Na' ja ben' ūi, babeyacajé!, baredajé!. Na' ja ben' yu'u yela' hue' ta rutao lëjé!, babeyacajé!, babežijé!. Na' ja ben' bireja, babeyacajé!, bareyejé!. Na' ja ben' bagutija, babebanréjé!. Na' ja ben' yëchi!, rguixogui'ajé! ca na xti'idza' Diuzi ta inezijé' bi huejé!

ta yejojë' guibá. ⁶Huaca huen quie ben' biusan sudyi'ilé në'ëdi'.

⁷Cati beza' ja ben' quie Juan, na'ra uzulao Jesús ru'elénë' benë' di'idza' rëbinë'jë' ca naca quie Juan. Cani unë':

—¿Bidan' uyole yena'le lao lato dachi ga bidyia yu'u? ¿Uyole yena'le tu yaga yëto ru'a be ni'nila? ⁸Quele lena' uyole yena'le. ¿Bižidan' uyole yena'le chi quele lena' uyole yena'le? ¿O chi uyole yena'le tu ben' zë žabe tzao'? Na' nu ben' zë žabe tzao' bitajë' lao lato dachi ga bidyia yu'u. Quele lena' uyole yena'le? ⁹¿Cabiži uyole yena'le? ¿Uyole yena'le tu ben' naca profeta. Talicazi naca Juan profeta. Nacarë' ben' tzao'ra ca ja profeta. ¹⁰Léquie Juan na', ben' cuialao laohua', quie lëbë' rguixogue' guichi la'iya quie Diuzi cani:

Ise'ela' Diuzi tu ben' cuialao neza ga tza' cuenda tzetixogue'në' yaca benë' huida' në'ëdi'. ¹¹Tali rnia' le'e, lao yugu ja benë' baoyu'uja yedyi layu hasta na'a, nitujë' binegacajë' ben' že ca Juan bautista. Dechan' nu ben' binacate že ga rnabë' Diuzi guibá, nacacazirë' ben' žera ca Juan.

¹²'Desde cati bida Juan bautista hasta na'a, raca ja benë' dila condre yela' rnabë' quie Diuzi. Du rdilajë' rguilojë' bi huejë' ta useyudyi usedujë' lëbë'. ¹³Yugulu ja ben' udixogue' tiempote cabë' na Diuzi, len cabë' na di'idza' bzu Moisés lë'ë guichi hasta cati bla' Juan, unëjë' quie dza zaza'ra cati inabë' Diuzi lao yedyi layu. ¹⁴Chi

ralele ca nia' quie Juan, huanezile babidalanë' lao laza profeta Elías, ben' yeguidacazi. ¹⁵Reya'ala' tzu'u guicho nagale ca nia'!

¹⁶—¿Cabi di'idza' inia' le'e ta tzioñe'ele cabë' naca yela' zidi quie ja ben' nita' na'a? Ruejë' ca quie xcuidi' re' lao ye'eya bire'enjabì' quitulëjabì' laguedyi xcuidi'jabì!. ¹⁷Na'ra laguedyi xcuidi'jabì' rucuedyijabi' bdvio tacuenda uya'a ja xcuidi' bire'en quitu. Pero bire'enjabì' uya'ajabi'. Lena' laguedyi xcuidi'jabì' bilajabi' canción bayëchi' tacuenda cuedyi ja xcuidi' bire'en quitu. Pero ni canal' biuredyijabi!. ¹⁸Na'ra bë' bida Juan, biudaotza'onë' bihue'enë' vino. Na' le'e unale quië' yu'unë' taxi'ibi!. ¹⁹Na'ra bë' bida' në'ëdi', bichi Yugulu benë', raohua' ri'oga' cabë' ta ri'o rao ja benë'. Na' rnële quia' ben' ri'o raolë'ëna', ben' rdalë ja ben' mala len ja ben' huequižu. Lena' nia' le'e, yela' sin' quie Diuzi nenacazi nacan huen.

**Begunni'a Jesús yaca ben' yedyi
birale quiénë'**

(Lc. 10.13-15)

²⁰Na' ra uzulao Jesús regunni'anë' ja ben' yedyi gan' babëré' yela' huaca quiénë' como ja benë' yu'u na' biptza'jë' pensari quiejë' cabë' gudyinë' lëjë!. Na'ra unë' rëbinë' lëjë!:

²¹—iBayëchi'zi gaca quie le'e ben' ciudad Corazín! iBayëchi'zi gaca quie le'e ben' ciudad Betsaida! Chan' na' guca milagro lao ciudad quie ja ben' Tiro, len lao ciudad quie ja ben' Sidón cabë' milagro guca lao yedyi quiele tiempote, babetza'jë!

pensari quiejé', babejacajé' ben' quie Diuzi chan' na'. Lézi cana', chan' cana'cala bagucojé' la'ari' ta nena yu'ujé' bayéchi', na' bda'rëjé' de guichojé' cabë' costumbre guta' quiejé' cati renabajé' perdón quiejé' lao Diuzi. ²²Pero nia' le'e, cati idyin dza gaca juicio, castigo hualara gata' quiele, quele ca castigo gata' quie ja ben' ciudad Tiro len ja ben' ciudad Sidón. ²³Lëscana' le'e ben' ciudad Capernaum, bigaquele chi huapala'n Diuzi le'e yebole guibá, dechan' lao gui' gabilala tziole, porque chan' na' gucarë milagro lao ciudad Sodoma cabë' milagro guca lao ciudad quiele, nere' ciudad Sodoma nedian hasta na'a chan' cana'cala. ²⁴Lézi cana' rnia' le'e, cati idyin dza gaca juicio, huata'rë tu castigo hualara quiele, quele ca castigo gata' quie ja ben' ciudad Sodoma.

Ben Jesús yela' huezila'adyi' quiero

(Lc. 10.21-22)

²⁵Lëlao tiempo na' una Jesús rëbinë' Xuzinë' caniga:
—Ben' že naco' luë' Xuza!.
Naco' xan' guibá len yedyi layu.
Diuxcalelo' por nun quie dan'
bablu'elo' ca naca tali quio' lao
yaca ben' nezi rdzioguejé' inezijé'n.
Pero pcachi'llo' ca naca tali quio' lao
ja ben' na rioñe'ejé', pero bë' nazijé'
birioñe'ejé'n. ²⁶Cana' nacan Xuza!,
porque cana' re'enlo' gacan. —Cana'
una Jesús rëbinë' Xuzinë'.

Na' una Jesús rëbinë' ben' quië':

²⁷—Yugulute ta de baben Xuza'
në'ëdi'. Tuzi Xuza' Diuzi nubë'në'
në'ëdi' naca' zì'inë'. Na' ben' re'en
huebë' cabë' naca Diuzi, në'ëdi'

uzioñe'eda' lëjé' ta huebë'jë' cabë'
naca Diuzi. Tuza' në'ëdi'lia' lëjé'
nubë'ndo' Diuzi. ²⁸Uleda gacaléle
në'ëdi' tuže, yugulu le'e, ben'
barexaque quie dula' xquia quie,
ben' barexaque cabë' tazëdi raca
quie. Në'ëdi' guna' huezila'adyi'
quiele. ²⁹Ulehue quiele dí'idza'
quia' cabë' rnia' le'e. Ulesëdi cabë'
naca quia' como dan' naca' ben'
žela'adyi', ben' laxta'o gaxo. Chi
hue quiele cabë' nia' le'e, huata'
yela' huezila'adyi' quiele. ³⁰Ca naca
dyin re'enda' huele, binacatigan
zëdi. Ca naca yua' re'enda' hua'ale,
binacatigan zil'i.

Bezi' ja ben' quie Jesús trigo dza huezila'adyi'

(Mr. 2.23-28; Lc. 6.1-5)

12 Na'ra guca dza na' tu dza
huezila'adyi', uza' Jesús
ziolënë' yaca ben' quienë' udejé' ga
nazajé' trigo. Na' nun quie udue
yaca ben' quie Jesús, sulaojé' ralojé'
dao quie trigo raojé'n. ²Cati blë'ë ja
ben' fariseo cabë' rue ja ben' quie
Jesús, na' unëjé' rëbijé' Jesús:

—Una'cara, barue ja ben' quio'
dyin ta biru'en lato huejé' dza
huezila'adyi'.

³Na' unë Jesús rëbinë' lëjé':

—¿Binelabale cabë' bë rey David
lénë' yaca ben' quië' bë' uduejé' dza
na'? ⁴Uyu'unë' lu'u idao' rnabë'ra
udaohuë' yëta xtila naca gun quie
Diuzi ta biru'en lato gaohuë', ni
lëbë', ni ben' quië'. Tuzi ja pxuzizi
ru'en lato gaojé'n. Pero cala xquia
bënë', bënë' cana'. ⁵¿Lézi binena'le
lë'ë ley quie Moisés ga rguixogue'n
quie ja pxuzi, ben' rue dyin lu'u
idao' rnabë'ra? Bibezila'adyi'jé' dza

huezila'adyi', pero bëjë' dyin lu'u idao' rnabë'ra, dechan' quele xquia bëjë', bëjë' cana!. ⁶Na'ra rnia' le'e, nacara' në'ëdi' balaora ca idao' rnabë'ra. ⁷Le'e binetzioñe'ele cabë' na lë'ë guichi la'ya quie Diuzi ga una Diuzi: "Re'enda' ye'yéchi'la'adyi'le benë! Lena' nacaran belao quele ca ta udyiale nu bia naca gun quia' ru'aba." Chi uyoñe'ele cabë' na Diuzi, bigaole xquia ben' bide falta quie. ⁸Në'ëdi', bichi yugulu benë!, rnabi'a quie yugulute ta raca dza huezila'adyi'.

Beyue Jesús tu ben' neseco në'ë

(Mr. 3.1-6; Lc. 6.6-11)

⁹Na'ra uza! Jesús ziogué' uyu'unë' lu'u idao' quieyaque' laona sinagoga.

¹⁰Na' zu tu be'mbyu neseco në'ë. Na'ra yaca ben' zu na' rguilola'adyi'jë' gaojë' Jesús xquia. Lena' unabajë' lëbë':

—¿Ru'en lato ye yuero benë' dza huezila'adyi'?

¹¹Na'ra bequëbi Jesús rëbinë' lëjë':
—¿Chi nu le'e zu tu beco' ži'ilä'
quiele bguinuba' lu'u pozo dza
huezila'adyi', quele seguro na'
huayole tzelioleba'? ¹²¿Como
binezile zaca'ra tu be'mbyu quele
ca tu beco' ži'ilä'? Quie lena' ru'en
lato ye yuero benë' dza huezila'adyi'.

¹³Na'ra una Jesús rëbinë' ben'
neseco në'ë:
—Bli nao'.

Na' cati belinë' në'ë, beyacan
cabë' naca itzala' në'ë dya'a. ¹⁴Na'
aza' ja ben' fariseo ziojë' uzulaojë'
rusaque'jë' bi huejë' ta gutijë' Jesús.

Desde tiempote udixogue' Isaías cabë' hue Jesús

¹⁵Cati unezi Jesús gu'unjë' gutijë'
lëbë', uzë'ë ziogué' tatula. Na' ben'

zë gula zio zenao lëbë!. Reyuenë'
yugulu yaca ben' raca žhue'!

¹⁶Na'ra bë Jesús lëjë' mandado ta
biquixogue'jë' cabë' bënë' quiejë'.

¹⁷Cana' bë Jesús tacuenda su
di'idza' cabë' una profeta Isaías dza
na'te caora udixogue'në' ca una
Diuzi caniga:

¹⁸Ben' niga ben' rue dyin lao laza',
ben' ulioga', nedye'ëda'në'
redaohueda' cabë' ruenë'.
Udzi'a Bichi Be quia' lu'u guicho
laxta'onë'.

Huaguixogue'në' yaca ben'
nita' lao yedyi layu ca tali
rchugubi'a quiejë'.

¹⁹Bihuenë' huenë, biinënë' snia,
bihuenë' zëdi tu neza.

²⁰Xela'adyi'në' ben' raca bayëchi'
quie, ye yéchi'la'adyi'në' ben'
re'en usan xquia quie.

Cana' huenë' hasta que idyinnë'
inabë'në' huenë' tali lao yedyi
layu.

²¹Sudyi'ilë yaca ben' nita' lao
yedyi layu lënë'.

Cana' udixogue' Isaías tanun quie
Diuzi dza na'.

Udaojë' Jesús xquia najë' yu'unë' taxi'ibi'

(Mr. 3.19-30; Lc. 11.14-23; 12.10)

²²Na'ra uquïë'jë' tu ben' laochula,
ben' birnë, lao Jesús. Ben' na' uyu'u
taxi'ibi' lu'u laxta'onë'. Beyue Jesús
lënë', belë'ënë', benënë'. ²³Na'
bebane ja ben' zë unajë' rëbijë'
laguediyjë':

—¿Quele ben' niga žil'i David, ben'
use'ela' Diuzi?

²⁴Na' cati be yaca ben' partido
fariseo cabë' una ja benë', na'ra
unajë' rëbijë' lëjë':

—Yela' huaca quie Beelzebú xan' taxi'ibi' rbio ben' niga yaca taxi'ibi' yu'u laxta'o benë!

²⁵Na' gucabë' Jesús cabë' pensari racajë'. Quie lena' unë' rëbinë' lëjë':

—Chi zu tu gobierno nacajë' zë cue' rdilalëjë' laguediyijë', na'ra bisibë'jë' zidza. Lëscan' nu yedyi, o nu familia, chi rdilalëjë' laguediyijë', huadzatzajë', bira tzu'ujë' tzaže. ²⁶Cana' nacarën quie Satanás. Chi Satanás rbionan yaca taxi'ibi' quienan, chi rdilalënan laguedyinan, bisuenan inabë'nan zidza. ²⁷Na' le'e nale rbioga' taxi'ibi' yu'u laxta'o benë' tanun quie yela' huaca quie Beelzebú. Na'ra nia' le'e chi nacan cana', ćnuži ru'e yela' huaca quie ja ben' quiele rbiojë' taxi'ibi'? Na'zi rulu'en quiele nequixile cabë' nale. ²⁸Në'ëdi' rbioga' yaca taxi'ibi' conlë yela' huaca quie Bichi Be quie Diuzi. Lena' rulu'en abdyin yela' huaca quie Diuzi laole, pero birezaquele abdyinnan.

²⁹Bisaque' tzu'u benë' žan yu'u quie tu ben' tzutzu huala ta si'në' ta de quiénë' chi biuquionë' lënë!. Chi uquionë' lënë', na'ra huazaque' si'në' ta de quiénë!. Cana' rua' quie xan' taxi'ibi', ruquioga'nan tacuenda bira inabë'nan.

³⁰'Nu ben' bizélë në'ëdi' tzaže, naca quiénë' ca quie ben' rudie në'ëdi!. Nu ben' biracalë në'ëdi' rua' dyin quie Diuzi, naca quiénë' ca quie ben' rchugu dyin quia'!

³¹'Tana' lena' rnia' le'e, zu Diuzi dispuesto si'zenë' yugulu xquia quie ja benë', yugulu di'idza' mala rnëjë', pero chi rna ja benë': "Dyin quie taxi'ibi" na' dyin

quie Bichi Be quie Diuzi na', chi cana' rutasi runiojë' lëbë', bide yela' huazi'že quiejë' lao Diuzi.

³²Nutezi ben' rnë condre në'ëdi', ben' naca bichi yugulu benë', zu Diuzi dispuesto yezi'ženë' dula' xquia quiejë!. Pero nu ben' rnë: "Dyin quie taxi'ibi" na' dyin quie Bichi Be quie Diuzi na', biyezi'že Diuzi dula' xquia de quiejë' dan' unajë' cana!. Tuzioli huanao dula' xquia quiejë' lëjë!.

**Unë Jesús quie ben' mala len quie
ben' dya'a**
(Lc. 6.43-45)

³³Na' una Jesús:

—Nu yaga dya'a rbian tažixi dya'a, pero nu yaga mala birbian tažixi dya'a. Según cabë' naca tažixi dyia yaga, lena' rlu'en chi yaga dya'a, chi yaga mala. Ca nu yaga rbian tažixi dya'a, cana' nacarën quia' como dan' rua' dyin dya'a racalia' benë!. Lena' ruquixile inale dyin quie taxi'ibi' rua!. Birue taxi'ibi' tadya'a.

³⁴iBen' mala gula nacale! Bisaque' inale tadya'a como dan' binacale ben' dya'a. Ca naca di'idza' yu'u ru'ale, cana' nacan ta yu'u lu'u guicho laxta'ole. ³⁵Ben' dya'a rnajë' tadya'a, dan' yu'u tadya'a lu'u guicho laxta'ojë!. Pero le'e rnale tamala, dan' yu'u tamala lu'u guicho laxta'ole. ³⁶Na'ra rnia' le'e, yugulu di'idza' mala rnë ja benë', huezaca'laon lao Diuzi. ³⁷Según bi naque di'idza' rnë dza rdale lao yedyi layu, huachugobë'cazi Diuzi quiele, chi de dula' xquia quiele, chi bide dula' xquia quiele.

Ben' malaja unabajë' ta hue Jesús tu milagro

(Mr. 8.12; Lc. 11.29-32)

38 Na'ra yaca ben' partido fariseo len yaca ben' rusëdi ley quie Moisés, unabajë' rëbijë' Jesús:

—Maestro, re'enndo' ilë'ëndo' huelo' tu milagro tacuenda inezindo' chi naco' ben' use'ela! Diuzi.

39 Na' una Jesús rëbinë' lëjë':

—Yaca ben' yu'u tamala lu'u guicho laxta'ohue, ben' rudyiga Diuzi tzala'la, re'entejë' ilë'ëjë' tu milagro ta gaca seña ta inezijë' chi tali use'ela' Diuzi në'edi'. Pero tuzi milagro ilë'ëjë', hualë'ëjë' ca milagro bë Diuzi dza uda profeta Jonás lao yedyi layu. **40** Ca guca quie Jonás dza na!, yuyu'unë' lu'u lël'ë tu bela že tzona dza len tzona yela, cana' gacarë quia' në'edi', ben' naca bichi yugulu benë!. Huayu'a lu'u yu tzona dza len tzona yela. **41** Na'ra rnia' le'e, huezuli yaca ben' yedyi Nínive gaojë' le'e xquia dza gaca juicio como dan' lëjë' sí, ptza'jë' pensari quiejë' caora udixogue' Jonás lëjë' di'idza' quie Diuzi dza na!. Pero le'e, biruzënagale quia' ba'ala'cazi nacara' ben' žera ca Jonás. **42** Lëscana' huezuli reina quie yaca yedyi nebaba Arabia gaohuë' le'e xquia dza gaca juicio como dan' lëbë' sí, uza'në' yedyi quienë' zionë' zitu' gula ta uzënaguë' ca di'idza' unë rey Salomón, ben' rionë'e. Pero le'e, biruzënagale quia' ba'ala'cazi nacara' ben' žera ca rey Salomón.

Unë Jesús quie tu taxi'ibi' rero redyin guicho laxta'o benë'

(Lc. 11.24-26)

43 Na' una Jesús:

—Cati rero bala ja taxi'ibi' lu'u guicho laxta'o ja benë', rdana ga naca bidyi rguilona ga suna. Caora biredzelena ga suna, na'ra rnëna: **44** “Hueya'a ga bez'a.” Cati abedyinnan beyu'unan lu'u laxta'o ben' na' tatula gan' bronan, caora na' rlë'ëna naca ben' na' ca quie tu yu'u dachi neluba dyë'ëdi.

45 Na'ra uyonal yexi'nan igadyi laguedyin ta nacara mala ca lëna. Cana' yu'ujan yugujan lu'u laxta'o ben' na!. Cana' racatera mala quienë' quele cati yu'un tuzin lu'u laxta'onë!. Cana' gacarë quiele nun quie dan' yu'u tamala lu'u guicho laxta'ole.

Bdyin žna' Jesús lënë' bi' bichinë' gan' zënë' rusëdinë' benë'

(Mr. 3.31-35; Lc. 8.19-21)

46 Na' neru'elë Jesús benë' di'idza' cati bdyin žnë'ë lënë' yaca bi' bichinë'. Bega'një' lali'a reguilojë' lëbë' ta hue'lëjë' lëbë' di'idza'.

47 Na'ra unë tu ben' zëlë Jesús rëbinë' Jesús:

—Babla' žnao' len ja bi' bicho!. Nita'jë' lali'a, re'enjë' hue'lëjë' luë' di'idza'.

48 Na' una Jesús rëbinë' ben' udixogue' lëbë' cati bdyin žnë'ë:

—Babla' žna'a len ja bi' bicha!. Pero nia' le'e, nita'rë ben' naca ca quie žna'a, len ben' naca ca quie bi' bicha' niga.

49 Na' blu'e Jesús gan' zë ja ben' quienë' unë' rëbinë' ben' na':

—Ja ben' rale quia', nacajë' ca quie žna'a, ca quie bi' bicha'. **50** Con nutezi ben' rue quie xti'idza' Xuza', ben' zu guibá, lëlëjë' nacajë' ca quie bi'bicha', ca quie bi' zana', ca quie žna'a.

**Unë Jesús tu di'idza' quie ben' bë
guza**

(Mr. 4.1-9; Lc. 8.4-8)

13 Na'ra guca dza na' uza'
Jesús žan yu'u uyoguë'
yeque'në' ru'a nisa lagun. **2** Na'
como dan' begu'udi' ben' zë gan'
re'në', uyu'unë' lu'u barco ure'në'.
Na' bega'n ja benë' ru'a nisa lagun.
3 Na'ra conlë di'idza' ta nacan irupa
iyunala unë Jesús psëdinë' leyaquë'
cani:

—Uyo tu be'mbyu guza trigo. **4** Na'
ca ruejë' quie trigo, tu ruziozijë'n
layu. Na'ra bala bini trigo
yeque'jan tu neza. Na' bdyin bguini
aodaoba'n. **5** Ibalan yeque'jan lado
yo ga bižubatica yu. Na' laolëtejan
dan' žuban yu lasi. **6** Cati bena
oba, na' ubidyin dan' biyu'u luena
zitu!. **7** Ibalan yeque'jan lado yëchi!.
Na' bibë yëchi' lato gue'enin
dyë'ëdi. **8** Ibalan yeque'jan ga naca
yu dya'a. Na' bë'jan usecho dya'a
quien. Balan udyian tu gayuhua
žuba' quien. Ibalan udyian tzona
galo žuba' quien. Ibalan udyian
galobechi žuba' quien. **9** Chi babele
dyë'ëdi', ulezénaga can' rnia' na'.

**Una Jesús ga huen dyin di'idza'
rusëdinë' benë'**

(Mr. 4.10-12; Lc. 8.9-10)

10 Na'ra ubiga' ja ben' quie Jesús
ga zënë' unabajé' lëbë':
—¿Bixquier' puro di'idza' ta nacan
irupa iyunala rusëdio' benë?'

11 Na' una Jesús rëbinë' lëjë':
—Ruzioñe'e Diuzi le'e bi re'en
ina di'idza' rguixogue'n quie
yela' rnabë' quie Diuzi. Pero yaca
ben' binaca ben' quia', biuzioñe'e

Diuzi lëjë'. **12** Nu ben' ruzénaga
cabë' rnia', huacalë Diuzi lëbë' ta
tzioñe'enë' dyë'ëdi. Pero nu ben'
biruzénaga cabë' rnia', huala'adyi'jë'
cabë' tadao' abejë'. **13** Tana' lena'
rguixogui'a benë' conlë yaca di'idza'
ta nacan irupa iyunala, como dan'
ba'ala'cazi rlë'ëjë' cabë' rua', ruezijë'
ca ben' birlë'ë, ba'ala'cazi rejë' cabë'
rnia', ruezijë' ca ben' bire. **14** Cana'
naca quiejë' cabë' una profeta Isaías
dza na' unë!:

Ruzénagajë' dyë'ëdi, pero
birioñe'ejë'!

Rlë'ëjë' dyë'ëdi, pero
biracabë'jë'!

15 Cana' ruejë' dan' yu'u tazidi lu'u
guicho laxta'oje'!

Ruezijë' ca ben' bire, ruezijë' ca
ben' netzudi' laohue.

Bire'enjë' ilë'ëjë', nica re'enjë'
guejë'!

Bire'enjë' tzioñe'ejë', nica
re'enjë' guidajë' ta inaojë'
xneza Diuzi yela' na'
yezi'ženë' dula' xquia quiejë'.

Cana' una Isaías dza na'!

16 Pero le'e sí, raca tahuén gula
quiele dan' tali re'enle ilë'ële ca
rue Diuzi, tali re'enle guele ca rna
Diuzi. **17** Tali ca rnia' le'e, ben' zë,
ben' unita' dza na', gu'unjë' ilë'ëjë'
cabë' ta rlë'ële, gu'unjë' guejë' cabë'
ta rele, pero biužaque'.

**Udixogue' Jesús ca bi re'en inë
di'idza' quie ben' bë guza**

(Mr. 4.13-20; Lc. 8.11-15)

18 Na' una Jesús:

—Uzénagale ta inia' le'e ca bi
re'en inë di'idza' quie ben' bë guza.

19 Nu ben' ruzénaga ca naca yela'
rnabë' quie Diuzi, pero biralejë'

bihue quieyaquë' xti'idza' Diuzi, hue xan' taxi'ibi' ta gala'adyi'ljë' cabë' bejë'. Cana' raca quiejë' ca quie bini trigo yeque'jan tu neza. ²⁰Lëscan' nu ben' redaohue ruzënaga xti'idza' Diuzi, ²¹pero bihue quieyaquë'n zidza, naca quiejë' ca quie bini trigo yeque' lado yo ga bižubatica yu biyu'u luena zitu!. Cati raca zëdi quiejë', cati rusaca benë' lëjë' bizinaquezi tanun quie dan' rue quieyaquë' xti'idza' Diuzi, na'ra rusanjë'n, bira rue quieyaquë'n. ²²Lëscan' nu ben' ruzënaga xti'idza' Diuzi, pero rdëbijë' bi raca quiejë' lao yedyi layu, rza'la'adyi'ljë' yela' uña'a, naca quiejë' ca quie bini trigo yeque'n lado yëchi!. Dan' rdëbijë' bi raca quiejë' rza'la'adyi'ljë' yela' uña'a, quie lena' biru'en lato huejë' dyin quie Diuzi. ²³Pero nu ben' ruzënaga xti'idza' Diuzi, na' ralejë'n hue quieyaquë'n, naca quiejë' ca quie bini trigo yeque'n yu dya'a bë'n usecho. Balan rbian tu gayuhua žuba!. Ibalan rbian tzona galo žuba!. Ibalan rbian galobechi žuba!. Cana' nacajë' ca quie bini trigo. Cana' gacarajë' mazara ben' nao xneza Diuzi.

Unë Jesús tu di'idza' quie guixi' mala len quie trigo

²⁴Na'ra udixogue! Jesús itu di'idza', unë' rëbinë' lëjë' cani:
—Rnia' le'e naca yela' rnabë'
quie Diuzi ca quie tu ben' guza
bini trigo layela quie. ²⁵Pero du
rëla caora rasinë', uyo tu bi' rudie
lëbë' guzanë' bini quie guixi' mala
lado trigo layela quië!. Na' beza'në'
zeyoguë' žan yu'u. ²⁶Na'ra gu'uní

guixi' mala lëbi len trigo. ²⁷Na'
uyo ja mozo quienë' yetixogue'ljë'
lëbë', najë' rëbijë' lëbë': “Señor,
baguzando' puro bini trigo
layela quio!', ćga za' guixi' mala
den lado trigo quio!” ²⁸Na' una
xa'një' rëbinë' lëjë': “Tu ben' rudie
në'ëd' bë cana!.” Na' una mozo
quierenë' rëbijë' lëbë': “¿Re'enlo'
tziondo' tzeguelondo' guixi' mala?”
²⁹Pero unë xan' mozo rëbinë' lëjë':
“Bihuele cana', dan' hualorële
trigo chan' na' galole guixi' mala.
³⁰Ulesannan gue'enigaran lëbi.
Cati yezi'a usecho quie trigo, cana'
hua' mandado zagalo mozo quia'
guixi' mala uquiojë'n manojo
ibidyin tzeina. Na'tera yezi'ljë' trigo
yezi'tza'oje'n žan lidya!”

Unë Jesús tu di'idza' quie tu bini mostaza

(Mr. 4.30-32; Lc. 13.18-19)

³¹Na'ra udixogue! Jesús itu
di'idza', unë' rëbinë' lëjë' cani:
—Naca yela' rnabë' quie Diuzi
ca quie tu bini mostaza ta guza
be'mbyu layela quië!. ³²Tali naca
bini mostaza tadao' bicu' ca yaca
los demás ja bini. Pero cati re'enin
racan tu yaga ūe, caora na' rdyin
bguini rueba' lidyiba' lao taca'n.

Unë Jesús tu di'idza' quie lë'ëti' levadura

(Lc. 13.20-21)

³³Lëscan' udixogue! Jesús itu
ejemplo, unë' rëbinë' lëjë' cani:
—Naca yela' rnabë' quie Diuzi ca
quie lë'ëti' levadura. Rutupe nigula
levadura len tzona medida yëzo
trigo ta tzu'un duže cuba, na' chëzin.
—Cana' una Jesús rëbinë' lëjë'.

Con puro di'idza' ta nacan irupa iyunala udixogue' Jesús ja benë'

(Mr. 4.33-34)

34 Na' con puro di'idza' ta nacan irupa iyunala udixogue' Jesús ja benë'. Biudixogue'në' lëjë' con di'idza' binaca di'idza' ta nacan irupa iyunala. **35** Cana' bënë' tacuenda uzu di'idza' ca di'idza' udixogue' profeta Isaías cabë' rnën lë'lë guichi la'iya cani:

Huaguixogue'në' ja benë' zë di'idza' ta nacan irupa iyunala.

Huanënë' tu ta bineye ja benë' desde dza cati udixu Diuzi yedyi layu.

Udixogue' Jesús cabë' re'en inë di'idza' quie guixi' mala ulë lado trigo

36 Na' gudyi Jesús ja benë': —Abeyudyi di'idza'.

Na' bedzatzajë' beza'rë Jesús beyu'unë' žan yu'u. Caora na' bebiga' ja ben' quiénë' rëbijë' lëbë': —Re'enndo' huu' cule yexi'idzo' nëto' quie di'idza' rnën quie guixi' mala ulë lado trigo.

37 Na'ra una Jesús rëbinë' lëjë': —Në'ëdi' naca' bichi Yugulu benë', naca quia' ca quie ben' raza bini trigo. **38** Na' dyilayu ni naca quién ca quie layela ga raza' bini trigo. Na' yaca ben' rue quie xti'idza' Diuzi, naca quiejë' ca quie bini trigo. Na' ben' rue cabë' re'en xan' taxi'ibi', naca quiejë' ca quie guixi' mala. **39** Na' xan' taxi'ibi' naca quién ca quie ben' guza guixi' mala. Bë' rez'i'a usecho, lena' rnën quie dza cati iyudyi dyilayu. Na' yaca ángel

nacajë' ca quie mozo quia' reziljë' usecho. **40** Cabë' hue ja mozo uezijë' guixi' mala, cana' gaca quie ben' rue cabë' re'en taxi'ibi' bë' iyudyi dyilayu. **41** Në'ëdi', bichi Yugulu benë', huase'ela' yaca ángel quia' tzexiljë' Yugulu ben' rudze'yela laguedyi, len Yugulute yaca los demás ben' napa dula' xquia.

42 Na' udzeljë' lëjë' lu'u gui' gabila cuediyaya'jë'. Tanto rei rlajë' gaojë' leijë'. **43** Pero yaca ben' rue quie xti'idza' Diuzi, huata' xni' quiejë' ca tu rna' xni' oba. Cana' gaca quiejë' zujë' ga rnabë' Xuziro Diuzi tuzioli. Ulehue pensari cabë' nia' le'e, dan' ruen zi tzioñe'ele.

Unë Jesús tu di'idza' quie tu tatzao' negachi'

44 Na' una Jesús:

—Yela' rnabë' quie Diuzi nacan ca quie tu tatzao' zaca'n za'ala' gula ta negachi' lu'u yu. Na' caora bedzele tu be'mbyu len, becachi'në'n tatula lu'u yu ga bedzelenë'n. Na'ra redaohuetzeguenë' tzionë' tzegueti'në' Yugulu ta de quiénë' ta yeya'ohuë' layu na' ga bedzelenë' tu tatzao'.

Unë Jesús tu di'idza' quie tu perla zaca'n za'ala' gula

45 Na' una Jesús:

—Yela' rnabë' quie Diuzi nacan ca quie tu ben' re'en ga'o tu perla zaca'n za'ala' gula. **46** Caora abdzelenë' perla na', na'ra tzionë' tzegueti'në' Yugulu ta de quiénë' ta yeya'ohuë' perla na'.

Unë Jesús tu di'idza' quie du yëxo

47 Na' una Jesús:

—Yela' rnabë' quie Diuzi nacan ca quie du yëxo rudze' benë' lu'u nisadao' ga tzu'u yugu cue' bela. ⁴⁸ Caora abedza' bela du yëxo, na'ra rebiojë'n ru'a yu bidyi. Na' rbejë' rsërejë' bia dya'a, redze'jë'ba' lu'u ga!. Na' reru'unjë' tzala'la bia binaca dya'a. ⁴⁹ Cana' gaca cati iyudyi quie dylayu. Huayo ja ángel ta tzeséreyaquë' ben' mala len ben' dya'a. ⁵⁰ Na' huaru'unyaquë' yaca ben' mala lu'u gui' gabila cuediyijaljë'. Tanto rei rlajë' gaojë' leijë'.

**Unë Jesús tu di'idza' quie
tu tagula len tu tacubi**

⁵¹ Na'ra unaba Jesús rëbinë' lejë': —¿Baoyoñe'ele yugulu cabë' ta aonia' le'e?

Na' unajë' rëbijë' Jesús:

—Aja! Señor, ayoño'endo' yugun.

⁵² Na' una Jesús rëbinë' lejë':

—Tahuen na' ayoño'ele, dan' nu ben' rsëdi guichi la'iya quie Diuzi, na' rionë'enë' cabë' nan, naca quiénë' ca quie ben' xan' yu'u, ben' gabi rdziogue quie. Aoži'në' tagula ta pca'n xuzinë' quiénë!. Lëscana' bënë' gan tazéra tacubi. Tana' lena' bibi rdzioguenë' žan yu'u quiénë'.

**Cabë' bë Jesús cati bedyinnë' yedyi
quiénë' Nazaret**
(Mr. 6.1-6; Lc. 4.16-30)

⁵³ Cati beyudyi bë'lë Jesús leyaquë' di'idza', na' bezë'ë zeyoguë'. ⁵⁴ Na' bedyinnë' yedyi quiénë', uzulahuë' rusëdi' ja benë' lu'u idao' sinagoga. Na'ra beban ja benë' rëbijë':

—¿Ga uyo ben' niga huesëdi como rionë'enë' ta zë? ¿Cómo raquë'

rue milagro? ⁵⁵ Na' žil'i carpintero naqué!. Žnë'ë naca María. Naca bichinë' Santiago, len José, len Simón, len Judas. ⁵⁶ Lëscana'rë bi' zannë', nita'jabi' ladoro niga. ¿Ga psëdinë' cabë' dan' rnënë' ra'o? —Cana' unajë' quie Jesús.

⁵⁷ Pero bibëjë' lëbë' casa cabë' unë!. Na' una Jesús rëbinë' lejë':

—Con gatezi tzio ben' rguixogue' di'idza' quie Diuzi, nita' ben' hue lëbë' casa. Pero ben' lao yedyi quië' len ben' naca familia quië', bihujejë' lëbë' casa. —Cana' una Jesús rëbinë' lejë'.

⁵⁸ Tana' lena', bibë Jesús zë milagro gan!, dan' bibëjë' casa quiénë'.

Cabë' guca cati bëtijë' Juan bautista
(Mr. 6.14-29; Lc. 9.7-9)

14 Na'ra guca dza na' naca Herodes gobernador, ben' rnabë' estado Galilea. Na' udixogue' yaca benë' Herodes cabë' rue Jesús. ² Na'ra una Herodes rëbinë' laguedyinë':

—Ben' rue cana' naqué! Juan bautista. Bebannë' bezë'ë ga yu'u ja ben' huati. Tana' de fuerza quië' ruenë' milagro.

³ Na' aoži' Herodes žgula bichinë' Felipe. Lénigula na' laohuë' Herodías. Na' tanun quie Herodías bë Herodes mandado bëxuyaquë' Juan, bdze'jë' lëbë' lu'u dyiguiba, pquiojë' lëbë' caden. ⁴ Cana' bë Herodes como dan' una Juan gudyinë' lëbë':

—Bireya'ala' huela'onë' ca nigula quio'.

⁵ Na' gu'un Herodes gutinë' Juan, pero bdzebinë' ja benë' dan' rlë'ejë'

Juan ben' rnë lao laza Diuzi. ⁶Na' cati uzu dza lani quie Herodes, uyo ū'i nigula Herodías ta bya'abi' lao ja ben' yu'u ja ga raca lani. Lega yaxe Herodes cabë' bëbi!. ⁷Tanto yaxenë' cabë' bëbi' unë' rëbinë' lëbi':

—Con bitezi ta inabo' në'ëdi', naguncaza'n, ruguntia' Diuzi.

⁸Na'ra como dan' abega'nëbi' ūna'bi' di'idza' cabë' inababi' lëbë', na'ra unabibi' rëbibi' Herodes:

—Re'enda' gunlo' në'ëdi' guicho Juan bautista dyian tu lu'u plato.

⁹Cati be rey Herodes cabë' una nigula dao', guquenë' bayëchi!. Pero bënë' mandado huejë' cabë' unababi' lëbë', como dan' cana' abgunnë' Diuzi, babe ben' yu'uja lani ca di'idza' bë'lénë' nigula dao!. ¹⁰Na'ra bënë' mandado yechugojë' luba' Juan ga yu'unë' lu'u dyiguiba. ¹¹Na' yechugojë'n yesanjë' guicho Juan dyian lu'u plato. Bezi' nigula dao' len, beyu'ebi'n ūna'bi'.

¹²Na' bdyin ben' quie Juan bezi'jë' cuerpo quienë' ta pcachi'jë'n. Ude na', uyojë' yetixoguejë' Jesús.

Bgao Jesús ga'yo' mila benë'

(Mr. 6.30-44; Lc. 9.10-17; Jn. 6.1-14)

¹³Na' cati unezi Jesús cabë' guca quie Juan, na'ra uzé'ë zioguë' cuinzë' lu'u barco bdyinne' ru'a lagun ga bizu ja benë!. Pero cati unezi ja benë' gan' zio Jesús, na' uza'jë' ziojë' ru'a yu bidyi yetilajë' lëbë!. ¹⁴Cati bero Jesús lu'u barco, blë'ënë' nita' ja ben' zë rbezajë' lëbë!. Na' beyëchi'la'adyi'në' lëjë!, beyuenë' ja ben' raca zhue' nu'ajë!. ¹⁵Como dan' barala, na' uyo ja ben' quie Jesús yeguëdyijë' lëbë!:

—Baodze' na'a. Gabi yu'u dyia niga. Na' gudyijë' yeyojë' ja yedyi re' ga'ala' ta ga'ojë' ta gaojë'.

¹⁶Na' una Jesús rëbinë' lëjë':

—Biruen zi yeyojë'. Ulehuejë' ta gaojë'.

¹⁷Na' unajë' rëbijë' Jesús:

—Ga'yo'zi yëta xtila len chopazi bela de. Gabira bide.

¹⁸Na' una Jesús rëbinë' lëjë':

—Uleguncaran niga.

¹⁹Na'ra bë Jesús mandado cue'

ja benë' lao guiži. Na' aoži'në' ga'yo' yëta xtila len chopala. Na' bëxunë'n unë'ë guibá rëbinë' Diuzi: "Diuxcalelo!". Na' bžužunë' yëta xtila, bë'në'n ja ben' quiñë', udisijë'n bë'jë'n benë!. ²⁰Yugulujë' udaoje' belojë' dyë'ëdi. Beyudyi bedaojë', bedza' chipchopa ga' naga ta yožo bega'n. ²¹Ga'yo' mila be'mbyu udaoja, apartela ja nigula len ja xcuidi'.

Uza' Jesús lao nisa

(Mr. 6.45-52; Jn. 6.16-21)

²²Na'ra bë Jesús mandado tzu'u ja ben' quiñë' lu'u barco ta cuialaojë' lëbë' tziojë' itzala' lagun. Na' bega'n Jesús ta yese'elë' ja benë' yeyojë' žan yu'u quiejë!. ²³Bë' beyudyi bese'elë' ja benë' žan yu'u quiejë', na'ra zio Jesús urënë' lao ya'a tzegue'lénë' Diuzi di'idza' cuinzinë!. Cati uxin, nezu Jesús na' cuinzinë!. ²⁴Na' nezu Jesús lao ya'a cati abdyin barco gatzo lagun. Na'ra uzulao rda be bedun!, bda'n nisa lë'ë barco, redyigan len guzu xcu'udzula, biru'en lato tenan. ²⁵Na' du balara rza' Jesús lao nisa ubiguë' ga'ala' ga re'jë' lu'u barco. ²⁶Cati blë'ë ja ben' quiñë' lëbë' rza'në' lao nisa, na'ra bdzebijë' urediyia'jë' unëjë':

—iLudza' ben' huati rza' na!
27 Na' uné Jesús rëbinë' lëjë':
 —iNë'ëdi' Jesús! iBidzebile!
28 Na' una Pedro rëbinë' Jesús:
 —Señor, chi luë' na!, ben lato sa'
 lao nisa guida' gan' zao!.
29 Na' una Jesús rëbinë' lëbë':
 —Uda, chí!.

Na' uyëzi Pedro lao barco
 uzulaohuë' rza'në' lao nisa ta
 idyinnë' ga zë Jesús. **30** Caora gucabë'
 Pedro rda be bedun' fuerte gula, na'
 bdzebinë' uzulaohuë' bëtoguë' lu'u
 nisa. Lena' urediyia'në' rëbinë' Jesús:
 —Psela në'ëdi', Señor.
31 Na'ra labëxute Jesús në'ë rëbinë'
 lënë':
 —iBiži ledao'zi zudyi'ilëlo' në'ëdi'!
 ¿Bixquien' rdzebo'?

32 Cati beyu'ujë' lu'u barco, na' uleza
 be. **33** Na'ra yaca ben' yu'u lu'u barco,
 uditzübijë' lao Jesús rëbijë' lëbë':
 —Luë' sí, tali naco' žili Diuzi.

Beyue Jesús ben' raca žhue', ja ben'
quie yu nebaba Genesaret
(Mr. 6.53-56)

34 Na' udejë' lao lagun bdyinjë'
 itzala' lagun ga nebaba Genesaret.
35 Caora bezaque ja ben' nita' na'
 Jesús na', na'ra use'ela'jë' di'idza'
 lao Yugulu ben' yedyi nita'ja na'.
 Na' nu'ajë' ben' raca žhue' bdyinjë'
 ga zë Jesús. **36** Na' unabajë' chi
 bihue'në' lato guxujë' siquiera diba
 zu ni'a žabë'. Na' Yugulu ja ben'
 bëxuja len, beyacajë'!

Unë Jesús quie ta nuen benë' badza'
lao Diuzi
(Mr. 7.1-23)

15 Na'ra uza' bala ben' partido
 fariseo len bala ben' rusëdi

ley quie Moisés, uza'jë' ciudad
 Jerusalén bdyinjë' ga zu Jesús. Na'
 ubiga'jë' rëbijë' lëbë':

2 —¿Bixquien' birue ja ben'
 quio' cabë' naca costumbre quie
 xuzixta'oro? Birguibijë' na'ajë' cati
 zagaojë' tacuenda ilë'ë Diuzi lëjë'
 nacajë' yëri.

3 Na' una Jesús rëbinë' lëjë':
 —¿Bixquien' reru'unle tzala'la
 cabë' mandado bë Diuzi huero, na'
 nenaole costumbre ruele ta biuna
 Diuzi? **4** Dza tiempote una Diuzi:
 "Gapala'nle xuzi žna'le." Lëscan' una
 Diuzi: "Nu ben' rnaya' quie xuzi
 žnë'lë, reya'alal' gatinë'." **5** Pero le'e
 rnale ru'en lato ina benë' yëbijë'
 xuzi žna'jë': "Bibi de guna' le'e,
 dan' yugulu ta de quia' babi'a Diuzi
 gacan gun quiénë'." **6** Le'e rnale
 chi yëbiro xuzi žna'ro cana', bira
 nacan cuenda quiero gacalëro xuzi
 žna'ro. Cana' rudyigale tzala'la
 cabë' mandado bë Diuzi huero, na'
 nenaole costumbre ruele ta biuna
 Diuzi. **7** iLe'e ben'rnë di'idza' de
 ladzasi! Dyë'ëdi udixogue' ben'
 profeta Isaías cabë' raca quiele
 caora bzunë' di'idza' lë'ë guicho
 la'iya quie Diuzi dza na!. Lëdi'idza'
 na' rnëen caniga:

8 Lëben' niga rionela'adyi'jë' Diuzi
 de di'idza'zi, birionela'adyi'jë'
 në'ëdi' du guicho du la'adyi'jë'.

9 Bibi sirve gapala'një' Diuzi.
 Ta racazi la'adyi'jë' rusëdijë'
 benë', yë' rzi'jë' rnajë' cana'
 una Diuzi.

10 Na'ra guži Jesús ja benë' rëbinë'
 lëjë':

—Ulezécara nagale ta tzioñe'ele:

11 Ca ta tzu'u lu'u ru'a benë' gaojë',
 binacajë' badza' lao Diuzi. Pero

di'idza' mala rero lu'u ru'ajë', lena' nuen benë' badza' lao Diuzi. — Cana' una Jesús rëbinë' lëjë'.

¹²Na'ra ubiga' ja ben' quie Jesús ga zënë' rëbijë' lëbë':

—¿Bigucabë'lō' bdza' ja ben' partido fariseo cabë' unao' bachi?

¹³Na' una Jesús rëbinë' lëjë':

—Nacajë' ca quie guixi' mala.

Na' biži puro bini dya'a raza Xuza' Diuzi zu guibá. Yugulu ta biguza Xuza' Diuzi, huadolon len luenan.

¹⁴Ulesan quiejë'. Nacajë' ca quie ben' laochula, ben' tzechua'a itu ben' laochula. Chi tzechua'a tu ben' laochula itu ben' laochula tu neza, rupatejë' iguinujë' lu'u yéro.

¹⁵Na' una Pedro rëbinë' Jesús:

—Yexil'idzo' nëto' bi re'en ina di'idza' baonao'.

¹⁶Na' una Jesús rëbinë' lëjë':

—¿Lente le'e biuyoñe'erële?

¹⁷¿Binezile yugu ta rao benë' zion lu'u lëjë', te na' yeguichijë'n binuen lëjë' badza' lao Diuzi? ¹⁸Pero di'idza' mala rero lu'u ru'ajë', len ulën laxta'oje'. Lena' nuen lëjë' badza' lao Diuzi. ¹⁹Cati rero pensari mala lu'u laxta'oje', caora na' rutijë' laguediyijë', rdalëjë' nigula quie ben' tula, rdalëjë' nigula cuidi', rbanjë' quie laguediyijë', rzi'jë' yë' laguediyijë', ru'ejë' di'idza' bižo. ²⁰Chi ruejë' cana', nacajë' badza' lao Diuzi. Pero chi raojë' du bineyëri na'ajë', lena' binuen lëjë' badza' lao Diuzi. —Cana' una Jesús rëbinë' lëjë'.

Tu nigula binaca ben' Israel gulenë'

quie Jesús

(Mr. 7.24-30)

²¹Na' uza' Jesús zioguë'. Na' ga bdyinnë' nacan ga'alá' ga re' ciudad

Tiro len ciudad Sidón. ²²Na' uza' tu nigula Cananea, ben' nita' ciudad na', zioguë' bdyinnë' ga zu Jesús. Rbedyiya'në' unë' rulidzanë' Jesús:

—Señor, ži'i rey David luë', beyéchi'la'adyi' në'ëdi'. Yu'u taxi'ibi' lu'u laxta'o ži'iná' nigula. Lega ruluquen lëbi'.

²³Pero ni tu di'idza' biunë Jesús.

Na' ubiga' ja ben' quië' unajë' rëbijë' lëbë':

—Ulaolo' nigula ni, dan' za'në' zenaonë' ra'o, rbedyiya'në'.

²⁴Na' una Jesús rëbinë' lëbë':

—Lao ja ben' Israelzi aose'ela' Diuzi në'ëdi'. Nacajë' ca quie beco' ži'ilá' aoniti tu neza.

²⁵Na' ubiga' nigula ga zë Jesús, uditzunë' žibinë' laohuë' unë' rëbinë' lëbë':

—Señor, gucalë në'ëdi'.

²⁶Na'ra una Jesús rëbinë' lëbë':

—Bireya'ala' si'ro yela' huao ta rega'n rao yaca xcuidi', tzechu'unron ta gao yaca beco' dao!

²⁷Pero na' una nigula na' rëbinë' Jesús:

—Sí, Señor, pero lente yaca beco' dao' raoyacaba' yaca pedazo rguino layu ga rao yaca xcuidi'.

²⁸Na' una Jesús rëbinë' lëbë':

—Zana', dan' rzudyi'ilélo' në'ëdi' dyë'lëdi' gula, huacan cabë' re'enlo'.

—Cana' una Jesús rëbinë' lëbë'.

Na'ra lëhora na'tezi, beyaca ži'inë' dya'a.

**Beyue Jesús ja ben' zë,
ben' raca mala quieja**

²⁹Na' uza' Jesús zioguë' udenë' ru'a lagun quie Galilea, bdyinnë' urënë' ure'në' tu lao ya'a. ³⁰Na' bdyin ja ben' zë ga zë Jesús. Nu'ajë'

nu ben' ūi, len ben' laochula, len ben' biraca rnë, len ben' neseco në'ë, len ben' neseco ni'e. Nu'ajë' zë ben' raca ūhue'. Na' udixojë' lejë' laohuë', beyuenë' lejë'. ³¹Cana' beban ja benë' cati blë'ejë' cabë' bë Jesús quie ben' naca mala quie. Blë'ejë' benë ben' biraca inë, blë'ejë' abelë'ë ben' laochula. Na'ra unajë' rëbijë' laguedyijë': "Naca Diuzi quie ben' Israel ben' ūe." Cana' unajë'.

Bgao Jesús tapa mila benë'

(Mr. 8.1-10)

³²Na' guži Jesús yaca ben' quiénë' unë' rëbinë' lejë':

—Reyéchi'lala'adya' yaca ben' niga, dan' baguca tzona dza zuléjë' në'ëdi' niga, abeya ta gaojë'. Bireya'ala' yese'ela'jë' žan yu'u quiejë', dan' binegaojë' usu'unan lejë' tu neza.

³³Na' una ja ben' quiénë' rëbijë' lëbë':

—Biži huero idzelero yela' huao ta gao ja ben' zë niga. Gabi yu'u dyia ni.

³⁴Na' una Jesús rëbinë' lejë':

—¿Bala yëta xtila de quiele?

Na' unajë' rëbijë' Jesús:

—Gadyizin len tu chopazi bela dao'.

³⁵Na' ra bë Jesús mandado cue' ja benë' layu. ³⁶Na' uži'në' bëxunë' gadyi yëta xtila len ja bela, unë' rëbinë' Diuzi: "Diuxcalelo". Na'ra bžužunë'n bë'në'n ben' quië',

udisijë'n bë'jë'n yaca benë'. ³⁷Na'

aodaojë' yugulujë' belojë'. Ude beyudyi na', bedza' gadyi chicuiti tayožo bega'n. ³⁸Na' aodao tapa mila be'mbyu, apartela nigula len xcuidi'. ³⁹Ude beyudyi udaojë', bese'ela' Jesús lejë' žan yu'u quiejë'.

Na' uyu'unë' lu'u barco uza'në' zionë' yu nebaba Magdala.

Ja ben' partido fariseo len ja ben'
partido saduceo gu'unjë' hue Jesús
tu milagro ta ilë'ejë'
(Mr. 8.11-13; Lc. 12.54-56)

16 Na'ra uyo ben' partido fariseo, len ben' partido saduceo yena'jë' Jesús ta huejë' trampa quienë' ta gaojë' lëbë' xquia chi bihue ca ta inabajë' huenë'. Cana' unabajë' huenë' tu milagro quie žan guibá ta ilë'ejë'. ²Pero na' una Jesús rëbinë' lejë':

—Como dan' rna' žna guibá du zadze', na'ra inale: "Huen dya'a uxe." ³Lëscan' cati zë beo žna guibá du ziladao', na'ra inale: "Bihuen dya'a na'a." Pero rnia' le'e, ben' tondo nacale. Banezile bi ta ilë'ële ta yezaque'le chi huen dya'a, chi bihue dya'a, du na'a, du uxe. Pero binezile bi ta ilë'ële ta yezaque'le bi raca lao yedyi layu dza quiele. ⁴Yela' ben' mala quiele, yela' psanla'adyi' Diuzi quiele, rnabale hua' milagro ilë'ële. Pero rnia' le'e, tuzi milagro ilë'ële, huelë'ële gaca quia' cabë' milagro guca quie ben' profeta Jonás.

Te beyudyi una Jesús cana', psannë' lejë' uza'në' zioguë'.

Bireya'ala' gacaro pensari ca pensari
raca ja ben' partido fariseo len ja
ben' partido saduceo
(Mr. 8.14-21)

⁵Na' uza' Jesús lënë' yaca ben'
quiénë' ziojë' itzala' lagun. Na'
agula'adyi' ja ben' quie Jesús
hua'ajë' yëta xtila. ⁶Na'ra una Jesús
rëbinë' lejë':

—Cani rnia' le'e, gapale cuidado quie levadura quie ben' partido fariseo len ben' partido saduceo.

7 Na' uzulao ja ben' quie Jesús rëbijë' laguedyijë':

—Quie dan' binu'aro yëta xtila unë' ra'o cana!

8 Caora na' gucabë' Jesús cabë' pensari racajë', na'ra unë' rëbinë' lëjë':

—¿Bixquien' rdëbile quie yëta xtila? iBinegalele dyë'ëdi quia! **9** ¿Binetzioñe'ele cabë' naca quia? ¿Agula'adyi'le cabë' bia' quie lao ga'yo' yëta xtila? ¿Bireza'lala'adyi'le bala ga' naga ta yožo bega'n bezi'le? **10** ¿Lëzi bireza'lala'adyi'le cabë' bia' quie gadyi yëta xtila bžožoga'n udao ja tapa mila ja benë'? ¿Bireza'lala'adyi'le bala chicuiti ta yožo bega'n bezi'le? **11** ¿Bixquien' biuyoñe'ele quele quie yëta xtila unia' caora unia' le'e ta gapale cuidado quie levadura quie ben' partido fariseo len ben' partido saduceo?

12 Na'ra uyoñe'ejë' biunë Jesús quie levadurazi ta rudze'jë' yëta xtila. Unérë Jesús quie pensari raca ja ben' partido fariseo len ja ben' partido saduceo. Unë' reyal'ala' gapajë' cuidado ta bigacajë' pensari ca pensari raca ja ben' partido fariseo len ja ben' partido saduceo.

Unë Pedro naca Jesús Cristo, ben' use'ela' Diuzi

(Mr. 8.27-30; Lc. 9.18-20)

13 Cati bdyinlë Jesús yaca ben' quiénë' yu nebaba Cesarea de Filipo, na'ra unë' rëbinë' ja ben' quië':

—¿Biži rna ja benë' naca' në'ëdi', bichi yugulu benë'?

14 Na'ra una ja ben' quie Jesús rëbinë' lëbë':

—Balajë' rnajë' naco' Juan bautista. Ibalajë' rnajë' naco' profeta Elías, o chi profeta Jeremías. Ibalajë' rnajë' naco' tu ben' profeta tula, ben' unita' dza na'la.

15 Na' una Jesús rëbinë' lëjë':

—¿Cabiži ina le'e naca' në'ëdi'?

16 Na'ra una Simón Pedro rëbinë' lëbë':

—Luë' naco' Cristo, ži'i Diuzi, ben' neban tuzioli.

17 Na'ra una Jesús rëbinë' Pedro:

—Tahuen gula baonao', Simón, ži'i Jonás. Quele benë' bzioñe'enë' luë' cabë' naca' në'ëdi', dechan' Xuza' Diuzi zu guibá. **18** Në'ëdi' rna'luë' naco' Pedro, ta inaro xti'lidza'ro "yo". Con cabë' unao' quia' unao' naca' ži'i Diuzi, cana' cuioga' yaca ben' gale quia', yaca ben' rue quie xti'lidza'. Ba'alal'cazi chi yugulu taxi'ibi' huejan dila ta udyiagu'jan ja ben' rale quia', bisuejan huejan gan. **19** Guna' luë' yela' rnabë' quia' ta tzetixogue'lo' ja benë' bi huejë' ta tz'u'ujë' ga rnabë' Diuzi. Con cabë' yébo'jë' huejë', nacan zi huejë'n, na' huazu Diuzi puesto con ca inao!. Lëscan' con cabë' yébo'jë' bihuejë', nacan zi bihuejë'n, na' lëscan' huazu Diuzi puesto con ca inao!.

20 Na'ra gudyi Jesús lëjë' ta biquixogue'jë' benë' de que lëbë' naquë' Cristo.

Udixogue' Jesús cabë' gaca quie cati gatinë'

(Mr. 8.31—9.1; Lc. 9.22-27)

21 Na'ra uzulao Jesús ruxi'idze'në' yaca ben' quië' de que ruen

zi yeyonë' ciudad Jerusalén.
Ruxi'idze'në' lëjë' cabë' usaca yaca
benë', len ja ben' rnabë', len ja
xan' pxuzi, len ja ben' rusëdi ley
quie Moisés lëbë', na' gutijë' lëbë',
pero huebannë' lao tzona dza.

²²Na'ra uquië' Pedro Jesús tzala'la
uzulaonë' rdilanë' Jesús rëbinë'
lëbë':

—iBigue'en Diuzi gaca quio' cabë'
nao', Señor! iNica gacazi quio' luë'
cana'!

²³Na'ra uyécho Jesús ta inë Pedro
laohuë' rëbinë' lëbë':

—Bebiga' tzala'la, Satanás. Tazëdi
gula ruelo' quia!. Biraco' pensari
quie Diuzi. Pensari quie benë'
yu'ulo'!

²⁴Na'ra una Jesús rëbinë' ja ben'
quienë':

—Chi nu ben' re'en inao në'ëdi',
re'ennan bira inaoyaquë' ca rna
pensari quieyaquë'. Re'ennan
bidzebiyaquë' naoyaquë' në'ëdi'
yugu dza, ba'ala'cazi ruen žudyi
guti benë' leyaquë'. ²⁵Nu ben'
rdzebi inao në'ëdi', dan' rdzebinë'
gatinë' tanun quia!, bihue' Diuzi
lëbë' yela' neban tuzioli. Pero nu
ben' inao në'ëdi' birdzebinë' gatinë'
tanun quia!, hue' Diuzi lëbë' yela'
neban tuzioli. ²⁶¿Biži gan de quie
nu benë' anaca quie lao yugulute
ta de lao yedyi layu, chi bigata'
yela' neban quië' tuzioli? ¿Ca
gacala dumi re'ennan ta ga'o yaca
benë' yela' nabán tuzioli? ²⁷Naca'
bichi yugulu benë'. Huaya'a, pero
na' yeguida' tatula lao yedyi layu,
zeyu'a yela' rnabë' quie Xuza!.
Caora na' yeguidalia' yaca ángel
quienë' ta ichugulia' quie ja benë',
quižogal'jë' cabë' bëjë' dza udajë' lao

dyilayu, chi bëjë' tahuen, chi bëjë'
tamala. ²⁸Tali rnia' le'e, binegati
bala le'e nita' niga len në'ëdi' tu
binelë'ë inabi'a lao yedyi layu,
në'ëdi' bichi yugulu benë'.

**Ca guca bë' betza' cuin Jesús
zaca'lao lao yaca ben' quienë'**
(Mr. 9.2-13; Lc. 9.28-36)

17 Na'ra guca lao xopa
dza, uquië' Jesús Pedro,
len Santiago, len Juan bi' bichi
Santiago, uza'jë' ziojë' tu lao ya'a
sibi. ²Na' zë Jesús laojë' cati betza'
cuinnë', una' laohuë' ca xni' oba.
Na' žabë' betza'n una'n bezëri gula
ca xni' gui!. ³Na'ra blë'jë' labdyinte
Moisés len Elías ru'elëjë' Jesús
di'ídza!. ⁴Na' una Pedro rëbinë'
Jesús:

—Señor, tahuen na' nita'ndo'
niga. Chi re'enlo', huendo' tzona
yu'u guižidao!. Huendo' tun quio',
huendo' itun quie Moisés, len itun
quie Elías.

⁵Na' tu raca zë Pedro nanë' cana',
cati za' tu beo bezëri gula bdubin
lëjë!. Na' lu'u beo na' bejë' tu rchi'
benë' unënë' në':

—Lëži'ina' niga, lega nediyë'ëda'në'.
Lega rexeda' ca ruenë'. Ulezénaga
cabë' rnanë'.

⁶Na' cati be ja ben' quie Jesús
cana', na' udze'jë' gutajë' layu guzu
ru'ala dan' bdzebitzeguejë!. ⁷Na'ra
bebiga' Jesús gan' dejë' na' blapanë'
lëjë' unë' rëbinë' lëjë':

—Uleyasa, bidzebile.

⁸Na' cati beyasajë', rna'jë' tuzi
Jesús zénë' na!. Ganura nita' len
lëbë'.

⁹Na' bë' zeza'jë' zeyezijë' lë'ë ya'a
na', una Jesús rëbinë' lëjë':

—Biquixogue'le ja benë' cabë' ta blë'ele guca quia!, në'ëdi', ben' naca bichi yugulu benë!. Caora agutia' bebana', na'ra huazaque' quixogue'lejë!.

¹⁰Na'ra una ja ben' quie Jesús rëbijë! lënë!:

—Rna yaca ben' rusëdi ley quie Moisés de que za' guida Elías tanëro, na'ra guida ben' ise'ela' Diuzi. ¿Ta balejë! rnajë! cana?!

¹¹Na' una Jesús rëbinë! lejë!:

—Tali na' za' guida Elías tanëro, ucuezanë! duzete cuenda guida itu ben' ise'ela' Diuzi. ¹²Pero në'ëdi' rnia' le'e, abida Elías, pero bibezaque ja benë' chi lëbë!. Psacajë! lëbë! bizinaquezi. Lëscan' në'ëdi', ben' naca bichi yugulu benë!, usacajë! në'ëdi' bizinaquezi.

¹³Na'ra gucabë! ben' quie Jesús unëñë! quie Juan bautista caora unë!: “Tali na' za' guida Elías tanëro.”

Beyue Jesús tu xcuidi' byu yu'ubi'
taxi'ibi' mala gula

(Mr. 9.14-29; Lc. 9.37-43)

¹⁴Cati bedyinjë! ga negu'udi' ja benë!, na'ra ubiga' tu be'mbyu gan' zë Jesús uditzunë! žibinë! laohuë! unë! rëbinë! lëbë!:

¹⁵—Señor, ¿biyeyéchi'la'adyo' ūl'ina? Racabi' žuguti. Lega rusacan lëbi!. Tazë lassa babzalan lëbi! lao gui' len lu'u nisa. ¹⁶Ni rdehua'abi' lao ja ben' quio!, pero birzaque'jë! yeyuejë!bil.

¹⁷Na' una Jesús rëbinë! ben' zu na':

—Le'e biralele quia!. Biyu'ule pensari dya'a. ¿Gaca tu tiempo sulia' le'e, na' bigalele quia? ¿Gaca

tu tiempo sulia' le'e, na' birioñe'ele? Yexi'ibi' niga.

¹⁸Na'ra udila Jesús taxi'ibi' yu'u lu'u laxta'o xcuidi' byu. Na' bebioguë! lenan. Cana' labeyacatebi!.

¹⁹Ude beyudyi na', uquië! ben' quie Jesús lëbë! tzala'l'a unajë! rëbijë! lëbë!:

—¿Bixquier! biužaque'ndo' yebibondo' taxi'ibi?!

²⁰Na' una Jesús rëbinë! lejë!:

—Biužaque'le dan' binegalele dyë'ëdi. Tali rnia' le'e, naca bini mostaza tu bini dao' bicu'zi. Na' chi hue quiele xti'ldza' Diuzi la'acazi lë'ëti'dao' bicu'zi ca tadao' bicu' naca bini mostaza, huazaque' yëbile tu ya'a: “Beyo yesu na'la”, na' huayon. Pues huazaque' huele yugulute. ²¹Pero ca naca taxi'ibi' bebioga' na'a, chi biulidzale Diuzi, chi bihuele ubasi, bisaque' cuiolen yeyon.

Udixogue' Jesús tatula cabë' gaca
quië' bë' gatinë'

(Mr. 9.30-32; Lc. 9.43-45)

²²Tu raca rdalë Jesús ben' quiénë! estado Galilea, udixogue'në! lejë!
cabë' gaca quiénë! dan' naquë! bichi yugulu benë!. Unë! usedyin ja benë! lëbë! lao na'a ja ben' rudie lëbë!

²³ta gutijë! lëbë!, pero huebannë!
tatula gaca lao tzona dza. Cati be yaca ben' quiénë! cabë' unë!,
guquel'jë! bayéchi' gula.

Unë Jesús quie impuesto
quie idao' rnabë'ra

²⁴Na'ra uza! Jesús lënë! ja
ben' quië! ziojë! bdyinjë! ciudad
Capernaum. Na' uyo ben' huequižu

quie idao' rnabë'ra yena'jë' Pedro unajë' rëbijë' lëbë':

—¿Biquížu maestro quiele impuesto quie idao' rnabë'ra?

²⁵Na' una Pedro rëbinë' lëjë':

—Aja', huaguižunë'n.

Na' uza' Pedro zionë' žan yu'u.

Cati bdyinnë' žan yu'u, na' una Jesús rëbinë' lëbë':

—¿Bi ca inao', Simón? ¿Cati ruquižu ja rey impuesto, nuži ruquižujë'? ¿Ruquižujë' ben' yedyi quiejë' o chi ruquižojë' ben' za' yedyi tula?

²⁶Na' una Pedro rëbinë' lëbë':

—Ruquižujë' ben' za' yedyi tula.
Na' una Jesús rëbinë' lëbë':

—Tana' lena' biruen zi quižu ben' yedyi quie rey impuesto. ²⁷Pero ta biidza' nitujë' ra'o, quižoro quie impuesto. Na' uyo ru'a lagun, bdze' yëchi' lu'u nisa. Cati guébi bela len, yeya'ala'n len lëba', caora na'ixa'lo' ru'aba' yedzelelo' centavo ta quižulo' para luë' len në'ëdi' quie impuesto. Na' uyo yetižo'n na'a.

¿Nuži ben' nacara ben' belao?

(Mr. 9.33-37; Lc. 9.46-48)

18 Na'ra bebiga' yaca ben' quie Jesús unajë' rëbijë' lëbë':

—¿Nuži ben' nacara ben' belao entre nëto'?

²Na' guži Jesús tu xcuidi' byu bzunë'bi' gatzo la'ojë'. ³Unë' rëbinë' lëjë':

—Tali rnia' le'e, chi biutzal'e pensari quiele, galele quie Diuzi ca rale nu xcuidi' quie xuzibi', bisaque' tziole guibá ga rnabë' Diuzi. ⁴Nu ben' rzudyi'ilë Diuzi cabë' rzudyi'ilë xcuidi' xuzibi', lëben' na' nacara ben' belao guibá ga rnabë' Diuzi.

⁵Nu ben' rzi' xcuidi' ca bi' niga tanun quia', nuen quienë' lente në'ëdi' rzi'rënë'.

Unë Jesús nacan žudyi gula huero tamala

(Mr. 9.42-48; Lc. 17.1-2)

⁶Na' una Jesús:

—Nu ben' rudze'yela tu xcuidi' rale quia' ta huebi' tamala, hue Diuzi lëbë' castigo že gula. Tadya'acala quienë' erio tu yo že luba'në' tzechu'unjë' lëbë' lu'u yao že ga naca zitu' gula, quele ca castigo hue Diuzi lëbë!. ⁷Nacan bayëchi' gula quie ja ben' nita' lao yedyi layu, dan' birdziogue nu rudze'yela lëjë' huejë' tamala. Nita'cazi nu rudze'yela ja benë' huejë' tamala, pero hue Diuzi castigo že gula nu ben' rudze'yela benë' huejë' tamala.

⁸'Quie lena', chi rnëñ le'e huelële ni'a na'ale tamala, nacalan dya'a ichugulen chu'unlen zitu' tziole guibá ca ben' nedypa ni'a në'ë, quele ca ta tziole gui' gabila tuzioli len ni'a na'ale. ⁹Lëscan' chi rnëñ le'e huelële laole tamala, nacalan dya'a cuiolen chu'unlen zitu' tziole guibá ca ben' nero yolahue, quele ca ta tziole gui' gabila len rupa la'a yolahue.

Unë Jesús tu di'idza' quie beco' ži'ilä', bia uniti

(Lc. 15.3-7)

¹⁰Na' una Jesús:

—Bireya'ala' ilë'ële zi' nu xcuidi' rale quia'. Rnia' le'e zu ángel, ben' rapa ja xcuidi', zujë' lao Xuza' Diuzi zu guibá yugu dza. ¹¹Në'ëdi', ben' naca bichi yugulu benë', uza'a bida'

lao dyilayu tacuenda ute usela'
yugu ben' nita' lao yedyi layu como
dan' yela' napa xquia quiejë' tziojë'
lao gui' gabilia.

¹²¿Bica nale? Chi rapa tu
be'mbyu tu gayuhua beco'
ži'ilila', na' aoniti tuba', ¿quele
uca'nñë'jaba' na'azi tu tzediloguë'
bia uniti? ¹³Chi yedzelenë'ba',
lega yedaohuenë' biunitiba!
Redaohuenë' quie yaca bia biuniti,
pero redaohueteranë' quie bia uniti
bedzela. ¹⁴Lëscan' Xuziro Diuzi zu
guibá, bire'ennë' initi ni tu xcuidi'.

Cabë' reya'ala' huero si'žero quie laguedyiro

(Lc. 17.3)

¹⁵Na' una Jesús:

—Chi bë tu ben' rue quie xti'idza'
Diuzi tu tamala quio', reya'ala'
hue'lao'në' tu di'idza' rupazile ta
inezinë' ca tamala bënë' quio!. Cana'
gacalélo'në' usannë' tamala, huenë'
tady'a'. ¹⁶Pero chi bihuenë' casa
quio', na' reya'ala' guëžo' ichopa
tzona ben' rue quie xti'idza' Diuzi
ta gacajë' testigo. Cana' inita' chopá
tzona ben' naca testigo quio' cabë'
naca di'idza' hue'lao'në!. ¹⁷Chi
bihuenë' casa quie ja testigo quio',
na'ra yëbo' ja Yugulu ben' rue quie
xti'idza' Diuzi cabë' dan' bënë'
quio!. Na' chi bihuenë' casa quie ja
Yugulu ben' rue quie xti'idza' Diuzi,
na'ra reya'ala' ilë'ëlenë' ca nu ben'
binuebë' chi zu Diuzi, ilë'ëlenë' ca
nu ben' mala gula.

¹⁸Tali rnia' le'e, con cabë' yëbile
yaca ben' rue quie xti'idza' Diuzi
ta hueyaquë' quie ben' bë tamala,
nacan zi hueyaquë'n, huazu Diuzi
puesto con ca inale. Lëzi con cabë'

yëbile yaca ben' rue quie xti'idza'
Diuzi ta bihueyaquë' quie ben' bë
tamala, nacan zi bihueyaquë'n,
lëscan' huazu Diuzi puesto con ca
inale.

¹⁹'Lëzi rnia' le'e, chi chopá le'e
bega'nle de acuerdo hue'lële Xuza'
Diuzi zu guibá di'idza', inabale bi
ta re'enle huenë', na' huenë' ca ta
unabale huenë!. ²⁰Lëzi rnia' le'e,
ga regu'udi' chopá tzona ben' rale
quia', rulidzajë' në'ëdi', nazua'
gatzo la'oje'.

²¹Na'ra bebiga! Pedro ga zë Jesús
unë' rëbinë' lëbë':

—Señor, ¿bala lasa ruen zi si'žia'
quie ben' rue quie xti'idza' Diuzi
ca tamala ruenë' quia'? ¿Lao gadyi
lasazi si'žia' quiénë'?

²²Na'ra una Jesús rëbinë' Pedro:

—Quele lao gadyi lasazi si'želo'
quiénë', pero con balatezi lasa
inabanë'n si'želo' quiénë'.

**Bzu Jesús tu ejemplo quie tu mozo,
ben' bigu'un si'že quie laguedyiro**

²³Na' una Jesús:

—Na' rnia' le'e cabë' rnabë'
Diuzi. Ruenë' ca nu rey, ben' bëlë
ja mozo quiénë' cuenda gaca tu
reya'ala'jë' quiénë!. ²⁴Uzulaonë'
ruenë' cuenda len ja mozo quië'
cati yexi'në' tunë', ben' reya'ala'
quiénë' dumi že gula. ²⁵Pero como
bide dumi ta yeguižuguë' quie
rey, na'ra bë rey mandado guti'në'
yugulu ta de quiénë', huenë' dyin
sin lažu len nigula quiénë' len
ži'inë' ta yela' ta reya'ala'në' quie
rey. ²⁶Na'ra uditzužibi mozo na' lao
rey na', unabayéchi'në' rëbinë' rey:
“Señor, uži'že quia!. Nayequižuga'n
duženan.” ²⁷Na' beyéchi'lla'adyi'

rey na' lëbë', unë' rëbinë' lëbë': "Huazi'žia' quio', gabi reya'alo' quia!. Anaco' libre." ²⁸Cati beronë' gan' zu rey na', na'ra bedilanë' itu mozo laguedyinë', ben' reya'ala' quiénë' tu chop'a tzona dumi dao'. Na' aoženë' du luba'në' rëbinë' lënë': "iUdižu ta reya'alo' quia!" ²⁹Na'ra uditzužibi laguedyinë' unabayéchi'në' rëbinë' lënë': "Señor, uži'že quia!. Nayequižuga'n duženan." ³⁰Pero bigu'unnë', na' uyónë' yedze'në' lënë' lu'u dyiguiba ta yeguižunë'n. ³¹Cati blë'ë ja mozo tula cabë' bënë' quiénë', lega beyéchi'la'adyi'jë' lënë' uyojë' yeguëdyijë' rey na' ca ta užacanë'. ³²Na'ra guži rey na' mozo quië' unë' rëbinë' lënë': "iBen' mala gula naco!! Në'ëdi' uži'žia' quio' ca ta reya'alo' quia' como dan' unabayécho' laohua!. ³³Reya'ala' yeyéchi'la'adyi'rao' laguedyilo' cabë' bia' në'ëdi', beyéchi'la'adya' luë!." ³⁴Na'ra bdza'tzegue rey na' lënë'. Bënë' mandado udzel'jë' lënë' lu'u dyiguiba ta yeguižunë'n ta reya'ala'në' quiénë'.

³⁵Na' bë' beyudyi di'idza' una Jesúś, unë' rëbinë' ben' quiénë': —Cabë' bë rey na', cana'rë hue Xuza' Diuzi zu guibá conlë le'e, chi bisi'žele quie laguedyile du guicho du la'adyi'le cabë' tamala bënë' quiele, lëscan' bisi'že Diuzi le'e cabë' tamala ruele. —Cana' una Jesúś rëbinë' lëjë'.

Unë Jesúś cabë' naca quie ben' rusan laguedyi

(Mr. 10.1-12; Lc. 16.18)

19 Te beyudyi una Jesúś cana', uza'në' estado Galilea,

ziolënë' yaca ben' quië' estado Judea itzala' yao Jordán. ²Na' unao ja ben' zë lëbë' ga zioguë' beyuenë' ja ben' raca žhue!

³Na'ra bebiga' chop'a tzona ben' partido fariseo ga zë Jesúś ta huejë' lëbë' trampa gaojë' lëbë' xquia. Tana' unajë' rëbijë' lëbë':

—¿Ta bala nitu nitu biru'en lato usanjë' nigula quiejë'?

⁴Na' una Jesúś rëbinë' lëjë':

—¿Binena'le cabë' rnë lë'ë la'iya guichi quie Diuzi? ¿Binenezile cabë' bënë' cati uléchinë' dyilayu, bzaloguë' tu be'mbyu len tu nigula?

⁵Lëscan' una Jesúś rëbinë' lëjë':

—Quie lena' rusán be'mbyu xuzi žnë'ë ta sulënë' nigula quiénë', gacajë' tuzi. ⁶Cati banacajë' tuzi, bira naca quiejë' ca quie chop'a benë'. Dyin quie Diuzi nuelëjë' tuzi. Tana' lena' biru'en lato usanjë' laguedyijë'.

⁷Na' unajë' rëbijë' lëbë':

—¿Bixquieren', chi', bë' Moisés lato ichisa be'mbyu guichi ga rue'n di'lidza' bira re'ennë' sulënë' nigula? Na' hue'në' nigula guichi ta usannë' lënë'.

⁸Na' una Jesúś rëbinë' lëjë':

—Yela' zidi quie ja benë' bë' Moisés lato usanjë' nigula quiejë'. Pero dza uléchi Diuzi dyilayu, bigu'unnë' hue yaca benë' cana'.

⁹Në'ëdi' rnia' le'e, chi rusán be'mbyu nigula quië', na' uži'në' nigula tula, lena' nacan xquia quië' lao Diuzi. Chi psannë' lëbë' dan' udalénë' be'mbyu tula, lena' binacan xquia quië' lao Diuzi.

Lëscan' chi yezi' be'mbyu tu nigula psan xquiuhue, lena' nacan xquia quië' lao Diuzi.

10 Na' una ben' quie Jesús rëbinë' lëbë!:

—Chi nacan cabë' rnao' quie be'mbyu len nigula quienë', bisi'calanë' nigula.

11 Na' una Jesús rëbinë' lëjë!:

—Quele yugu ja benë' rioñe'ejë' cabë' rnë lë'ë guichi la'iya quie Diuzi. Yaca ben' bë' Diuzi yela' rioñe'e quie, lëjë' rioñe'ejë'n. **12** Bala ja be'mbyu binaca quiejë' sulëjë' nigula. Cana' naca quiejë' cati golotejë!. Ibalá ja be'mbyu binaca quiejë' sulëjë' nigula, dan' ulio benë' bini quiejë!. Ibalá ja benë' bisulëjë' nigula tacuenda huejë' puro dyin quie Diuzi. Nu ben' ruzënaga cabë' rnia', reya'ala' uzénagajë' dyë'ëdi.

Bëla'iya Jesús ja xcuidi'

(*Mr. 10.13-16; Lc. 18.15-17*)

13 Na'ra nequië' ja benë' bala ja xcuidi' ga zë Jesús ta guxonë' guichojabí' ta huela'iyanë' lëjabí' hue'lénë' Diuzi di'idza' tanun quiejabi!. Pero ja ben' quienë' uzulaojë' rdilajë' ja ben' nequië' ja xcuidi!. **14** Na' una Jesús rëbinë' ben' quië!:

—Ulesan quiejë!. Guidagara ja xcuidi' sulëjabí' në'ëdi!. Nu ben' tzio ga rnabë' Diuzi ruen zi sudyi'ilëjë' Diuzi cabë' rzudyi'ilë xcuidi' len xuzijabi!.

15 Na' bëxonë' guicho ja xcuidi' ta bëla'iyanë' lëjabí!. Ude na' uzë'ë zioguë!.

Tu ben' ru'abe nacanë' ben' uña'a bë'lénë' Jesús di'idza'

(*Mr. 10.17-31; Lc. 18.18-30*)

16 Na'ra uyo tu ben' ru'abe yena'në' Jesús. Na' unanë' rëbinë' lëbë!:

—Maestro, ben' huen naco!. ¿Ca bi reya'ala' hua' ta gata' yela' neban quia' tuzioli?

17 Na' una Jesús rëbinë' lënë!:

—Ben' huen unao' në'ëdi!. Tahuen na' unao' në'ëdi' cana', como dan' tuzi Diuzi naquë' ben' huen. Na' chi re'enlo' tzio' guibá gata' yela' neban quio' tuzioli, ruen zi hue quio' cabë' naca mandamiento quie Diuzi.

18 Na' unanë' rëbinë' Jesús:

—¿Ca bi mandamiento reya'ala' hue quia'?

Na' una Jesús rëbinë' lënë!:

—Bigutio' benë', bitalao' žgula ben' tula, bicuanlo' quie benë', bisiu' yë'!. **19** Gapala'nlo' xuzi žnao', edyë'ëlo' benë' ca nedýë'ëlo' cuinlo'.

20 Na' una ben' ru'abe rëbinë' Jesús:

—Yugulute cabë' nao!, rua'nan cati nacatia' xcuidi!. ¿Bižira ta rdziogueda' hua'?

21 Na' una Jesús rëbinë' lënë!:

—Chi re'enlo' huelo' yugulu ca re'en Diuzi huelo', uyo yeguëti' ta de quio', bë' ja ben' yëchi' centavo quien. Chi huelo' cana', na'ra gata' tadya'a quio' ga zu Diuzi guibá. Na' guido' inaolo' në'ëdi!.

22 Pero cati be ben' ru'abe ca una Jesús, na'ra zeyonë' raquenë' bayëchi' dan' nacanë' ben' uña'a gula.

23 Na'ra una Jesús rëbinë' ja ben' quië!:

—Tali rnia' le'e, zëdi gula nacan tzio yaca ben' uña'a guibá ga zu Diuzi. **24** Rnia' le'e tatula, cabë' nacan zëdi gula te tu camello lu'u ni'a yëchi', cana' nacarën zëdi quie ben' uña'a tzionë' ilë'ënë' ga zu Diuzi guibá.

25 Na' bë' be ja ben' quie Jesús cabë' unë', tu bebanzijë' unajë' rëbijë' laguedyijë':

—¿Ca nuži saque' tzio guibá ga zu Diuzi?

26 Na' una' Jesús rëbinë' lëjë':

—Ca ta bigaca ja benë' huejë', Diuzi sí, racanë' ruenë'n como dan' raca rue Diuzi yugulute.

27 Na'ra una Pedro rëbinë' Jesús:

—Señor, nusando' yugulu ta de quiendo' ta inaondo' luë'. ¿Ca biži ta gaca quiendo' guibá?

28 Na' una Jesús rëbinë' lëjë':

—Tali rnia' le'e, cati idyin dza yecubi yugulute ta de na'a, cati cui'a në'ëdi', ben' naca bichi yugulu benë', xlatoga', na'ra le'e, ben' unao në'ëdi', caora na' cue'rële lao chipchopa xlatole ta ichugulile lao chipchopa cue' ben' Israel. **29** Rnia' le'e, yugu ben' psan žan yu'u quie, o chi nu biche, o chi nu zane, o chi nu xuze žnë'ë, o chi nu žgule, o chi nu ži'ine, o chi nu layu quie tanun quia' në'ëdi', hue'ra Diuzi lëbë' tu gayuhua lasa mazara ca ta psannë'. Lëzi hue' Diuzi lënë' yela' neban quiénë' tuzioli. **30** Pero bala ben' naca ben' belao niga lao yedyi layu, bira gacajë' ben' belao dza yedyinjë' ga zu Diuzi. Lëscan' bala ben' binaca ben' belao niga lao yedyi layu, huacajë' ben' belao dza yedyinjë' ga zu Diuzi.

Unë Jesús tu di'idza' quie
ja ben' bë dyin

20 Na' una Jesús:

—Na' rnia' le'e cabë'
rue Diuzi. Ruenë' ca nu ben' xan'
layela, ben' uyo balara yegue'lë
benë' di'idza' ta yezi'jë' usecho

quie bedzuli' quiénë'. **2** Na' bë'lënë'

ben' hue dyin quiénë' di'idza' ta quižuguë' lëjë' tu dumi plata tu dza. Ude na' use'elë' lëjë' tzeguejë'
dyin layela quiénë'. **3** Ude na' uzë'lë
zioguë' ca du las nueve quie zila.
Na' blë'ënë' bala ben' rda cana'zi
la'o yedyi. **4** Na' unë' rëbinë' lëjë':
“Uletziorë le'e, tzeguele dyin yezi'le
usecho quia'. Naquižuga' le'e quie
tu dza quiele.” Na' uyojë' hue dyin
quiénë'. **5** Na' uzë'lë zioguë' tatula
ca du la'odza, bënë' cabë' bënë'
zila quie ben' hue dyin quiénë'.
Lëzi uzë'lë zioguë' tatula ca du
las tres quie zadze', bënë' cabë'
bënë' la'odza quie ben' hue dyin
quiénë'. **6** Na'ra uzë'lë zioguë' la'o
yedyi tatula ca du las cinco quie
zadze'. Na' bedilanë' ibala ja ben'
rdaja cana'zi. Na' unë' rëbinë'
lëjë': “¿Bixquieren' rda le'e niga
cana'zi bedu dza, gabi dyin ruele?”

7 Na' unajë' rëbijë' lëbë': “Rdando'
cana'zi como dan' nitu nunu bida
ina nëto' huendo' dyin.” Na'ra unë'
rëbinë' lëjë': “Uletziorë le'e tzeguele
dyin layela quia'. Naquižuga' le'e
quie tu dza quiele.” **8** Cati baodze',
na'ra unë xan' layela rëbinë' ben'
quižu mozo: “Guži ja mozo na',
quižulo'jë'. Tanëro quižulo' ben'
uyu'u cati beyudyite dyin. Na'ra
quižulo' ben' uyu'u tanëro.” **9** Na'ra
ude ja ben' yu'u ja dyin ca du las
cinco quie zadze'. Na' aodižuguë'
lëjë' quie bedu dza quiejë' tu hui
dumi plata. **10** Na'ra ude ja ben'
yu'u ja dyin tanëro. Na' guquejë'
huaguižuguë' lëjë' mazara. Pero
udižuguë' lëjë' tu huiocazi dumi
plata. **11** Bë' uži'jë' xlažujë' rnëjë'
rdza'jë' rëbijë' xa'n layela: **12** “Ja

ben' uyu'u cati beyudyite dyin, ca tu horazi bëjë' dyin. Na' udižulo'jë' lëbi len nëto' bëndo' dyin bedu dza aozuendo' tala bedu dza." ¹³Na' una xan' layela rëbinë' tu ben' uyu'u dyin tanëro: "Bicha', quele tamala bia' quio!. ¿Quele bega'nro di'idza' quižuga' luë' tu dumi plata quie tu dza quio? ¹⁴Ni de xlažulo', beyo. Chi re'enda' quižuga' ben' uyu'u cati beyudyite dyin lëbi cabë' aodižuga' luë', abihuena quio!. ¹⁵O chi bire'enlo' hua' ca re'enda' len dumi quia? ¿O chi raquežë'llo' në'ëdi' dan' rua' tadya'a?" ¹⁶Na' una Jesús rëbinë' lëjë':

—Na'ra në'ëdi' rnia' le'e, bala ben' binaca ben' belao niga lao yedyi layu, huacajë' ben' belao dza yedyinjë' ga zu Diuzi. Lëscan' bala ben' naca ben' belao niga lao yedyi layu, bira gacajë' ben' belao dza yedyinjë' ga zu Diuzi. Rëzi Diuzi ben' zë, ben' inao xnezë!, pero balazijë' guida inao xnezë!.

Unë Jesús tatula cabë' gaca cati gatinë'

(Mr. 10.32-34; Lc. 18.31-34)

¹⁷Na' uza' Jesús lënë' chipchopa ben' quienë' ziojë' ciudad Jerusalén. Na' tu neza gužinë' lëjë' tzala'lá unë' rëbinë' lëjë':

¹⁸—Ablë'ële bazioro ciudad Jerusalén gan' usedyin benë' në'ëdi' lao na'a xan' pxuzi, len lao na'a ben' rusëdi ley quie Moisés. Na' rusaqueljë' në'ëdi' nacala ca huejë' gutijë' në'ëdi', ben' naca bichi yugulu benë!. ¹⁹Na' lëjë' usedyinjë' në'ëdi' lao na'a ben' za' yedyi tula ta utitujë' në'ëdi', gunjë' në'ëdi' zi', uda'jë' në'ëdi' lë'lë yaga cruzo gatia!. Pero huebana' lao tzona dza.

Unaba žna' Santiago len Juan tu cule lao Jesús (Mr. 10.35-45)

²⁰Na'ra bebiga' rupa ū'i Zebedeo, Juan len Santiago, len žna'jë' ga zë Jesús. Na' uditzu žna'jë' žibinë' lao Jesús ta inabë' lëbë' tu cule. ²¹Na'ra una Jesús rëbinë' lëbë':

—¿Biži dan' re'enlo' hua' quio?

Na' unë' rëbinë' Jesús:

—Chi bihuu' cule, huelo' mandado cue' ū'ina' niga cuëto' cati bare'llo' xlatolo' rnabë'llo'. Rnaba' huu' mandado cue'bi' tubi' zaqué' yebë, itubi' cue'bi' zaqué' yega!.

²²Na'ra una Jesús rëbinë' lëjë':

—Binezile cabë' dan' aonabale në'ëdi!. ¿Huazuele sacale cabë' usaca benë' në'ëdi'? ¿Huazuele yedzagalaole cabë' yedzagalaohua?

Na' unajë' rëbijë' lëbë':

—Aja', huazuendo!

²³Na' una Jesús rëbinë' lëjë':

—Tali ca nale. Usaca benë' le'e cabë' usacajë' në'ëdi', na' yedzagalaole cabë' yedzagalaohua!. Pero quele në'ëdi' hua' mandado ta cue'le cuëta' tzala' huio. Xuza' Diuzi huenë' mandado nu ben' cue' cuëta' tzala' huio.

²⁴Cati be ichi ben' quie Jesús cabë' unaba Santiago len bichinë' Juan, na'ra bdza'jë' lëjë!. ²⁵Pero guži Jesús lëjë' unë' rëbinë' lëjë':

—Le'e nezile dyë'ëdi cabë' rue ja ben' naca gobierno, rnabë'jë' ū'laza. Redaohuejë' huejë' mandado zëdi hue ja benë!. ²⁶Pero le'e, bireya'ala' huele cana!. Nu ben' rnabë' quie ja ben' rue quie xti'lidza' Diuzi, ruen zi gacaléjë' laguedijë!. ²⁷Lëscan' nu ben' belao quie ja ben' rue

quie xti'ida' Diuzi, ruen zi huejé' pensari bi huejé' ta gata' tadya'a quie laguedyijé'. ²⁸Huele cabé' rúa' nē'ëdi', ben' bichi yugulu bené'. Quele bida' ta hue ja bené' tadya'a quia!. Bida' ta hua' tadya'a quiejé', gatia' lao lazajé' gacajé' libre, bira inao dula' xquia quiejé' lëjé'!

Beyue Jesús chopá ben' laochula

(Mr. 10.46-52; Lc. 18.35-43)

²⁹Cati uza'jé' yedyi Jericó, unao ben' zé gula Jesús. ³⁰Na' ga udejé' re' chopá ben' laochula cuéta neza. Cati bejé' za' Jesús, na'ra urediyiya'jé' unajé' rëbijé' Jesús:
—Señor, ū'i suba xuzixta'oro rey David lué!. Beyéchi'l'a'adyi'néto!.

³¹Na' udila ja bené' lëjé' rëbijé' lëjé' ta cue'jé' chizi. Pero urediyiya'rajé' zidzo gula unajé' rëbijé' Jesús:
—Señor, ū'i suba xuzixta'oro rey David lué!. Beyéchi'l'a'adyi' néto!.

³²Na'ra uleza Jesús gužiné' ja ben' laochula, uné' rëbiné' lëjé':
—¿Biži dan' re'enle hua' quiele?

³³Na' unajé' rëbijé' Jesús:

—Señor, re'enndo' yelé'ëndo!.

³⁴Na'ra beyéchi'l'a'adyi' Jesús lëjé', užené' laojé' labelé'ëtejé' unaojé' Jesús.

Cabé' guca cati bdyin Jesús ciudad Jerusalén

(Mr. 11.1-11; Lc. 19.28-40; Jn. 12.12-19)

21 Na' bdyinjé' yedyi Betfagé' ga nacan ga'ala' ga re' ciudad Jerusalén. Léscan' nacan ga'ala' ga re' tu ya'a laona ya'a Olivos. Na'ra use'ela' Jesús chopá ben' quiené' ²rëbiné' lëjé':
—Uletzio yedyi na!. Na' yedzelele tu burra nerioba' lëba' ū'iiba!. Ulexédyiba'

ulequié'ba' niga. ³Chi ina bené' rëbijé' le'e: “¿Bixquien' iquié'leba?” na' yébilejé!: “Re'en Señor na' lëba!. Na' laidesantendo'ba' itu chi!.” —Cana' una Jesús rëbiné' lëjé!.

⁴Cana' guca ta uzu di'ida' quie Diuzi ta bzu ben' profeta lë'ë guichi. Lëdi'ida' nan caniga:

⁵ Uleyébi ben' ciudad Jerusalén caniga:

“Le'e ben' ciudad Jerusalén, ulena', aza' rey quie, naquë' ben' gaxo, dyianë' tu burra, ū'i bia ru'a yua!.”

⁶Na'ra uyo ja ben' quié!, bëjé' cabé' mandado bë Jesús huejé!. ⁷Na' uquié'jé' burra len ū'iiba' uxubajé' žabajé' xcu'udzuba', na' udyia Jesús lëba', ziojé' bdyinjé' ciudad Jerusalén. ⁸Ben' zé nita'jé' tu neza udixujé' žabajé' ga ude Jesús. Ibalajé' uchugujé' taca' palma udixuréjé' tu neza ga udené!. ⁹Na' ja ben' zioja dyialao lao Jesús len ja ben' zioja zenao lëbë', uzulaojé' rnéjé' zidzo rnajé!:

—iBen' že lué!, ū'i rey David!
La'iya naco' zao' lao na'a Diuzi.
iBen' že Diuzi!

¹⁰Cati uyu'u Jesús ciudad Jerusalén, na' bebane ja bené' unajé' rëbijé' laguedyijé':

—¿Nuži ben' niga?

¹¹Ibalajé' unajé' rëbijé' lëjé!:

—Ben' profeta Jesús, ben' yedyi Nazaret quie estado Galilea.

Belao Jesús ja ben' yu'u huëti' lu'u idao' rnabé'ra

(Mr. 11.15-19; Lc. 19.45-48; Jn. 2.13-22)

¹²Ude na' uyu'u Jesús lu'u idao' rnabé'ra belaochué' ja ben' yu'u huëti' lu'u idao' rnabé'ra na'. Bzalé' ja mesa quie ja ben' rutza' dumí.

Lëscan' bzalë' sillä quie ja ben' yu'u huëti' paloma. ¹³Na' unë' rëbinë' lëjë':

—Lë'ë guichi la'iya quie Diuzi rnán caniga: "Idao' rnabë'ra quia' nacan ga hue'lë ja benë' Diuzi di'idza'. Pero le'e abetza'lén ruelen ca beló ga regu'udi' ben' uban."

¹⁴Na' lu'u idao' rnabë'ra ga zë Jesús, ubiga' bala ben' laochula len ben' ū, na' beyuenë' lëjë'. ¹⁵Pero ja xan' pxuzi len ja ben' rusëdi ley quie Moisés, bdza'jë' cati blë'ëjë' cabë' milagro bë Jesús. Lëscan' bdza'jë' cati bejë' rnë ja xcuidi' zidzo lu'u idao' rnabë'ra najabi': "Ben' ū luë', ū'i rey David." ¹⁶Na' bdza'jë' unajë' rëbijë' Jesús:

—¿Abelo' cabë' na ja xcuidi'?

Na' una Jesús rëbinë' lëjë':

—Aja', beda' cabë' rnajabi'. Pero le'e, ¿cómo binelabale cabë' nan quiejabi' lë'ë guichi la'iya quie Diuzi? Rnén nan caniga:

Dyin bë Diuzi rula ja xcuidi' dao', bi' nera'adyi', alabanza huen gula.

¹⁷Na'ra psan Jesús lëjë' uza'në' ciudad Jerusalén ziolënë' yaca ben' quië' yedyi Betania. Na' bega'një' tu yela.

Bdze'de' Jesús yaga higo dan' bidyian tažixi

(Mr. 11.12-14, 20-26)

¹⁸Na' beteyu zila, uzë'ë ziolënë' yaca ben' quië' ciudad Jerusalén. Na' tu neza zioguë' cati uduenë'.

¹⁹Na' blë'ënë' zu tu yaga higo cuëta neza. Na' udenë' unë'ë ta yedzelenë' tažixi quien, pero gabi bedzelenë'. Na' una Jesús:

—Bira cuiacazi yaga ni tažixi.

Na' laobidyite yaga higo. ²⁰Cati blë'ë ja ben' quië' cabë' guca quie yaga higo, na'ra bebanejë' unajë' rëbijë' Jesús:

—¿Cabiži guca quie yaga higo laobidyiten?

²¹Na' una Jesús rëbinë' lëjë': —Tali rnía' le'e, chi rzudyi'iléle Diuzi du guicho du la'adyi'ilé, huazaque' huele cabë' bia' quie yaga higo. Na' quele tuzi quie len huele, pero lëscan' huazaque'rë huele mandado te tu ya'a tzion lu'u nisadão', na' huayonan. ²²Con bita inabale lao Diuzi hue'lëlenë' di'idza', chi rzudyi'iléle Diuzi du guicho du la'adyi'ilé, gunnë'n quiele.

Cabë' naca quie yela' rnabë' quie Jesús

(Mr. 11.27-33; Lc. 20.1-8)

²³Na'ra beyu'u Jesús lu'u idao' rnabë'ra tatula. Na' tu zunë' rusëdinë' benë' cati ubiga' ja xan' pxuzi, len ja ben' rnabë' quie ja ben' Israel, unajë' rëbijë' Jesús:

—¿Bi yela' rnabë' de quio'? ¿Nu quie yela' rnabë' blaolo' ben' yu'u huëti' lu'u idao' rnabë'ra?

²⁴Na' una Jesús rëbinë' lëjë':

—Lëscan' re'enda' inaba' le'e tu di'idza'. Chi iquébile quia' dyë'ëdi, na'ra inia' le'e nu quie yela' rnabë' blaohua' ben' yu'u huëti' lu'u idao' rnabë'ra. ²⁵¿Nuži use'ela' Juan ta hue'në' lao benë'? ¿Use'ela' Diuzi lëbë'? ¿O chi ta racazi la'adyi'në' bidë'?

Na' uzulaojë' najë' rëbijë'
laguedijë'!

—Chi yébironë': "Diuzi use'elë'
lëbë'", na' huanë' ra'o: "¿Bixquiñ
bigulele quienë'?" ²⁶Pero chi

yëbironë!: “Ta racazi la'adyi'në! bidë!”, caora na' huadza' ja ben' yedyi ra'o, dan' najë! rnë Juan tanun quie Diuzi.

²⁷Na'ra unajë! rëbijë! Jesús:
—Binezindo' nu ben' use'ela' lëbë!. Na' una Jesús rëbinë! lëjë!: —Lëscan' në'ëdï!, biinia' le'e nu quie yela' rnabë! blaohua' ben' yu'u huëti! lu'u idao' rnabë'ra.

**Unë Jesús tu di'idza' quie
ben' zu chopa ū'iñe**

²⁸Na' una Jesús lëjë!: —¿Bi ca inale ca naca di'idza' inia' le'e? Uzu tu be'mbyu zu chopa ū'iñe!. Na' yëbë! tubi!: “Žilina', tzio' na'a yeziu' usecho quie bedzuli' quia!” ²⁹Na' una ū'iñe! rëbinë! lëbë!: “iBinan quia' tza'a!” Pero ude na' beyuebi' pensari uyocazibi' hue dyin. ³⁰Na' uyo xuzijabi' yaguëdyinë! itu ū'iñe!: “Zi'ina', tzio' na'a yeziu' usecho quie bedzuli' quia!” Na' unabi' rëbibi' xuzibi!: “Hue'encazi tza'a.” Pero biuyobi!. ³¹Na' inaba' le'e: ¿Nula ū'iñe! bë cabë! re'ennë! huejabí! lao rupatejabí?

Na' unajë! rëbijë! Jesús:
—Bi' gudyë! tanëro.

Na'ra una Jesús rëbinë! lëjë!: —Tali rnia' le'e, ja ben' nale ben' mala gula, len ja nigula ruti' gusto quie, za' lëjë! yeyu'ujë! ga rnabë! Diuzi ca le'e. ³²Bida Juan bautista udixogue'në! le'e cabë! reya'ala' huele ta hue quiele xti'idza! Diuzi, na' bigulele quiénë!. Pero yaca ben' mala gula len ja nigula ruti' gusto quie, lëjë! sí, gulejë! quiénë!. Pero le'e ba'ala'cazi blë'ële cabë! bë Juan, biptza'le pensari quiele ta galele quiénë!.

**Unë Jesús tu di'idza' quie ben' mala,
ben' hue dyin**
(Mr. 12.1-12; Lc. 20.9-19)

³³Na' una Jesús:
—Uzénagale ca naca itu di'idza' inia' le'e. Uzu tu xan' layela, ben' guza bedzuli!. Bënë! tu li'o psiogüe'n. Lëzi udixunë! tu yo laga' ga usinë! nisa bedzuli!. Bërënë! tu yu'u sibi de yo ga cuia ben' rapa bedzuli!.

’Na' pca'nnë'n lao na'a ben' hue dyin, uza'në! zionë! zitü!. ³⁴Cati bdyin tiempo quie usecho quie bedzuli!, na'ra use'elë! ja mozo quiénë! tzenabajë! ben' hue dyin quie usecho ta redu'ula' ben' xan' layela yezi'në!. ³⁵Pero bëxo ben' hue dyin ja ben' uyo. Na' bë'jë! quie tunë!, bëtijë! itunë!, na' udijë! yo itunë!. ³⁶Na' use'ela' xan' layela ja mozo tula. Pero bëcazi ben' hue dyin quiejë! lëbi ca ben' uyo tanëro.

³⁷Abeyudyi bëjë! cana', use'elë! ū'iñe!, guquenë! chi huaparajë! ū'iñe! bala'ana. ³⁸Pero cati blë'ë! ja ben' hue dyin abdyin ū'i xan' layela, na'ra unajë! rëbijë! laguedyijë!: “Bi' za' ni, lëbi' gaque quiebi' layela. Uletza' gutirobi' ta gaque quiero layela de niga.” ³⁹Cana' bëjë!, bëxojë! lëbi!, bebiojabí! layela, bëtijë! lëbi!.

⁴⁰Na' una Jesús unabanië! lëjë!: —Cati yedyin xan' layela, ɬbiži reya'ala' huenë! quie ja ben' hue dyin?

⁴¹Na' unajë! rëbijë! Jesús:
—Yela' ben' mala quiejë!, reya'ala' gutinë! lëjë!, biyëchi'l'a'adyi'në! lëjë!. Reya'ala' uca'nnë'n lao na'a ben' hue dyin, ben' tula, ben' tzesan

quie usecho ta redu'ula' ben' xan'
layela yezi'në! tiempo quienan.
42 Na' una Jesús rëbinë! lëjë!
 —¿Binelabale cabë! nan lë'lë guichi
la'iya quie Diuzi? Rnan caniga:
 Yo laga' uru'un ben' rue huecua',
 lëyo na' bezi' Diuzi, bzunë'n
 ga rzulao besu.
 Dyin dya'a bë Diuzi beyuenë'n
 yo belao ta guxu'n besu.

43 Tana' lena' inia' le'e, como dan'
 biralele quia', cana' naca quiele ca
 quie ben' rue huecua', ben' uru'un
 yo. Quie lena' bicuio Diuzi le'e
 gacale ben' hue dyin quienë!. Na'
 huabio Diuzi ben' tula, ben' tzesan
 ca quie usecho ta reya'ala' Diuzi
 yezi'në!. **44** Nu ben' bire'en gale quia',
 gaca quienë! ca quie ben' bguino
 lao yo, guqué! hue' že. Lëscan'
 nu ben' chu'un nö'ëdi' tzala'l'a,
 huachugulia' quienë!. Gaca quienë!
 ca quie ben' pxa'da' yo lënë!.

45 Na' cati be ja xan' pxuzi len
 ja ben' partido fariseo cabë! na
 ejemplo unë Jesús, na'ra gucabë'jë!
 rnë Jesús quiejë!. **46** Na' gu'unjë'
 guxujë! Jesús, pero bdzebijë! idza'
 ja ben' yedyi, dan' na ja ben' yedyi
 rnë Jesús tanun quie Diuzi.

Unë Jesús tu di'idza' quie
 lani quie huetzagana'

22 Na' bzu Jesús itu di'idza'
 unë! rëbinë! lëjë!: **2**—Na' rnia' le'e cabë! rue Diuzi
 rnabë'në!. Ruenë! ca nu rey, ben'
 bë tu lani cati ptzagana' ū'i'inë!.

3 Na' use'ela' rey ben' tzelidza ja
 ben' guida lao lani, pero bigu'unjë'
 guidajë!. **4** Na' use'ela' rey na' ben'
 tula ta tzelidzajë! ja ben' guida lao
 lani unë! rëbinë! lëjë!: “Uleyëbijë!”

abëtia' ja bëdyihuaga quia', bia
 naca ja re'ene, bapsiña'a ta gaojë!.
 Yugun nacan puesto laguidatejë!.”
5 Pero bibida ben' reya'ala' guida.
 Tunë! uyonë! layela quienë!. Itunë!
 uyonë! huëti' quië!. **6** Na' los demás,
 bëxujë! ben' use'ela' rey tzalidza
 lëjë!, bë'jë! lëjë! zi!, bëtijë! lëjë!.
7 Na'ra bdza'tzegue rey na!. Use'elë!
 soldado quienë! tzeguëtijë! lëjë!,
 tzezeijë! yedyi quiejë!. **8** Na' una rey
 rëbinë! ben' tzelidza: “Yugun nacan
 puesto guida ja benë!.” Pero ben'
 blidzajë! guidaja, bigu'un rey na!.
 Na' unë!: **9** “Uletzio tzetale tu neza
 tzelidzale con nu ben' yedzagale
 ta guidajë! lani quie huetzagana!.”
 Cana' unë! gudyinë! ben' tzelidza.
10 Na' uza'jë! yetajë! tu neza utupajë!
 ben' bedzagajë!, la'acazi ben' mala,
 la'acazi ben' dya'a. Cana' bedza' ja
 benë! ūan yu'u quie rey.

11 Na'ra uyu'u rey lu'u yu'u ta
 inë! ben' bdyinja. Na' blë'ënë! re' tu
 be'mbyu, pero binaconë! ūabanë! ca
 naca ūaba ben' bdyin ga raca lani
 quie huetzagana!. **12** Na' una rey
 rëbinë! lënë!: “Bicha!, ¿biži guca
 uyu'ulo' re'lo' ni, binacolo' ūabo' ca
 naca ūaba ben' bdyin ga raca lani
 quie huetzagana?!” Na' ure'në! chizi.
13 Na' una rey rëbinë! ben' ru'e laze:
 “Ulequio ni'a na'anë!. Ulechu'unnë!
 lao lato chula ga cuedyinë! gao
 leinë!.” **14** Rëzi Diuzi ben' zë, ben'
 inao xnezë!, pero balazijë! guida
 inao xnezë!.

Unabajë! Jesús ca naca quie
 impuesto

(Mr. 12.13-17; Lc. 20.20-26)

15 Na'ra uyo ja ben' partido fariseo
 bega'një! di'idza' len laguedyijë!

huejë' trampa quie Jesús ta quilojë'
di'idza' ta gaojë' lëbë' xquia. ¹⁶Na'
use'ela'jë' ibala ben' naca partido
quiejë' tuže len bala ben' naca
partido Herodes, unajë' rëbijë' Jesús:

—Maestro, nezindo' rnao' tali,
rusëdio' benë' ca naca xneza Diuzi.
Tuzicazi ca ru'elao' benë' di'idza'.

¹⁷Unacara cabë' naca tu pensari
quio': ¿Rnabando' luë' chi run Diuzi
lato quižoro impuesto lao rey quie
ben' romano?

¹⁸Na'ra gucabë' Jesús cabë' modo
reguilojë' ta huejë' tamala quië'. Na'
unë' rëbinë' lëjë':

—Ben' huizi' yë' nacale. ¿Bixquien'
re'enle huele trampa quia!

¹⁹Ulelu'ecara në'ëdi' bi naque dumi
ruquižole impuesto.

Na' blu'ejë' lëbë' tu dumi denario.

²⁰Bë' blë'ë Jesús len, na' unabaneë'
lëjë':

—¿Nu ben' zu laohue lë'ë dumi?
¿Bi na letra dyia lë'ën?

²¹Na' unajë' rëbijë' Jesús:

—Lao rey quie ben' romano zu
lë'ën.

Na'ra una Jesús rëbinë' lëjë':

—Ulehue' ben' naca gobierno ta
redu'ulanë' si'në!. Lëscan' ulehue'
Diuzi ta redu'ulanë' si'në!.

²²Cati bejë' cabë' una Jesús, na'ra
tu bega'nzijë' rebanejë'. Na' psanjë'
quië' zeyojë'.

Unabajë' Jesús cabë' raca quie ben' baguti yeban

(Mr. 12.18-27; Lc. 20.27-40)

²³Lëdza na'tezi uyo bala ja ben'
partido saduceo yena'jë' Jesús.
Na'ra birale ja ben' partido saduceo
chi hueban ben' huati. Tana' lena'
unajë' rëbijë' Jesús:

²⁴—Maestro, una Moisés chi
guti tu be'mbyu zu žgule, na'
ganu ži'inë' zu, reya'alala' yezi' ben'
bichinë' xcula ben' guti tacuenda
su ži'ijë' lao laza ži'i ben' guti.

²⁵Na' guca dza na' uzu gadyi
bichi be'mbyu yedyi quiendo!. Na'
ptzagana' ben' nëro, pero gutinë'
ganu ži'inë' uzu. Lena' abezi'
ben' bichinë', ben' urupe, nigula
quienë!. ²⁶Lëscan' guti ben' urupe
ganu ži'inë' uzu. Lena' abezi' ben'
bichinë', ben' uyune, nigula quienë!.
Pero cabë' guca quie ben' nëro len
ben' urupe, lëscana' guca quie ben'
uyune len los demás yaca bichinë'
hasta lao gadyi bichijë!. ²⁷Ude
na' gutirë nigula quiejë!. ²⁸Na'ra
inabando' luë', cati yeban ja ben'
baguti, ¿nulajë' naquë' quiejë' lëbë'
lao gadyijë' como yugujë' uzulëjë'
lëbë'?

²⁹Na' una Jesús rëbinë' lëjë':

—Le'e sí, nequixile como dan'
binezile cabë' rnan lë'ë guichi
la'iya quie Diuzi. Lëscan' binezile
ca naca yela' huaca quienë!. ³⁰Cati
babeban ja ben' baguti, bisulëjë'
laguediyijë' ca žgulajë' ca xquiujë'.
Gaca quiejë' ca quie yaca ángel quie
Diuzi, ben' yu'uja guibá. ³¹Na' quie
ben' baguti yeban, ¿binelabale lë'ë
guichi la'iya quie Diuzi cabë' unë'
le'e? Unë' caniga: ³²“Naca! Diuzi
quie xuzixta'olo' Abraham, len
quie xuzixta'olo' Isaac, len quie
xuzixta'olo' Jacob.” Cana' una Diuzi.
Lena' nia' le'e, Diuzi rlë'ënë' lëjë' ca
ben' neban, como dan' rlë'ë Diuzi
tuzicazi ca ben' neban len ben'
aguti.

³³Cati be ja benë' cabë' una
Jesús quie ben' guti beban, na'ra tu

bebanezijë' cabë' di'idza' rusëdinë'
ja benë'.

**Unë Jesús quie chopá mandamiento
belao**

(Mr. 12.28-34)

34 Cati unezi ben' partido fariseo cabë' bë Jesús quie ben' partido saduceo, biubinjë' binajë' yébijë' Jesús, na'ra begu'udi'jë' ga zë Jesús.
35 Na' tu ben' quiejë', ben' rusëdi ley quie Moisés, gu'unñë' huenë' trampa quie Jesús. Cana' unë' rëbinë' lëbë':

36—Maestro, ¿nula mandamiento nacaran belao quie ley pca'n Diuzi lao na'a Moisés?

37 Na' una Jesús rëbinë' lëbë':
—“Idyë'ero xa'nro Diuzi du guicho du la'adyi'ro.” **38** Lélena' nacaran mandamiento belaora.
39 Derë itu mandamiento nacarën belao. Ilë'ëti'zi birnën lëbi ca mandamiento belaora. Len rnan caniga: “Idyë'ële laguedyile cabë' nediyë'ële cuinle.” **40** Na' nia' le'e duže ca na ley pca'n Diuzi lao na'a Moisés len duže ca una ja ben' profeta dza na', nacan quie chopá mandamiento belao.

Unaba Jesús: ¿Nu žiliné' naca Cristo?

(Mr. 12.35-37; Lc. 20.41-44)

41 Tu raca nenegu'udi' ja ben' partido fariseo, **42** na' una Jesús rëbinë' lëjë':

—¿Bi ca nale quie ben' naca Cristo? ¿Nu žiliné' naquë'?

Na' unajë' rëbijë' lëbë':

—Žil'i rey David naquë'.

43 Na' una Jesús rëbinë' lëjë':

—¿Ca biži guca caora una rey David, du yu'unë' Bichi Be quie

Diuzi, unë' naca Cristo Señor quiénë'? Porque cana' una David caora unë' caniga:

44 Una Diuzi rëbinë' ben' naca Señor quia':

“Ure' cuéta' zaqué' yebë niga,
hasta idyin dza cuécha'
xni'alo' yaca ben' rudie luë'.”

Cana' una rey David. **45** Na' rnaba' le'e, ¿cómo naca Cristo žil'i suba rey David, chi cuin rey David unë' naca Cristo Señor quiénë'?

46 Na' ni tu di'idza' biubinjë' yébijë' lëbë'. Desde dza na', bira beyažoje' inabarajë' lëbë' bi di'idza'.

**Udaو Jesúس ben' partido fariseo len
ben' rusëdi ley quie Moisés xquia**
(Mr. 12.38-40; Lc. 11.37-54; 20.45-47)

23 Na'ra una Jesús rëbinë' ja benë' nita' na' len ja ben' quiénë':

2—Ja ben' rusëdi ley quie Moisés, len ja ben' partido fariseo, nacan dyin quiejë' rusëdijë' benë' cabë' nan lë'ë guichi ley ta pca'n Diuzi lao na'a Moisés. **3** Na' reya'ala' hue quiele ca inajë', pero binaole huele cabë' ruejë', como dan' biruejë' tuzi ca najë'. **4** Ruejë' ca quie ben' rugua'a yua' zi' gula laguedyi, tu ta bisueyaqué'. Pero biyeyëchi'la'adyi'jë' yaca benë' ni siquiera ledao'zi ta gacalejë' lëjë'. **5** Tuzi ta ilë'ë benë' lëjë' dya'a ruejë', pero bë' ruezijë' raxejë' uða'jë' tu guichi dao' quie Diuzi žbasijë'. Raxejë' utubijë' itu guichi quie Diuzi žichojë'. Raxejë' gacoje' žabajë' tona. **6** Re'enjë' cue'jë' ga naca tzao' cati raojë' ga raca lani. Lëscan' re'enjë' cue'jë' ga rbe' ben' bala'ana lu'u idao' sinagoga.

⁷ Re'enjë' gapala'n benë' lëjë'
dyë'ëdi du tu neza. Raxejë' yëbi ja
benë' lëjë': "Maestro."

⁸ Bihuele lato ta ina ja benë'
le'e: "Maestro", porque yugulule
naca tuzi bichile, lëscan' tuzi
në'ëdi' naca' maestro quiele. ⁹ Lëzi
nitu nitu ben' nita' lao yedyi layu,
bihuele lato yëbilejë': "Xuzal!",
porque tuzi Xuziro zu, ben' zu
guibá. ¹⁰ Lëscan' bihuele lato ta ina
ja benë' le'e: "Xa'na' luë!", porque
tuzi në'ëdi' naca' xa'nle. ¹¹ Na' rnia'
le'e, con nu ben' racalë laguedyi,
lënë' nacarë' ben' belao ladole.
¹² Porque nu ben' rue že cuine,
lëben' na' nacarë' ben' yëchi' lao
Diuzi. Pero nu' ben' birue cuine ben'
že, lëben' na' nacarë' ben' že lao
Diuzi.

¹³ ¡Le'e ben' rusëdi ley quie
Moisés, len le'e ben' partido
fariseo, nacan bayëchi' gula quiele!
Biruele tuzi ca nale. Ruza'agale
hue quie benë' xti'idza' Diuzi. Le'e
birue quiele xti'idza' Diuzi, lëscan'
bire'enle hue quie ben' tula xti'idza'
Diuzi.

¹⁴ ¡Le'e ben' rusëdi ley quie
Moisés, len le'e ben' partido fariseo,
nacan bayëchi' gula quiele! Biruele
tuzi ca nale. Rgubale yu'u quie ja
nigula guti xquiuuhue, pero ta ilë'ë
ja benë' le'e ben' rue quie ca rna
Diuzi, na' ru'elële Diuzi di'idza' zë.

¹⁵ ¡Le'e ben' rusëdi ley quie
Moisés, len le'e ben' partido fariseo,
nacan bayëchi' gula quiele! Biruele
tuzi ca nale. Ratale con gatezi
ta quilole nu ben' hue quie cabë'
ruele. Pero nu ben' usëdile ta hue
quie cabë' ruele, huacaterajë' ben'
malara ta tziojë' gui' gabila ca le'e.

¹⁶ ¡Huaca bayëchi' quiele! Re'enle
ulu'ele ben' tula ga tzionë', pero
ben' laochula le'e. Na' le'e nale:
"Chi ruguntero Diuzi ruzëtoro idao'
rnabë'ra chi bi tu ta huero, biruen
zi hueron. Pero chi ruguntero Diuzi
ruzëtoro oro re' lu'u idao' rnabë'ra,
lenan sí, ruen zi hueron." ¹⁷ ¡Pero
inia' le'e, ben' tondo, ben' laochula
le'e! Binaca la'iya oro cuinzin.
Tanun quie re'n lu'u idao' rnabë'ra,
tana' naca la'iyan. Naca idao'
rnabë'ra la'iyan ca oro re' lu'un.
¹⁸ Lëscan' rnareë: "Chi ruguntero
Diuzi ruzëtoro ru'aba chi bi tu ta
huero, biruen zi hueron. Pero chi
ruguntero Diuzi ruzëtoro gun dyia
ru'aba, lenan sí, ruen zi hueron."
¹⁹ Pero inia' le'e, iben' tondo, ben'
laochula le'e! Binaca la'iya gun
cuinzin. Tanun quie dyian ru'aba,
tana' naca la'iyan. Naca ru'aba
la'iyan ca gun dyia laonan. ²⁰ Chi
ruguntero Diuzi ruzëtoro ru'aba
chi bi tu ta huero, quele tuzi ru'aba
ruzëtoro como dan' tuzi naca
ru'aba len gun. ²¹ Chi ruguntero
Diuzi ruzëtoro idao' rnabë'ra chi
bi tu ta huero, quele tuzi idao'
rnabë'ra ruzëtoro como tuzi naca
idao' rnabë'ra len Diuzi, ben' zu
lu'un. ²² Lëscan' chi ruguntero
Diuzi ruzëtoro guibá chi bi tu ta
huero, cana' ruzëtoro Diuzi lënë'
xlatoguë' ga re'në!

²³ ¡Le'e ben' rusëdi ley quie
Moisés, len le'e ben' partido fariseo,
nacan bayëchi' gula quiele! Biruele
tuzi ca nale. Lente ja la'aga' ta ruen
žil' yela' huao quiele ru'ele Diuzi
tu cue'na quie lao chi cue'na, pero
biruele bala quie ta naca belaora
quie mandamiento quie Diuzi.

Biruele tali. Bireyëchi'la'adyi'le benë!. Birue quiele que Diuzi du guicho du la'adyi'le. Tanëro reya'ala' huele ta nacara belao que Diuzi, na'tera hue'le Diuzi tu cue'na queie lao chi cue'na queie ta de quiele.²⁴ iLe'e re'enle ulu'ele ben' tula gatzionë!, pero ben' laochula le'e! iLe'e ruele že ta naca lë'ëti'zi, na' biruele že ta naca belao!

²⁵ iLe'e ben' rusëdi ley que Moisés, len le'e ben' partido fariseo, nacan bayëchi' gula quiele! Biruele tuzi ca nale. Rguibile dyë'ëdi xcu'udzula taza len plato. Na' rudze'le lu'un ta rbanle queie benë! rzi'ljejë! yë!. ²⁶ Le'e ben' partido fariseo, nacale ca ben' laochula. Nacale ca taza plato neyëri xcu'udzun, pero yu'u lu'un ta bayatza. Uletza' pensari yu'u lu'un guicho laxta'ole, na'tera gacale yëri dužele lao Diuzi.

²⁷ iLe'e ben' rusëdi ley que Moisés, len le'e ben' partido fariseo, huaca bayëchi' gula quiele! Biruele tuzi ca nale. Nacale ca queie ta rucua'jë! ga de ben' huati. Rudze'jë'n ta bezëri xcu'udzun, pero lu'unan yu'u chita queie ben' huati len ta bayatza. ²⁸ Cana' naca que le'e. Rlë'ë ja benë! le'e ben' huen, pero bë' ruezile biruele tuzi ca nale, yu'u pensari mala lu'u guicho laxta'ole.

²⁹ iLe'e ben' rusëdi ley que Moisés, len le'e ben' partido fariseo, huaca bayëchi' gula quiele! Biruele tuzi ca nale. Le'e rucua'le ba queie ben' huati, ben' udixogue' xti'idza' Diuzi dza na'te. Lëzi ruetza'ole ba queie ja ben' bë queie xti'idza' Diuzi dza na'te. ³⁰ Na' lëzi rnale rëbile

laguedyile: "Chan' ra'o nita'ro dza unita' xuzixta'oro, bigu'unro guti xuzixta'oro ja ben' udixogue' xti'idza' Diuzi." ³¹ Ca di'idza' rnële rulu'en dyë'ëdi nezile bëti xuzixta'ole ben' udixogue' xti'idza' Diuzi dza na'te. ³² Na' le'e re'enle useyudyile huele cabë' uzulao xuzixta'ole.

³³ iLe'e ruele ca rue bëla rgui'ldiyi' laga cabë' bë xuzixta'ole! ¿Biži ca huele ta bihue Diuzi le'e castigo tziole gui' gabilia? ³⁴ Quie lena' ise'ela' laole ja ben' quixogue' xti'idza' Diuzi, ben' nezi rusëdi que Diuzi. Pero le'e gutile balajë!, na' ibalajë' uda'le lëjë! lë'ë yaga cruzo. Na' ibalajë' hue'le zi' lu'u idao' sinagoga quiele ulaolejë' tu tu yedyi. ³⁵ Cana' hue Diuzi dula' quiele, dan' bëtile ja ben' quienë!, desde dza cati ure' dyilayu caora bëti Caín Abel, hasta dza bëtijë' Zácarías, ben' naca ū'i Berequías. Bëti xuzixta'ole lëbë' ru'a idao' rnabë'ra ga'ala' ga zu ru'aba. ³⁶ Tali rnia' le'e, huida dula' xquia quie xuzixta'ole, ben' bëti ben' quie Diuzi, gacan ūba'aga' le'e.

Gucayëchi' Jesús cabë' rue yaca ben' ciudad Jerusalén

(Lc. 13.34-35)

³⁷ Na' una Jesús:
—Ben' ciudad Jerusalén, ben'
ciudad Jerusalén, le'e rutile ja ben'
rguixogue' xti'idza' Diuzi. Le'e
rguile yo ja ben' rse'ela' Diuzi
laole. Zë lasa gu'unda' gapa' le'e
ca rapa biu ūiba' ūan xilaba',
pero bigu'unle. ³⁸ Ilë'ëti'zi idachi
ciudad quie yega'nnan cana'zi.
³⁹ Tana'rnia' le'e, ilë'ëti'zi bira
ilë'ële në'ëdi!. Cati idyin dza inale:

“Naca la'iya ben' use'ela' Diuzi”, na'tera ilë'ele në'ëdi' tatula. —Cana' una Jesús rëbinë' lëjë'.

Una Jesús huabiagui' idao' rnabë'ra

(Mr. 13.1-2; Lc. 21.5-6)

24 Na'ra bero Jesús lu'u idao' rnabë'ra, uza'në' zioguë' cati bebiga' ben' quiënë' ga zënë'. Na' uzulaojë' rebanejë' ca naca idao' rnabë'ra. ²Na' una Jesús rëbinë' lëjë': —Ulena' cabë' naca idao' rnabë'ra. Pero tali rnia!, huabiagui'n dužeten, ni tu yo bira yega'nnan xcu'udzu laguedyin.

Pxi'idze' Jesús cabë' gaca cati idyin dza iyudyi dyilayu

(Mr. 13.3-23; Lc. 21.7-24; 17.22-24)

³Na'ra uza'jë' ziojë' ga zu tu ya'a laona ya'a Olivos. Na' ure! Jesús cati bebiga' ja ben' quië' ga re'në' tu ganu dyila', unajë' rëbjë' lëbë': —Re'enndo' inao' nëto' bata cuiagui' idao' rnabë'ra. Lëzi re'enndo' inao' biži gaca cati yeguido' tatula, na' lëscana'rë cati iyudyi quie dyilayu.

⁴Na' una Jesús rëbinë' lëjë': —Gapale cuidado ta bisí' benë' le'e yë!. ⁵Huida ben' zë inajë' napajë' yela' rnabë' quia!. Lëscan' inajë': “Naca' Cristo”. Pero huazi'ljë' yë' ben' zë. ⁶Ina ja benë' ga raca dila, ga sulao dila, pero bidzibile, dan' ruen zi gacacazi cana!. Nerdziogue idyin dza iyudyi dyilayu. ⁷Dila zë gaca tu yedyi conlë ja ben' yedyi tula. Na' yedyi zë gaca ubin, gaca yela' hue', gaca užu!. ⁸Cana' gaca cati sulao yedzagalao ja benë'.

⁹Na' usedyin benë' le'e lao na'a ja ben' rnabë' ta usacajë' le'e

bizinaquezi, gutijë' le'e. Udie benë' le'e dan' nacale ben' quia'.

¹⁰Lëdza na' usan ben' zë bira galejë' quia'. Udiejë' laguedyijë', usedyinjë' laguedyijë' lao na'a ben' rnabë'. ¹¹Huida ben' zë, ben' huezi' yë', inajë' rnëjë' tanun quie Diuzi, pero ben' zë si'ljë' yë!. ¹²Tantozi gaca tazëdi, bira idyë'ë yaca benë' laguedyijë!. ¹³Pero nu ben' sue biusan inao në'ëdi' dza zunë' lao dyilayu, huazi' Diuzi lëjë' yeyojë' guibá. ¹⁴Huayo ja benë' tzetixoguejë' xti'ídza' Diuzi duže yedyi layu ta inezijë' zu Diuzi dispuesto yeyojë' tzasuléjë' lëbë' ga rnabë'në!. Te na', yeyudyi quie dyilayu.

¹⁵Bzu profeta Daniel di'ídza' lë'ë guichi cabë' naca tu ta udyiagui' benë', ratza Diuzi len. Reya'ala' tzioñe'ele cabë' nia' le'e. Caora ilë'ele badyia tu ta udyiagui' benë', ratza Diuzi len lu'u idao' rnabë'ra,

¹⁶na'ra reya'ala' yežuno ja ben' nita' estado Judea yeyojë' guixi' dao!. ¹⁷Chi nita'jë' lali'a, tanto ruguinte yežunojë', bireya'ala' yeyu'ujë' lu'u yu'u quiejë' si'ljë' bi ta de. ¹⁸Lëscana' chi zujë' layela, reya'ala' yežunojë' biyeza'jë' yeyojë' tzeži'ljë' žabajë'.

¹⁹Gaca bayëchi' quie ja nigula nu'a ži'line len ja nigula zu xcuidi' ra'adyi' dza na!. ²⁰Reya'ala' hue'lële Diuzi di'ídza' ta gacalënë' le'e ta biužunole tiempo ruen zaga, nica dza huezila'adyi!. ²¹Cana' lega yedzagalao yaca benë'. Desde dza cati ure' dyilayu, binedzagalao yaca benë' cabë' yedzagalao ben' yežuno dza zeza!. Lëscan', bë' yeyudyi bedzagalaojë', ganura ben' tula yedzagalao cabë' lëjë!. ²²Chi

biichugu Diuzi dza yedzagalaojë', biilajë'. Pero huachugu Diuzi dza na' cuenda gacalënë' yaca ben' ulionë'.

²³'Chi ina ja benë' yëbijë' le'e: "Ulena', ni zu Cristo", chi yëbijë' le'e: "Ulena', na' zu Cristo", bigalele quiejë'. ²⁴Huida ja ben' huizi' yë' huejë' cuinjë' Cristo, huejë' cuinjë' ben' inë tanun quie Diuzi. Huejë' milagro tacuenda si'ljë' yë' len ben' ulio Diuzi, pero bihuzejë' gan si'ljë' ben' ulio Diuzi yë!. ²⁵Baonia' le'e huaca tu ta binegaca. ²⁶Tana' lena' chi ina benë' yëbijë' le'e: "Ulena', na' zu Cristo lao lato dachi", bitziole na!. Chi yëbijë' le'e: "Ulena', na' zu Cristo lu'u yu'u", bigalele quiejë'. ²⁷Bigalele quiejë' como dan' cati yeguida' në'ëdi', bichi Yugulu benë', hualë'ë yaca benë' në'ëdi' cabë' ilë'ë benë' xni' yesa cati rëpin ga rlë obidza rdi xni'n hasta ga reyen obidza. ²⁸Caora rlë'ële recho ja bëchi ladza, cana' inezile de tazigo raojaba!. Lëcana' gaca inezile gan' gaca can' baonia!.

Ni nan cabë' gaca cati yeguida Cristo tatula

(Mr. 13.24-37; Lc. 21.25-33; 17.26-30, 34-36)

²⁹Na' una Jesús:

—Layeyudyite dza yedzagalaojë', na'ra yechula obidza, bira ina' xni' biu', huaguinu bélo gan dyian, huažisi Yugulu ta dyia guibá. ³⁰Hualë'ë benë' tu ta binelë'ëjë' guibá. Lena' ulu'en abdyin dza yeguida' në'ëdi', bichi Yugulu benë'. Na' huabedyi Yugulu ja ben' nita' lao yedyi layu, hualë'ëjë' në'ëdi', bichi Yugulu benë', za'a lu'u beo. Hualë'ëjë' taže de yela' huaca quia', taže de yela' rnabë' quia!. ³¹Na'ra

ise'ela' yaca ángel quia' ta cuedyijë' trompeta quiejë' zidzo gula. Caora na' yegu'udi' ja ben' ulioga' në'ëdi' saljë' duže yedyi layu guidajë' ga zua!.

³²'Ulehue pensari ca raca quie yaga higo. Cati naca taca'n re'ene, na' rasi la'aga' quien, na' nezile bazeza' biu' uba. ³³Lëscana' cati ilë'ële araca cabë' baonia' le'e, reya'ala' inezile baruen bagozi dza iyudyi quie dyilayu. ³⁴Tali rnia' le'e, tu bineya žil'i suba ben' nita' na'a, bë' gaca cabë' baonia' le'e. ³⁵Huade quie ta dyia guibá len lao dyila yu cana'zi, pero quie di'ldza' rnia', bitten cana'zi. Decazide gacan.

³⁶'Nunu nezi bata idyin dza iyudyi dyilayu. Binezi ja ángel dyia guibá, binezda' në'ëdi' žil'i Diuzi. Tuzi Xuza' Diuzi nezinë'!

³⁷'Cabë' guca dza uzu Noé dyilayu, lëscana' gaca cati yeguida' në'ëdi', bichi Yugulu benë', tatula.

³⁸Na' dza na' cati baruen bago gaca juicio nisa, bigulejë'. Nita'jë' ri'o raojë', rutzagana' ja žil'ijë' hasta bdyin dza cati yu'u Noé lu'u barco quienë!. ³⁹Na' bigucabë'jë' bi gaca quiejë' hasta dyin dza guca juicio nisa, cana' bi'a nisa Yugulu'ë' gutijë'. Lëscana' gaca cati yeguida' në'ëdi', bichi Yugulu benë', tatula. ⁴⁰Cati idyin dza na', chi zu chopa benë' layela, na' yequië' ja ángel tunë', itunë' yega'n. ⁴¹Lëscana' chi zu chopa nigula hueto, na' yequië' ja ángel tunë', itunë' yega'n.

⁴²'Ulesu listo como dan' binezile bi hora yeguida' në'ëdi' naca' xa'nle.

⁴³Ulehue pensari can' nia' le'e. Chi nezi xa'n yu'u bi hora guida ben' uban du rëla, huazunë' listo

ta ina'në! bihuenë! lato tzu'u ben'
uban lu'u yu'u quienë! cuannë!

⁴⁴ Quie lena', sule listo, como dan'
cati ruele pensari biguida', huida',
löhora na' cati guida' nëlëdi', bichi
yugulu benë!

Unë Jesús tu ejemplo quie tu mozo

(Lc. 12.41-48)

⁴⁵ Na' una Jesús:

—Rnia' le'e tu ejemplo quie tu
mozo, ben' rioñe'e ruzu di'idza'.
Na' pca'n xa'nnë! lënë! ta ugaonë!
ja ben' mozo quienë!. Na' uza'në!
zioguë!. ⁴⁶ Na' huatzaxe xa'nnë! lënë!
cati yedyinnë! ilë'lénë! rue mozo
za' cabë! ta bënë! lëbë! mandado.

⁴⁷ Tali rnia' le'e, uca'n xa'nnë! lao
na'anë! yugulu ta de quienë!. ⁴⁸ Pero
chi biruenë! tahuen, chi raquenë!
biyedyinneza xa'nnë!, ⁴⁹ chi usacanë!
ja mozo quienë! bizinaquezi, chi
rdalënë! ben' žudyti tuže hue'e,
⁵⁰ na' yedyin xa'nnë! cati raquenë!
biyedyin xa'nnë!, ⁵¹ na'ra hue
xa'nnë! lëbë! castigo ca castigo hue
Diuzi ben' birue tuzi ca nayaquë!.
Huayoje! gui' gabilia ga cuediyiajë!,
ga gaojë! leijë!

Unë Jesús tu di'idza' quie chi nigula cuidi'

25 Na' una Jesús:

—Re'enda' inia' le'e tu
di'idza' cabë! rue Diuzi inabë'në!
cati idyin dza na!. Nacan ca quie chi
nigula cuidi!, ben' uza'ja zioja ga
raca huetzagana!. Nu'ajabi' lámpara
yudzo aceite ta tziojabi' lidyi
bibyu utzagana' ta tzelezajabi' lëbi'
guidabi!. ² Na' guca ga'yo' nigula
listo. Na' iga'yo'jabi' bigucajabi'
listo. ³ Na' ja nigula binaca listo

bibi'ajabi' tu frasco huio aceite
ta yejudzo lámpara bë' bebidyi
aceite quién. ⁴ Pero ja nigula listo
bi'ajabi' tu frasco huio aceite
len lámpara quiejabi!. ⁵ Na' udzë
bi'byu utzagana' guidabi!. Na'
unan gasijabi' gusijabi!. ⁶ Na'ra
ca du gatzo yela bejabí' rbediyia'
ja benë! unajë!: "iBaza' bi'byu
utzagana! iUlero gapala'nlebi'!"
⁷ Na' uyasa ja nigula cuidi' yugujabi'
bga'ala'jabi' lámpara quiejabi!. ⁸ Na'
lao ga'yo'jabi' biguca listo gudyijabi'
iga'yo'jabi' naca listo rëbijabi'
lëjabi!: "Ulegun ledao' aceite quie
nëto!, dan' bareyula lámpara
quiendo!" ⁹ Na'ra una ga'yo'jabi'
listo rëbijabi' lëjabi!: "Bigunndo'n,
dan' chi gunndo'n, bigaquet
quiendo' lente le'e. Uletzio
tzegue'len ga ruti'në'n ta gata'
quie." ¹⁰ Na' tu zio ja ga'yo'jabi'
biguca listo tzegue'jabi' aceite, tu
na' bdyin bi'byu utzagana!. Na'
uyu'u iga'yo'jabi' de aceite quie
conlë bi'byu utzagana' lu'u yu'u
ga raca huetzagana!. Na' besiojë'
yu'u. ¹¹ Ude na' bedyin iga'yo'jabi'
unajabi' rëbijabi' bi'byu utzagana!:
"iSeñor, Señor, usalu yu'u tzu'undo!"
¹² Na' una bi'byu utzagana' rëbibi'
lëjabi!: "Tali binubë'da' le'e."

¹³ Na' una Jesús rëbinë! ben'
quienë!:

—Ulehue listo, dan' binezile bi
dza, bi hora, yeguida' nëlëdi', bichi
yugulu benë!, tatula.

Unë Jesús tu di'idza' quie tu xan' mozo, ben' pca'n dumí lao na'aјé'

¹⁴ Na' una Jesús:

—Re'enda' inia' le'e itu di'idza'
cabë! rue Diuzi rnabë'në!. Ruenë!

ca tu ben' re'en tzio yedyi tula. Tu zaza'në! tzionë! gužinë! ja mozo quiénë! ta pca'nnë! centavo quiénë! lao na'ajé!.

¹⁵'Na' biži tu ben' mozo quië! bë'në! cadu ga'yo! mila dumi plata. Itunë! bë'në! cadu chopá mila dumi plata. Itunë! bë'në! cadu tu mila dumi plata. Bë'në! quié quiejé! dumi cabé! nezinë! rueljé! dyin dumi. Na'ra uzé! è! zioguë!. ¹⁶Ben' mozo, ben' uži! ga'yo! mila na', bëlénë! n dyin bënë! gan iga'yo! mila ži'inan. ¹⁷Lëscan' ben' uži! chopá mila, bëlénë! n dyin bënë! gan ichopa mila ži'inan. ¹⁸Pero na' ben' uži! tu mila, uyónë! yecachi'në! n yeguenë! tu yero ga bdze'në! n lu'u yu.

¹⁹'Bë! guca zé dza, na' bedyin xan' ja ben' mozo gužinë! lëjé! beyuelënë! lëjé! žubaba. ²⁰Na' tanéro bdyin ben' uži! ga'yo! mila yesannë! dumi. Na' unë! rëbinë! xa'nnë!: "Señor, benlo'në! ga'yo! mila. Na' ni de iga'yo! mila ži'inan ta bia! gan."

²¹Na' una xa'nnë! rëbinë! lëbë!: "Tahuen gula cabé! bao!. Mozo dya'a naco', ruzulo' di'idza' quia!. Tadya'a bëlao' tadao! pca'na' lao nao', tana' uca'na' lao nao' tažera, idaohuero suro tuže." ²²Na' taorupe bdyin ben' uži! chopá mila yesannë! dumi. Na' unë! rëbinë! xa'nnë!: "Señor, benlo'në! chopá mila. Na' ni de ichopa mila ži'inan ta bia! gan."

²³Na' una xa'nnë! rëbinë! lëbë!: "Tahuen gula cabé! bao!. Mozo dya'a naco', ruzulo' di'idza' quia!. Tadya'a bëlao' tadao! pca'na' lao nao', tana' uca'na' lao nao' tažera, idaohuero suro tuže." ²⁴Pero na' taoyune bdyin ben' uži! tu mila. Na' unë! rëbinë! xa'nnë!: "Señor, nezda' naco'

ben' re'en mozo quie ta huejé! dyin gaca ži'inan dumi quio!. Huetzagao' mandado ja mozo quio! ta yezi'ljé! usecho gaca ži'inan quio!. ²⁵Lena' bdzeba' udyiaya'a dumi quio!. Tana' yecacha'n lu'u yu. Na' ni de dumi quio!. Gabi guca quién." ²⁶Na' una xa'nnë! rëbinë! lënë!: "Mozo mala žan huëdi naco!. Nezilo' huetzagua' mandado ja mozo quia! ta yezi'ljé! usecho gaca ži'inan quia!. ²⁷Tana' reya'ala' huelao' dyin dumi quia! ta gaca ži'inan cuenda cati yela' tatula yezi'a dumi quia! len ži'inan." ²⁸Na' una xa'nnë! rëbinë! ben' nita'ja na': "Uleguba tu mila dumi nezi'në!. Ulehue'n ben' nezé chi mila. ²⁹Nu ben' ruelé dyin ta pca'na' lao në'ë, hue'ra'lënë! tazéra gacaran sobre. Pero nu ben' biruelé dyin ta pca'na' lao në'ë, hueguba' ta pca'na' lao në'ë. ³⁰Na'ra uledze' mozo žan huëdi niga lao lato chula ga cuedyinë!, ga yedzagalaonë!, ga gaoleiné!." —Cana' una Jesús rëbinë! lëjé!.

Unë Jesús cabé! huenë! dza gaca juicio

³¹Na' una Jesús:

—Cati yeguida' në'ëdi!, bichi yugulu benë!, huabi'a xlatoga!. Hueguidalia' ja ángel quia!. Huapala'n ja benë! në'ëdi!. ³²Na' yegu'udi' yugulu ben' tu tu yedyi de lao dyilayu laohua!. Useria' ja benë! cuioga'jé! chopá cue! cabé! rue ben' rapa beco' ži'ilal', rbioguë! beco' ži'ilal' tzala'lal, na' rbioguë! chivo itzala'lal. ³³Cana' huabioga' ben' nao xneza' zaqué! yebé, pero huabioga' ben' binao xneza' zaqué! yega!. ³⁴Na' inia' yéba' ja ben' zu zaqué! yebé:

“Uleda le'e, ben' neyéri laxta'ohue lao Diuzi. Uletzu'u guibá ga arnabé' xuza', ga pcuezané' desde dza cati ure'te dyilayu. ³⁵Lena' naca quiele, como dan' cati udua', benle nē'ëdi' ta udaohua!. Cati ubilida', benle nē'ëdi' ta hua'a. Cati uza'a yedyi tula bla'a žan yu'u quiele, benle posada quia!. ³⁶Cati bdziogueda' žaba!, benle nē'ëdi' ta gucua!. Cati guca' žhui'a, cati guta' dyiguiba, bidale bedena'le nē'ëdi!.” Cana' yéba' lëjé!. ³⁷Na'ra ina ben' neyéri laxta'ohue lao Diuzi yébijé' nē'ëdi!: “Señor, ¿bata blé'ëndo' luë' uduelo', na' benndo' ta udaolo'? ¿Bata blé'ëndo' luë' ubililo', na' benndo' ta hue' elo'? ³⁸¿Bata blé'ëndo' luë' uza'o' yedyi tula blao' žan yu'u quiendo', na' benndo' posada quio'? ¿Bata blé'ëndo' bdzioguelo' žabo', na' benndo' gucolo'? ³⁹¿Bata blé'ëndo' luë' guta'llo' lu'u dyiguiba, na' bedena'ndo' luë'?” ⁴⁰Na'ra inia' yéba'jé!: “Tali rnia' le'e, yugute ta babéle beyéchi'la'adyi'le bicha', ben' nao xneza', la'acazi ben' yéchi' gula, cana' beyéchi'la'adyi'le nē'ëdi!.”

⁴¹’Na'ra inia' yéba' ja ben' nita' zaqué' yega!: “Ulebiga' tzala'la le'e ben' yu'u de' lao Diuzi. Uletzio gui' gabila ta bireyula tuzioli ta pcueza Diuzi quie xan' taxi'ibi' len ja ángel quienan. ⁴²Lena' gaca quiele tziole, como dan' cati udua', bibenle nē'ëdi' ta gaohua!. Cati ubilida', bibenle nē'ëdi' ta yo'oga!. ⁴³Cati uza'a yedyi tula bla'a žan yu'u quiele, bibenle posada quia!. Cati bdziogueda' žaba!, bibenle ta gacua!. Cati guca' žhui'a, guta' lu'u dyiguiba, bibidale bedena'le nē'ëdi!.” Cana' yéba' lëjé!. ⁴⁴Na'ra inajé' yébijé' nē'ëdi':

“Señor, ¿bata blé'ëndo' luë' uduelo'? ¿Bata blé'ëndo' luë' ubililo'? ¿Bata blé'ëndo' luë' uza'o' yedyi tula blao' žan yu'u quiendo'? ¿Bata blé'ëndo' luë' bdzioguelo' žabo'? ¿Bata blé'ëndo' luë' guca žhue'lo'? ¿Bata blé'ëndo' luë' guta'llo' lu'u dyiguiba, na' bibeyéchi'la'adyi'ndo' luë'?” ⁴⁵Na' inia' yéba'jé!: “Tali rnia' le'e, yugute ta bibéle bibeyéchi'la'adyi'le ja ben' nao xneza', la'acazi ben' yéchi' gula, cana' bibeyéchi'la'adyi'le nē'ëdi!.” ⁴⁶Caora na' tziojé' gui' gabila ta bireyula tuzioli. Pero ja ben' neyéri laxta'ohue lao Diuzi, huayoje' tzesuléjé! Diuzi guibá tuzioli. —Cana' una Jesús rëbiné' lëjé!.

Cabé' bëjé' psaque'jé' ta guxujé' Jesús

(Mr. 14.1-2; Lc. 22.1-2; Jn. 11.45-53)

26 Cati beyudyi una Jesús cana', na' uné' rëbiné' ben' quiéné!:

²—Como banezile, ichopa dzazi idyin ga'alá' lani pascua. Na' usediyin bené' nē'ëdi', bichi yugulu bené', lao na'a ben' rnabé' ta uda'jé' nē'ëdi' lë'ë yaga cruzo. —Cana' una Jesús.

³Na'ra caora na', begu'udi' ja ben' naca xan' pxuzi, len yaca los demás ben' rusédi ley quie Moisés, len ben' rnabé' quie ben' Israel, begu'udi'jé' lali'a palacio quie Caifás, ben' naca xan' pxuzi rnabé'ra iza na!. ⁴Na' psaque'jé' bi huejé' ta guxujé' Jesús balarazi gutijé' lëbé!. ⁵Cana' unajé' rëbijé' laguediyijé!:

—Bireya'ala' gutironé' tu neraca lani ta biidza' ja bené' ra'o.

**Tu nigula blatonë' aceite tzao'
guicho Jesús**
(*Mr. 14.3-9; Jn. 12.1-8*)

6Na'ra uza! Jesús lénë' yaca ben' quië' ziojë' yedyi Betania uyu'ujë' yu'u quie Simón, ben' guca yela' hue' ta ruzudzo' cuerpo quienë' dza na!. **7**Na' ubiga' tu nigula ga re' Jesús lao mesa. Nu' anë' tu frasco yo alabastro yudzo aceite tzao' ta rla'n žixi ūeo. Na' blatonë'n guicho Jesús. **8**Cati blé' ja ben' quie Jesús cabë' bë nigula, na'ra bdza'jë' unajë' rëbijë' laguedyijë':

—¿Bixquien' beditoguë' aceite cana'? **9**Reya'ala' guti'lñë'n zaca'n dumi že tacuenda gacalënë' ben' yéchi'.

10Na' be Jesús cabë' rnajë', na' unë' rëbinë' lëjë':

—¿Bixquien' ruele zëdi nigula niga? Tadya'a bënë' quia!. **11**Nita'cazi ben' yéchi' ladole yugu dza. Pero në'ëdi', baruen bago dza bira sulia' le'e. **12**Lena' blatonë' aceite rla'n žixi ūeo guichoga', dan' baruen bago dza gatia' udze'jë' cuerpo quia' lu'u beló yo. **13**Tali rnia' le'e, con gatitezi tzetixogue' benë' xti'idza' Diuzi inajë' cabë' re'en Diuzi gata' yela' neban quie yaca benë' tuzioli, quixogue'rëjë' cabë' bë nigula niga quia!. Cana' yeza'la'adyi'jë' cabë' bënë' quia!.

**Psaque' Judas ta usedyinnë' Jesús
lao na'a ben' rnabë'**
(*Mr. 14.10-11; Lc. 22.3-6*)

14Na'ra uyo tu ben' quie Jesús, ben' lao Judas Iscariote, yegue'lñenë' ja xan' pxuzi di'idza'. **15**Na' una Judas rëbinë' lëjë':

—¿Gaca gunle në'ëdi' chan'
usedyina' Jesús lao na'ale?

Na' udižujë' lëbë' galobechi dumi plata. **16**Na'ra rusaque' Judas nacala huenë' ta usedyinnë' Jesús lao na'a ja xan' pxuzi.

Udao Jesús rtze' lani pascua

(*Mr. 14.12-25; Lc. 22.7-23;*

Jn. 13.21-30; 1 Co. 11.23-26)

17Dza nëro uzu dza lani, dza rao ja ben' Israel yëta xtila biyu'un levadura, bebiga' ja ben' quie Jesús ga zënë' unajë' rëbijë' Jesús:

—¿Ga re'enlo' usiña'ndo' ta gaoro quie lani pascua?

18Na' una Jesús rëbinë' lëjë':

—Uletzio ciudad Jerusalén tzena'le tu ben' zu na!. Na' yébilenë': “Cani una maestro: Baruen bago dza gatia!. Quie lena' gaolia' ja ben' quia' quie lani pascua žan yu'u quio!”

19Na' bë ja ben' quie Jesús cabë' bënë' lëjë' mandado. Uyojë' psiñal'jë' ta gaojë' rtze' quie lani pascua.

20Cati bagula, bdyin Jesús ure'lñenë' ja chipchopa ben' quië' lao mesa. **21**Tu raca neyu'ujë' raojë', una Jesús rëbinë' lëjë':

—Tali rnia' le'e, ladole zu tu ben' usedyin në'ëdi' lao na'a ben' rnabë'.

22Na' guquejë' bayéchi' gula. Na' unë tu huiojë' rëbijë' Jesús:

—Señor, ¿quele në'ëdi' hua' cabë' unao'?

23Na'ra una Jesús rëbinë' lëjë':

—Nu ben' udylë në'ëdi' tuže yëta quie lu'u plato dyia niga,

lëbë' usedyinnë' në'ëdi' lao na'a ben' rnabë'. **24**Decazide gaca quia' në'ëdi', bichi yugulu benë', cabë' rnëñ lë'lë guichi la'iya quie Diuzi.

Pero bayéchi' gula ta za' gaca quie ben' usedyin në'ëdi' lao na'a ben' rnabë'. Tadya'acala quienë' chan' biuzunë' lao yedyi layu.

25 Na' una Judas, ben' usedyin Jesùs lao na'a ben' rnabë', rëbinë' lëbë':

—Maestro, ¿quele në'ëdi' hua' cabë' unao'?

Na' una Jesùs rëbinë' lëbë':

—Aja!, luë' na!.

26 Na' tu raca neraojë', bëxu Jesùs yëta xtila unë' rëbinë' Diuzi: "Diuxcalelo!" Na' bžužunë'n bë'në'n ja ben' quië' unë' rëbinë' lëjë':

—Ulegao, lëlen nacan ca quie cuerpo quia'.

27 Ude na', bëxunë' tu copa vino nisa bedzuli', unë' rëbinë' Diuzi: "Diuxcalelo!" Na' bë'në'n ja ben' quienë' unë' rëbinë' lëjë':

—Uleyo'on yugulule. Lëlen nacan **28** ca quie ren quia!. Lena' ilatoga' gatia' cuenda yega'ntza'olë Diuzi le'e tacubi, lëscan' cuenda gata' yela' huezi'že quie yaca ben' zë.

29 Pero rnia' le'e, bira yo'oga' vino nisa bedzuli' tatula. Hasta que idyin dza zulële në'ëdi' ga rnabë' Xuza' Diuzi, na'tera yo'oga' tacubi tatula.

Una Jesùs cabë' hue Pedro usanne'

lëbë'

(Mr. 14.26-31; Lc. 22.31-34; Jn. 13.36-38)

30 Na' ude beyudyi bilajë' tu himno, uzaljë' ziojë' ya'a Olivos.

31 Na' una Jesùs rëbinë' ja ben' quienë':

—Huasanle në'ëdi' yugulule na'ayela. Gaca quiele ca rnan lë'ë guichi la'iya quie Diuzi: "Hue' Diuzi lato guti ja benë' xan' beco'

ži'ilä', na'tera huedzatza ja beco' ži'ilä' quiénë'." **32** Pero iyudyi guti ja benë' në'ëdi', huebana' tatula, huabialaohua' laole tziole estado Galilea.

33 Na'ra una Pedro rëbinë' Jesùs: —Ba'ala'cazi yugulujë' usanjë' luë', pero në'ëdi', biusancaza' luë'.

34 Na' una Jesùs rëbinë' Pedro:

—Tali rnia' luë', tu binecuedyi biu na'ayela, huëbo' benë' binubë'lo' në'ëdi' tzona lasa.

35 Na' una Pedro rëbinë' Jesùs:

—Ba'ala'cazi chi gutirëjë' në'ëdi' len luë', biyëpa' ja benë' binubë'da luë'.

Canalrë una yaca los demás ben' quie Jesùs.

Bë'lë Jesùs Diuzi di'idza' tu ga lao Getsemaní

(Mr. 14.32-42; Lc. 22.39-46)

36 Na'ra bdyinlë Jesùs ja ben' quiénë' ga lao Getsemaní, na' unë' rëbinë' lëjë':

—Ni ulecue' tu raca tza'a ni' tzgue'lia' Diuzi di'idza'.

37 Na' uquïë' Jesùs Pedro len chopa ži'i Zebedeo, udyialaorajë' ilë'ëti' ga uzulao guque Jesùs bayéchi' gula. **38** Na' una Jesùs rëbinë' lëjë':

—Tanto raqueda' bayéchi' gula, re'ennan gutin në'ëdi'. Le'e yega'nle niga, pero bigasile huele në'ëdi' tuže.

39 Na'ra udyialaoranë' ilë'ëti' gutanë' guzu ru'ala layu, bë'lënë' Diuzi di'idza' unë' rëbinë' Diuzi:

—Xuza' Diuzi, chi saque' ucachi' ucui'olo' në'ëdi' ca naca tazëdi gula baza' gaca quia!. Nacan ca quie tu tasla' gula yo'oga!. Pero

bihuelo' cabë' re'enda', huelo' cabë' re'encazo' gaca.

⁴⁰Na' zeza'në' bedyinnë' ga nita' ja ben' quienë'. Cati blé'ënë' arasijë', na'ra unë' rëbinë' Pedro:

—¿Quele biužaque'le bigasile ni tu hora ta huele në'ëdi' tuže? ⁴¹Bigasile. Ulehue'lë Diuzi di'idza' tacuenda bihue xan' taxi'ibi' le'e gan huele xquia ca tazëdi gula baza' quiele. Tali re'enle huelële në'ëdi' tuže, pero nerdzioguele fuerza quie Diuzi ta huele cabë' re'enle huele.

⁴²Na' taorupe zio Jesús yegue'lénë' Diuzi di'idza' unë' caniga:

—Xuza' Diuzi, chi bisaque' te cana'zi ca naca tazëdi gula baza' gaca quia', na'ra gacacazi ca re'enlo'.

⁴³Na'ra zeza'në' bedyinnë' tatula ga nita' ja ben' quienë', pero nerراسijë', dan' lega yu'u bichi gala laojë'. ⁴⁴Na' psannë' lëjë' zioguë' taoyune lasa yegue'lénë' Diuzi di'idza'. Unë' rëbinë' Diuzi cabë' unë' taorupe. ⁴⁵Na'ra zeza'në' tatula bedyinnë' ga nita' ja ben' quienë'. Na' unë' rëbinë' lëjë':

—Na'a sí, gasile yezi'lala'adyi'le. Abdyin hora usedyin benë' në'ëdi', bichi yugulu benë', lao na'a ben' napaja dula' xquia. ⁴⁶Ulechasa, tzioro. Baza' ben' usedyin në'ëdi' lao na'a ben' rnabë'.

Bëxujë' Jesús preso

(Mr. 14.43-50; Lc. 22.47-53; Jn. 18.2-11)

⁴⁷Na' nezë Jesús ru'enë' di'idza' cati bdyin Judas, ben' naca ben' quienë' lao chipchopajë'. Bdyinlénë' ja ben' zë nu'ajë' macheta, nu'ajë' yaga. Bdyinjë' use'ela' ja xan' pxuzi

len ja ben' rnabë' lëjë!. ⁴⁸Na' Judas, ben' usedyin Jesús lao na'ajë', bega'nllenë' lëjë' di'idza' dza na' caora gudyinë' lëjë' cani:

—Con ben' gaohua' tu situ xa'ague, lëben' na' guxule preso.

⁴⁹Na' ubiga' Judas ga zë Jesús unë' rëbinë' lëbë':

—iPadiux, Maestro!

Caora na' udaohuë' Jesús tu situ.

⁵⁰Na' una Jesús rëbinë' lëbë':

—Padiux, bicha'. ¿Bi ruelo' zao' niga?

Na'ra ubiga'jë' bëxujë' Jesús preso uquïë'jë' lëbë!. ⁵¹Caora na' ulio tu ben' quie Jesús macheta quienë', uchugunë' naga ben' naca mozo quie xan' pxuzi.

⁵²Na' una Jesús rëbinë' lénë':

—Bedze' macheta quio' lu'u lidyin. Nu ben' rdilaja conlë macheta, lëlëcazin gutin lénë!. ⁵³¿Binezo' ca huelëcazi Xuza' në'ëdi'? Chan' inaba' xuza', ise'elë' mazla tzona gallo chi mila ja ángel ta gacalëjë' në'ëdi'. ⁵⁴Pero chi inaba' xuza' ta ise'elë' ja ángel, na' bisaque' gaca quia' cabë' rnëñ lë'lë guichi la'iyá quie Diuzi ca reya'ala' gaca quia'!

⁵⁵Na'ra una Jesús rëbinë' ja ben' bdyin bëxu lëbë':

—¿Abrole nu'ale macheta, nu'ale yaga, ta guxule në'ëdi? ¿Raquele në'ëdi' ben' uban? Yugu dza rbi'a lu'u idao' rnabë'ra rusëdia' benë', pero bibëxule në'ëdi' caora na'. ⁵⁶Pero cana' guca tacuenda uzu di'idza' cabë' di'idza' quie Diuzi bzu ben' profeta lë'lë guichi dza na'te.

Na'ra psanla'adyi' ja ben' quie Jesús lëbë' bžunojë'.

Psedyinjë' Jesús lao na'a ben' rnabë'

(Mr. 14.53-65; Lc. 22.54-55,

63-71; Jn. 18.12-14, 19-24)

⁵⁷Na' uquïë' ben' bëxu Jesús preso lao Caifás, ben' naca xan'

pxuzi rnabë'ra. Lena' negu'udi' ja ben' rusëdi ley quie Moisés, len ja ben' rnabë'. ⁵⁸Pero zio Pedro naohuë' lëjë' zitu'la, bdyinnë' lali'a yu'ute quie xan' pxuzi rnabë'ra. Na' uyu'unë' ure'në' lado ja policía ta ilë'enë' cabiži gaca iyudyin.

⁵⁹Na' rusaque' ja xan' pxuzi, len yugu ja ben' rnabë' quie idao' rnabë'ra bi huejë' ta gaojë' Jesús xquia ta gutijë' lëbë', ba'ala'cazi tafalso gaojë' lëbë' xquia. ⁶⁰Pero bibedzelejë' ca inajë', ba'ala'cazi unë ja ben' zë dìl'idza' falso contra lëbë'. Na' beyudyite bdyin chopá testigo falso. ⁶¹Na' unajë' rëbijë' ben' nita'ja na':

—Lëben' niga unë!: “Udyiaya'a idao' rnabë'ra, na' yelisa'n tatula lao tzona dza.”

⁶²Na'ra uzuli xan' pxuzi rnabë'ra, unë' rëbinë' Jesús:

—¿Bixquieren' birequëbo'? ¿Bi ca nao' dan' rnëjë' cabë' unao'?

⁶³Pero chizi bega'n Jesús. Na' una xan' pxuzi rnabë'ra rëbinë' Jesús:

—Rguntia' Diuzi zu guibá, guenë' chi rnao' tali. Unë nëto' chi tali naco' Cristo, ū'i Diuzi.

⁶⁴Na' una Jesús rëbinë' lëbë':

—Tali naca' Cristo, ū'i Diuzi, cabë' unao'. Lëscan' inia' le'e, hualë'élé në'ëdi', bichi yugulu benë', cati cui'a zaqué' yebë cuéta Diuzi, ben' de yela' rnabë' ū' quie. Lëscan' hualë'élé në'ëdi' cati yeguida' tatula lao beo zë ū'an guibá.

⁶⁵Na'ra tantozi bdza' xan' pxuzi rnabë'ra, uchezanë' ū'abë' unë' rëbinë' ja ben' nita' na':

—Rnaya' ben' niga Diuzi cabë' rnë'. Bira rnaban testigo tula. Abele

cabë' di'lídza' unë' rnaya'në' Diuzi.
¿Bi ca nale huero quiénë'?

⁶⁶Na' unajë' rëbijë' xan' pxuzi rnabë'ra:

—Napë' dula' xquia, reya'ala' gatinë'.

⁶⁷Na'ra bda'jë' ū'zen' laohuë', bë'jë' lëbë' zi!. Ibalajë' udijë' laohuë',

⁶⁸unajë' rëbijë' lëbë':

—Chi naco' Cristo, unacara nu udi luë'.

Una Pedro binubë'në' Jesús

(*Mr. 14.66-72; Lc. 22.56-62;*

Jn. 18.15-18, 25-27)

⁶⁹Tu neraca cana', ure' Pedro lali'a. Na' ubiga' tu nigula rue dyin lao xa'ne ga re' Pedro unanë' rëbinë' lëbë':

—Lëscana' luë', rdalërao' Jesús, ben' estado Galilea.

⁷⁰Na'ra una Pedro rëbinë' lënë':

—Binubë'da' nu ben' nao'.

⁷¹Na' zio Pedro zënë' ru'a puerta cati blë'ë itu nigula zë na'. Na'ra una nigula na' rëbinë' ja ben' zë na':

—Lëscan' lëben' na' rdalërenë' Jesús, ben' yedyi Nazaret.

⁷²Na' una Pedro rëbinë' lëjë':

—Ruguntia' Diuzi binubë'da' ben' na':

⁷³Tu chil'zi ude beyudyi na', ubiga' ja ben' nita'ja na' ga zë Pedro, unajë' rëbijë' Pedro:

—Tali luë' nacarao' ben' quie ben' na' como dan' nenate cabë' ruelo' ru'elo' di'lídza'.

⁷⁴Na'ra rugunte Pedro Diuzi hue Diuzi lëbë' castigo chi binacan tali cabë' rnë'. Na' unë' rëbinë' ja ben' nita' na':

—Binubë'da' nu ben' nale cana'!

Caora na' laoredyite tu biu. ⁷Na' beza'la'adyi' Pedro cabë' una Jesús gudyinë' lëbë!: "Tu binecuedyi biu na'ayela, na' tzona lasa yëbo' benë' binubë'lo' në'ëdi!." Na' bero Pedro zionë' uredyinë' zi'laza gula.

Psedyinjë' Jesús lao na'a Pilato

(*Mr. 15.1; Lc. 23.1-2; Jn. 18.28-32*)

27 Na' cati uyanil' na', bega'n yugu ja xan' pxuzi, len ja ben' rnabë' quie ben' Israel di'idza' bi huejë' ta gutijë' Jesús. ²Na'ra nuquiojë' Jesús psedyinjë' lëbë' lao na'a Poncio Pilato, ben' naca gobernador.

Cabë' guca guti Judas

³Cati blë'ë Judas cabë' ruejë' quie Jesús gutijë' lëbë!, na'ra beyaquenë' cabë' bënë'. Na' uyonë' yesannë' lao ja xan' pxuzi, len ja ben' rnabë' galobechi dumi plata ta udižujë' lëbë!. ⁴Na' unë' rëbinë' lëjë':

—Abia' tu xquia, psedyina' tu ben' bibi dula' xquia quie de lao na'ale, na' gutilenë'!

Pero na' unajë' rëbijë' lëbë':

—¿Bi cuenda quie nëto'? Nacan cuenda quio! luë'.

⁵Na'ra bzala Judas dumi plata lu'u idao' rnabë'ra uyoguë' bdze'në' du quiénë' uzë ladza ta gutinë'.

⁶Na' bezi' ja xan' pxuzi dumi plata unajë' rëbijë' laguedyijë':

—Bireya'ala' udze'ro dumi niga lu'u caja ga yu'u gun quie Diuzi, como dan' xlažo quie ben' bëti benë' na'.

⁷Na'ra labega'ntejë' di'idza' bi huejë' conlë dumi yeya'oje' tu cue' layu ga ucachijë' ben' binaca ben' Israel. Na' layu beya'oje' laona

layu quie ben' rue taza plato dza na!. ⁸Pero na'a biralaona cana!. Anexuba ja benë' laona layu quie ren. Cana' laona hasta na'adza. ⁹⁻¹⁰Cana' uzu di'idza' cabë' una profeta Jeremías dza na!. Lëdi'idza' na' rnën caniga: "Aodižu ben' Israel galobechi dumi plata precio quiénë!. Lëdumi aoži'jë' beya'oje' tu cue' layu quie ben' rue taza plato. Cana' una Diuzi gudyinë' në'ëdi!." Cana' una profeta Jeremías.

Zë Jesús lao Pilato

¹¹Na'ra uquië'jë' psedyinjë' Jesús lao na'a ben' naca gobernador. Na' una ben' naca gobernador rëbinë' Jesús:

—¿Naco' rey quie ben' Israel?

Na' una Jesús rëbinë' lëbë!:

—Naca' rey quiejë' cabë' unao!.

¹²Cati rao ja xan' pxuzi, len ben' rnabë' Jesús xquia, bibequëbinë'.

¹³Na' una Pilato rëbinë' Jesús:

—¿Quele birelo' cabë' najë' raojë' luë' xquia?

¹⁴Pero bibequëbi Jesús tatula.

Tana' lena' lega beban gobernador.

Pchugulijë' gati Jesús

¹⁵Na' de tu costumbre quiejë' yebio gobernador tu ben' preso yu'u lu'u dyiguiba tu raca lani pascua. Na' yebio gobernador nutezi ben' re'en ja benë' yero. ¹⁶Na' yu'u tu ben' lao Barrabás lu'u dyiguiba. Nezi ja benë' dyë'ëdi naquë' ben' mala. ¹⁷Na'ra bë' begu'udi' ja benë', na' una Pilato rëbinë' lëjë':

—¿Ca nužilajë' re'enle yebioga' lu'u dyiguiba? ¿Re'enle yebioga'

Barrabás? ¿O chi re'enle yebioga' Jesús, ben' na use'ela' Diuzi lëbë'?

¹⁸ Cana' unë' rëbinë' lëjë' dan' gucabë'në' yela' ū' quie ben' rnabë' psedyinjë' Jesús lao na'anë'.

¹⁹ Na'ra tu ure' Pilato ga ruenë' justicia, caora use'ela' ū'gulë' di'idza' gudyinë' lëbë': "Usanlo' quie ben' na', dan' bibi xquia napë'. Uxusa' udijele cabë' raca quiénë'. Lega rdëbida' quio' chi biusanlo'në'."

²⁰ Pero bë'lë ja xan' pxuzi len ja ben' rnabë' ja benë' di'idza' ta inabajë' ta yero Barrabás, pero ta gutijë' Jesús. ²¹ Na' una gobernador rëbinë' lëjë' tatula:

—¿Nulajë' lao rupajë' re'enle yebioga' lu'u dyiguiba?

Na' unajë' rëbijë' lëbë':

—Barrabás.

²² Na' unaba Pilato rëbinë' lëjë':

—¿Biži hua' quie Jesús, ben' na use'ela' Diuzi lëbë'?

Na' yugutejë' unajë' rëbijë' Pilato:

—iUda'lo'në' lë'ë yaga cruzo!

²³ Na' una Pilato rëbinë' lëjë':

—¿Biži xquia bënë'?

Pero na' unajë' zidzo rëbijë' lëbë':

—iUda'lo'në' lë'ë yaga cruzo!

²⁴ Cati gucabë' Pilato bisaque' gaca areglo, lëzi blë'ënë' bdza' ja benë', na' bënë' mandado yexi'jë' nisa udibinë' në'ë lao ja benë', unë' rëbinë' lëjë':

—Binaca cuenda quia' në'ëdi' dan' gatinë'. Rnia' le'e gabi xquia bënë'. Nacan cuenda quiele.

²⁵ Na' una yuguejë' rëbijë' lëbë':

—Cuenda quiendo' len ū'indo' nacan dan' gatinë'.

²⁶ Na'ra bebio Pilato Barrabás lu'u dyiguiba. Bënë' mandado udi ja

soldado Jesús guidi, na' uda'jë' lëbë' lë'ë yaga cruzo.

²⁷ Na' uquië' ja soldado Jesús lao palacio. Caora na' begu'udi' yugu ja laguedyi soldado quiejë', bzujë' lëbë' gatzo la'ohue. ²⁸ Na' uléchojë' ū'abë', bgacojë' lëbë' tu la'ari' ū'na. ²⁹ Na' bdze'jë' guichoguë' tu coron yëchi', psejë' lëbë' tu xaga zaca' në'ë yebë. Na'ra uditzujë' ū'bijë' laohue' rutitujë' lëbë' unajë' rëbijë' lëbë':

—iViva luë', Rey quie ben' Israel!

³⁰ Lëscan' bda'jë' lëbë' ū'nen'. Na' begubajë' xaga zenë' udijë'n guicho Jesús. ³¹ Ude beyudyi ptitujë' lëbë', beléchojë' tu la'ari' ū'na guconë', begacojë' lëbë' ū'babacazë'. Na' uquië'jë' lëbë' ta uda'jë' lëbë' lë'ë yaga cruzo.

Cabë' guca bda'jë' Jesús lë'ë yaga cruzo

(Mr. 15.21-32; Lc. 23.26-43; Jn. 19.17-27)

³² Na' du tu neza bedilajë' tu ben' yedyi Cirene laonë' Simón. Na' bëjë' mandado hua'anë' yaga cruzo.

³³ Cana' bdyinjë' ga laona Gólgota, ta inaro xti'idza'ro: Ya'a chita guicho ben' huati. ³⁴ Na' bë'jë' ta yo'oguë' vino nequixi' tasla' gula. Bë' hue'ënë'n ledao' bicu', bigu'unnë' yo'oguë'.

³⁵ Na' ude beyudyi bda' soldado lëbë' lë'ë yaga cruzo, na'ra bëjë' suerte bë'jë' laze ū'abë'. Cana' uzu di'idza' bzu ben' profeta lë'ë guichi dza na'. Lëdi'idza' rnan caniga: "Bëjë' suerte bë'jë' laze ū'abë'."

³⁶ Na'ra ure' soldado ta rapajë' lëbë'.

³⁷ Na' guicho cruzo bdyiajë' tu letrero ga rguixogue'n ca bi xquia bënë' dan' bëtijë' lëbë'. Lë'ë letrero

unan caniga: "Jesús, Rey quie ben' Israel."

³⁸Lëscan' bda'rëjë' chopá ben' uban lë'ë ichopa yaga cruzo. Bzujë' tun zaquë' yebé cuëta Jesús, itun bzujë' zaquë' yega!. ³⁹Na' ude ja ben' ptitujë' lëbë' ruta guicho laojé!. ⁴⁰Unajé' rëbijé' lëbë':

—Luë' unao' udyiagui'lo' idao' rnabë'ra, na' yeyuelo'n lao tzona dza, psela cuinlo' na'a. Chi tali ū'i Diuzi luë', beyëzi lë'ë yaga cruzo.

⁴¹Lëscan' ja xan' pxuzi, len ja ben' rusëdi ley quie Moisés, len ja ben' partido fariseo, len ja ben' rnabë' ptitujë' lëbë'. Na' unajé' rëbijé' laguedyijé':

⁴²—Pte pselanë' ben' tula, nechan' biužaque'në' uselanë' cuinnë'. Chi tali naquë' Rey quie ben' Israel, hueyëzë' lë'ë yaga cruzo ta galero quiénë!. ⁴³Lëscan' unë' zudyi'ilënë' Diuzi. Ca rusela Diuzi lëbë' na'a chi tali raque Diuzi lëbë' como dan' unë' naquë' ū'i Diuzi.

⁴⁴Na' lente ben' uban, ben' bda'rëjë' lë'ë yaga cruzo, ptiturëjë' lëbë'.

Cabë' guca guti Jesús

(Mr. 15.33-41; Lc. 23.44-49; Jn. 19.28-30)

⁴⁵Na' bechula lao duže ciudad na'. Cadu la'odza uzulaon, na' beyudyin ca du las tres quie zadzë!. ⁴⁶Lëhora na'tezi uredyiya' Jesús zidzo unë':

—Elí, Elí, ¿lagma sabactani? —ta inaro xti'ldza'ro: Xuza'! Diuzi, Xuza' Diuzi, ¿bixquier' apsanla'adyo' në'ëdi'?

⁴⁷Na' be ja ben' nita' na' cabë' una Jesús. Na' unajé' rëbijé' laguedyijé':

—Profeta Elías rëzi ben' niga.

⁴⁸Caora na' laziote tu ben' zu na' yexi'në' tu ta naca yun' ca ū'i laona esponja. Na' bdze'në'n lu'u vino sla' bzunë'n lao yaga ta bdyinnan sibi ga da' Jesús ta supinë'n. ⁴⁹Pero una ibala ja ben' zë na' rëbijé' lëbë':

—Psan na'. Ya' ina'ro chi guida Elías uselanë' ben' niga.

⁵⁰Na' uredyiya' Jesús zidzo tatula, gutinë!. ⁵¹Lëhora na'tezi bre'ezza la'ari' zë gatzo lao' idao' rnabë'ra. Babre'ezan gucan chopá la'a. Lëscan' guca užu' ula'an yo yela. ⁵²Na' beyalo beló yo ga yu'u ben' huati. Beban ja zë ben' baguti, ben' bë quie xti'ldza' Diuzi dza uzujé!. ⁵³Cati abeban Jesús, na'ra brojë' lu'u beló yo, uyojë' ciudad naca la'iya Jerusalén. Na' blë'ë ja ben' zë lëjé'.

⁵⁴Na' cati blë'ë xan' soldado lénë' ja soldado quiénë' cabë' guca užu' len itu ta guca, na'ra bdzebijë' unajé' rëbijé' laguedyijé':

—Tali naca ben' ni ū'i Diuzi.

⁵⁵Na' nita' ja nigula zë zitu' rna'jë' cabë' raca quie Jesús. Gucalëjë' unaojë' lëbë' desde dza uza'në' estado Galilea. ⁵⁶Na' zélë lëjé' María Magdalena, len María ūna' Santiago, len José, len ūna' yaca ū'i Zebedeo.

Peachi'jë' Jesús lu'u beló yo

(Mr. 15.42-47; Lc. 23.50-56; Jn. 19.38-42)

⁵⁷Cati agula, bdyin tu ben' uña'a, ben' yedyi Arimatea laohuë' José. Naquë' ben' nao xneza Jesús. ⁵⁸Na' uyone' yena'në' Pilato unabanë' cuerpo quie Jesús ta tzecachi'në'n. Na' bë Pilato mandado ta hue'jë' lëbë' cuerpo quie Jesús. ⁵⁹Na' užu'

José cuerpo quie Jesús, bdubinë'n tu la'ari' yéri. ⁶⁰Na' yehua'anë'n bdze'në'n lu'u tu beló yo ta zabeyudyi bënë'. Na' zaotacorë' ru'a beló yo tu yo že gula ta naca laga!. Ude beyudyi na!, bezë'ë zeyoguë!. ⁶¹Na' ru'a beló yo na! ure' María Magdalena lénë' itu María tula.

Pca'një' ja soldado ga pcachi'jë' Jesús

⁶²Na' beteyu na' dza saodo, dza huezila'adyi' quiejë', uyo ja xan' pxuzi, len ja ben' partido fariseo yena'ljë' Pilato ⁶³unajë' rëbijë' lëbë':

—Señor, néto' reza'la'adyi'ndo' cabë' una ben' huizi' yë' na' catiuzuë', unë' hueza'në' ga de ben' huati huebannë' tatula lao tzona dza. ⁶⁴Tana' lena' ruen zi huelo' mandado gapa ja soldado ru'a beló yo lao tzona dza. Cana' bisaque' tzio ja ben' quiénë' du rëla tzelanjë' cuerpo quiénë' tacuenda yëbijë' ja benë': “Beza'në' ga de ben' huati bebannë'.” Chi huaca hue ben' quiénë' cana', mazara yë' si'jë' benë'.

⁶⁵Na' una Pilato rëbinë' lëjë':

—Ni nita' tu cue' soldado, ben' gapa ja ru'a beló yo. Ulequië'jë' ta gapajë' dyë'ëdi ru'a beló yo.

⁶⁶Na'ra uyojë' uquie'ljë' soldado. Pquichijë' tu sello ga nedila ru'a yo ta nutacojë' ru'a beló. Na' pca'një' ja soldado, ben' rapa ru'a beló yo.

Cabë' guca cati beban Jesús

(Mr. 16.1-8; Lc. 24.1-12; Jn. 20.1-10)

28 Cati uyanil' dza tula du bala dza domingo, uyo María Magdalena lénë' itu María tula yena'ljë' ru'a beló yo. ²Caora na' lagucate tu užu' nun quie uyëzi tu ángel quie Diuзи guibá, bdubanë'

yo nutacojë' ru'a beló, ure'në' laonan. ³Na' rusenil' laohuë' ca xni' yesa. Lëscan' žabë' rna'n raca titi' bezëri gula. ⁴Cati blë'ë ja soldado ángel, na' lega bdzebijë' užizan lëjë' byalajë' layu, gutajë' ca quie ben' huati. ⁵Na' una ángel rëbinë' ja nigula:

—Bidzibile. Nezda' reguilole Jesús, ben' guti lë'ë yaga cruzo. ⁶Bira zunë' niga. Abebannë' cabë' unë' gaca quiénë'. Uledacara, ulena' ga bdze'ljë' cuerpo quiénë'. ⁷Uletzio tzeguedyile ja ben' quiénë' abeza'në' ga de ben' huati, abebannë'. Huabialaohuë' le'e tu neza Galilea. Na'te hualë'ële lëbë'. Lena' ruen zi quixogui'a le'e.

⁸Na' du rdzebi ja nigula, uza'ljë' taria gan de beló yo, ziojë' redaohuejë' tzeguedyijë' ja ben' quie Jesús cabë' guca. ⁹Na' ptilalao Jesús lëjë' tu neza ugapë' diuži lëjë'. Na' ibiga'ljë' gan zë Jesús gutajë' layu bda' ru'ajë' uyonela'adyi'ljë' lëbë'. ¹⁰Na' una Jesús rëbinë' lëjë':

—Bidzibile. Uletzio tzeguedyile ja bicha' ben' quia' ta tziojë' Galilea. Na'te ilë'ljë' në'lëdi'.

Cabë' una ja soldado guca quie cuerpo quie Jesús

¹¹Tu raca nezio ja nigula tu neza, uza' bala ja soldado uyojë' ciudad Jerusalén yeguëdyijë' ja xan' pxuzi cabë' guca quiejë'. ¹²Na' uyo ja xan' pxuzi yeguëdyijë' ja ben' rnabë' ta yega'një' di'idza' bi huejë'. Na' bë'ljë' ja soldado dumi že. ¹³Na' unajë' rëbijë' ja soldado:

—Cani yëbile benë'. Du rëla du rasile, bida ja ben' quie Jesús, bedelanjë' cuerpo quiénë'. ¹⁴Chi

inezi gobernador cabë' guca quiele, nëto' gacalëndo' le'e ta bibi zëdi gaca quiele.

¹⁵Na'ra uži' ja soldado dumi, uyojë' yeguëdyijë' ja benë' cabë' gudyi xan' pxuzi len ja ben' rnabë' lëjë'. Cabë' una ja soldado guca quie cuerpo quie Jesús, cana' na ja benë' guca quien hasta na'adza.

**Use'ela' Jesús ben' quienë'
tzetixogue'jë' benë' xti'idzë'**

(*Mr. 16.14-18; Lc. 24.36-49; Jn. 20.19-23*)

¹⁶Na' uza' ja chiptu ben' quie Jesús ziojë' estado Galilea. Na' bdyinjë' ga zu tu ya'a, ga gudyi Jesús lëjë' tziojë' dza na'te. ¹⁷Lëgan'

na' blë'ejë' Jesús uyonela'adyi'ljë' lëbë!. Na' nita' ja ben' quienë' biralejë' chi lëbë!. ¹⁸Na' ubiga' Jesús gan' nita' ja ben' quienë' unë' rëbinë' lëjë':

—Apca'n Diuzi lao na'a inabi'a lao duže guibá len duže dyilayu.

¹⁹Tana' lena' inia' le'e, uletzio duže yedyi layu tzetixogue'le ja benë' xti'idza!, usëdilejë' inaojë' xneza!. Ulehue' lao ja ben' nao xneza' uzëtole Diuzi, uzëtole në'ëdi', uzëtole Bichi Be quienë!. ²⁰Na' usëdilejë' huejë' duže cabë' baonia' le'e. Bigala'adyi'le sulia' le'e tuzioli hasta iyudyi dyila yu. Amén.